

**აკოლონ სილაგაჲე
ჰასტანგ გურული**

3

**ისტორიულ-პოლიტიკური
ესე**

თბილისი

1996

წინასიტყვაობა

წინამდებარე კრებულში მოთავსებული ნაშრომები წარმოადგენენ ექსპერიმენტს იმ ზოგიერთი მეთოდოლოგიური პრინციპის კონკრეტული რეალიზებისა, რომელთა ჩამოყალიბების ცდა მოცემულია 1988 წ. დეკემბერში გამოქვეყნებულ სტატიაში — „რანი ვეოფილვართ... რანი ვართ... რანი ვიქნებით“ (იხ. წიგნი — ა. სილაგაძე, საქართველო 88—90, თბ. 1992, გვ. 24—39. სტატია შემდეგი ფრაზით სრულდებოდა: „ამოცანა დღეს სხვაა: არ გამოვიჩინოთ უპატივცემულობა ჩვენი ისტორიის გაკვეთილების და ჩვენი განვითარების ძველთაგანვე შემუშავებული და გამოცდილი კონცეფციის მიმართ“). ექსპერიმენტი — ხაჩვენებელი, არასრულყოფილი.

ლაპარაკია, კერძოდ, სისტემურ მიდგომაზე ისტორიისადმი და სისტემური ანალიზის პრინციპებზე. ზოგადი ამოსავალი დებულება — და შესაბამისი რთული ამოცანა — აქ ის არის, რომ ისტორია უნდა წარმოვადგინოთ სისტემის სახით, ან ისტორიაში უნდა დავინახოთ სისტემა, რომელშიც მისი მთლიანობაც იქნება განსაზღვრული და ყოველი მოვლენისა და ეპოქის, როგორც ელემენტების, არა მარტო აღწერა, არამედ ადგილი — ურთიერთდაკავშირებულობა, ურთიერთმიმართება და ურთიერთგამომდინარეობა — იქნება მოცემული. ყველაზე უფრო რთულია სისტემური ანალიზის მთავარი ამოცანის დასმა და გადაჭრა — ის, რომ დადგინდეს სისტემის წარმომქმნელი ფაქტორი ან ფაქტორები და მოვლენა ან მოვლენები. სწორედ ამ შემთხვევაში, სპეციალური ანალიზით, განისაზღვრება სისტემის კანონზომიერი მთლიანობაც და განვითარების კანონზომიერებებიც. სხვა სიტყვებით: საბოლოო შედეგის სახით, უნდა გვქონდეს საქართველოს ისტორიის — ამჯერად ჩვენ იგი გვაინტერესებს — კანონზომიერი სისტემაც (მთლიანობაც) და მისი რეალიზაციის სხვადასხვა ქრონოლოგიური საფეხურიც, როგორც კანონზომიერი განვითარების სურათი.

რა თქმა უნდა, ბუნებრივია და ადვილი ზოგადი წარმომქმნელი ფაქტორის როლში დავსახოთ ქართული ეროვნული კონცეფცია. მაგრამ რთულია მისი გაშიფრვა და დადგენა, რადგანაც ეს არის დადგენა მისი

შემადგენელი ელემენტებისა, როგორც რეალური წარმომქმნელი ფაქტორებისა. ყველა შემთხვევაში გასათვალისწინებელია აგრეთვე გარკვეული პირობითობა (ბუნებრივი — მეცნიერებისათვის), რაც აგვაცდენს ისტორიის უხეშ გაიგივებას სისტემასთან; ამ შემთხვევაში, კერძოდ, გასათვალისწინებელია, რომ ისტორიაში გარკვეული სისტემა მხოლოდ მთლიანობაში ან დიდი მონაკვეთის შერჩევისას დაინახება, ხოლო ამის გვერდით დასანახია უფრო პატარა, ლოკალიზებული, მონაკვეთებიც, და მათი ანალიზისას არ არის გამორიცხული ისეთ მოვლენებთან ან ფაქტორებთან შეხვედრა, რომლებიც წინააღმდეგობაში შედიან განვითარების კანონზომიერებებთანაც და პროლუქტიულ ეროვნულ კონცეფციასთანაც.

ყველაფერი ეს, მეტ-ნაკლებად, გადმოცემულია, როგორც ითქვა, 1988 წელს გამოქვეყნებულ სტატიაში.

ამჯერად მკითხველს ვთავაზობთ კონკრეტულ ნარკვევებს (უფრო ზუსტად — ერთი იდეის ქვეშ გაერთიანებულები, ისინი ერთ მთლიანობას ქმნიან), რომლებიც ეძღვნება ეროვნული კონცეფციის, როგორც საქართველოს სახელმწიფოებრივი არსებობის განმსაზღვრელი ზოგადი ფაქტორის, მხოლოდ სამ შემადგენელ ელემენტს — სამ კონკრეტულ წარმომქმნელ ფაქტორს. ესენია: 1. საქართველოს, როგორც მცირერიცხოვანი სახელმწიფოს, გეოპოლიტიკის აგება გარკვეული საერთაშორისო ფუნქციის შესრულებაზე და გონივრული ბალანსირების პოლიტიკის გატარებაზე; 2. ამავე დროს (პრაგმატული პოზიციის გვერდით) — მაქსიმალისტური ამოცანის არდავიწყება და შესაბამისი იდეალისტური პოლიტიკური კურსის რეალიზება; 3. რაც მთავარია, ერთიანი საქართველოს იდეაზე დამყარება და ერთიანი ქართული სახელმწიფოებრივ-პოლიტიკური აზროვნების დამკვიდრება (კიდევ ერთ ფაქტორზე მინიშნება მკითხველმა შეიძლება პოვოს 1990 წ. გამოქვეყნებულ სტატიაში — „რა არის საქართველო“; იხ. წიგნში — ა. სილაგაძე, საქართველო 88—90, თბ., 1992, გვ. 209—221).

ამ ფაქტორების დანახვის ცდა განხორციელებულია ისტორიის უგრძეს მონაკვეთზე — ფარნავაზიდან სტალინამდე. საბოლოოდ, პრინციპული მეთოდოლოგიიდან გამომდინარე, ვიღებთ გადმოცემის შებრუნებულ სქემას: არა ისტორიის (ფაქტების, ქრონოლოგიის...) აღწერა და ჩასში — ყოველი ეპოქის, ყოველი მოვლენის დაკვალად — მოცემული ფაქტორების რამდენიმეჯერ დანახვა და რამდენიმეჯერ ანალიზი, არამედ პირიქით — ფაქტორის დასახელება და შემდეგ მის მიხედვით მთე-

ლი ისტორიის (ან მისი დიდი ნაწილის) დანახვა, რაც იმას ნიშნავს, რომ ისტორიას იმდენჯერ გადაეცლება თვალი, რამდენი ფაქტორიც იქნება დასახელებული.

ბუნებრივია, რომ ყოველი მოცემული ფაქტორის ილუსტრირება ერთი და იმავე ისტორიის სურათით პრაქტიკულად სწორედ მხოლოდ თვალის ერთი გადავლების საშუალებას იძლევა (ყოველ შემთხვევაში — ჩვენი მოკლე ნარკვევების ფარგლებში) და გარკვეულ იმპრესიონისტულ ხედვას გულისხმობს. ამ გარემოებამ განაპირობა ჩვენი ყანრი — ისტორიულ-პოლიტიკური ესსე (იგი, სხვათაშორის, აადვილებს ხიდეების გადახედვასაც თანამედროვეობასთან).

იმედი გვაქვს, რომ ამ მომენტებს სათანადოდ გაითვალისწინებს მკითხველი (და პოტენციური ოპონენტი) — წინააღმდეგ შემთხვევაში, არც ამ წიგნის გაცნობას ექნება აზრი და არც აზრის გამოთქმას. ჩვენთვის ამჯერად მთავარია მეთოდოლოგია და შესაბამისი საჩვენებელი სქემა. ერთი და მეორეც ჩვენთვის შეურყეველი დარჩება იმ შემთხვევაშიც, თუ აღმოჩნდება, რომ საილუსტრაციოდ წარმოდგენილი ისტორიული სურათი დეტალებში შეესებას თუ შეცვლას მოითხოვს, ან ზოგიერთი იდეა — დაზუსტებას.

აპოლონ სილაბაძე

1996 წ. იანვარი

იდეალიზმი და კრაზმატიზმი ქართულ კოლიტიკაში

„იგინი შებრკოლდეს და დაეცნეს,
ხოლო ჩუენ აღვდეგით და აღვემართენით“

საქართველოს სამათასწლიანი ისტორია სახელმწიფოებრიობის გადარჩენისათვის მუდმივი ბრძოლის ისტორიაა.

„საქართველო, უპირველეს ყოვლისა, არის ქართველი ერი, ხოლო იგი ყოველთვის იყო და არის სუვერენული ერი. ისტორიული ტრანსფორმაციების, რეალური მდგომარეობის, სახელმწიფოებრიობის ქონის თუ მისი ფაქტობრივი დაკარგვის მიუხედავად, იგი ყოველთვის იყო და არის დამოუკიდებლობის დაუთრგუნველი სურვილის მქონე და დამოუკიდებლობისათვის მებრძოლი ერი. (...)

საქართველო ყოველთვის იყო სუვერენული, იგი იყო ან დამოუკიდებელი სახელმწიფო, ან დამოუკიდებლობის იდეის — ერთადერთი იდეის — არცერთი წამით არდამეიწყებელი, მისთვის კატეგორიულად მებრძოლი, არდამორჩილებული, ამ თვალსაზრისით მოქმედება-შეუზღუდავი, ე. ი. ავტონომიური ქვეყანა“ (ა. სილაგაძე, საქართველო 88—90, თბ. 1992 წ. გვ. 209, 212).

ეს არის ტრაგიკული ისტორია. მაგრამ ეს ისტორია გრძელდება, რაც იმას ნიშნავს, რომ ტრაგედია ვერ განხორციელდა.

ეს ბრწყინვალე ისტორიაა.

ძალიან ხშირად თითქმის ქრესტომათიულ ჭეშმარიტებად აღიქმება ხოლმე მოსაზრება იმის შესახებ, რომ თითქოს მრავალრიცხოვანი, სუბედნიერი ერები დიდებისა და კეთილდღეობის გზაზე პრაგმატიზმის წყალობით გამოვიდნენ.

იკმნება შთაბეჭდილება, რომ ქართულ სინამდვილეში ეს დებულება ფაქტიურად იმისათვის გახდა საჭირო, რომ დამტკიცდეს: მცი-

რერიცხოვანი, „პატარა“, ერების უბედურებათა მიზეზი პრაგმატიზმის უარყოფასა და იდეალიზმის ერთგულებაში მდგომარეობს.

ჩვენ გვინდა პრინციპულად არ დავეთანხმეთ ორივე ამ მოსაზრებას.

ნებისმიერი ერის ისტორია თანაარსებობაა პრაგმატიზმისა და იდეალიზმისა (ჩვენ ზედმეტად მიგვაინია ამ ცნებების განმარტება — მკითხველი თვითონ მიხვდება, რა პირობითი შინაარსია ამ შემთხვევაში მათში ჩადებული). არც მათ ჭიდილზე შეიძლება ლაპარაკი. თითოეულს თავისი ადგილი აქვს, რაც დროში რეალიზდება, როდესაც ან ერთის დომინანტობა იქმნება, ან — მეორის. დამარცხება იქაა, სადაც პრაგმატიზმი თავის დროზე არ უთმობს ადგილს იდეალიზმს, და — პირიქით. უფრო ზუსტად: საქმეს ყოველთვის იდეალისტი იწყებს, იგი განსაზღვრავს მასშტაბურ ამოცანას და მასშტაბურ პროგრამას, პრაგმატიკოსი — სქემის მიხედვით — საქმეში ჩაერთვება ამოცანის წარმატებული რეალიზების შემთხვევაში, გარკვეულ ეტაპზე, როდესაც ერთგვარი დაყოვნება, მოპოვებულის სტაბილიზირებაა საჭირო. მთავარია, დოზირებაში არ იქნეს დაშვებული შეცდომა და თანამიმდევრობა და იერარქია არ იქნეს დარღვეული. კონკრეტულად ერების — დიდის თუ მცირეს — დონეზე განსხვავებას მხოლოდ სტრატეგიისა და ტაქტიკის საკითხი ქმნის: სად არის იდეალიზმი სტრატეგიის სფერო და სად — ტაქტიკისა, შესაბამისად — სად არის პრაგმატიზმი სტრატეგიის სფერო და სად — ტაქტიკისა.

მაგრამ, ყველა შემთხვევაში, დიდი ერების დიდებაში მხოლოდ პრაგმატული პოლიტიკური აზროვნების, ხოლო მცირე ერების პრობლემებში მხოლოდ იდეალისტური აზროვნების ნაყოფის დანახვა, რბილად რომ ვთქვათ, არასწორია. რაც მთავარია, არასწორია იდეალიზმის პროდუქტიული როლის უარყოფა.

დიდ ერებს (გერმანელები, ინგლისელები, ფრანგები...) მათი შეფეების, იმპერატორების, პრეზიდენტების, მთავრობების მხოლოდ პრაგმატული საშინაო და საგარეო პოლიტიკის წყალობით არ მიუღწევიათ კეთილდღეობისათვის.

არც თუ მრავალრიცხოვანი ჯარით ევროპიდან აზიის კონტინენტზე გადასული ალექსანდრე მაკედონელი ვერ ჩაითვლებოდა პრაგმატიკოსად, ხოლო მის იდეალიზმს — მსოფლიო იმპერიის შექმნის სურვილს — უდიდესი შედეგები მოჰყვა ისტორიაში.

არც რომისკენ მიმავალი, რუბკონზე შქერებული იულიუს კეისარი აზროვნებდა პრაგმატულად. იგი რომ წმინდა წყლის პრაგმატიკოსი ყოფილიყო, ალბათ რომის ჩვეულებრივ კონსულად დარჩებოდა. კეისარმა საწინააღმდეგო გადაწყვეტილება მიიღო, რასაც უდიდესი მნიშვნელობა ჰქონდა რომისა და მთელი მაშინდელი მსოფლიოსთვის.

ძალიან ძნელია დაამტკიცო, რომ „გერმანელი ერის უწმინდესი საღვთო რომის იმპერია“ მაინცდამაინც პრაგმატული აზროვნების ნაყოფი იყო და არა იდეალისტურისა. რომის პაპთან მებრძოლი იმპერატორები პრაგმატიკოსები არ იყვნენ, ხოლო კათოლიკური ეკლესიის შიგნით დაწყებული დიდი რეფორმაცია მთლიანად იდეალისტური აზროვნების შედეგი იყო, ისევე როგორც იდეალისტი იყო მისი უპირველესი იდეოლოგი — მარტინ ლუთერი. წინააღმდეგ შემთხვევაში, იგი ერთ რიგით კათოლიკე წინამძღვრად მოკვდებოდა, ხოლო რეფორმაციის უდიდესი პროგრესული შედეგები კათოლიკური სამყაროსთვის განუხორციელებელი დარჩებოდა.

ინგლისის რევოლუციაც არ დაუწყიათ პრაგმატულად მოაზროვნე პოლიტიკოსებს, რომელთა წყალობითაც დაადგა ინგლისი დიდებისკენ მიმავალ ახალ გზას. ოლივერ კრომველი პრაგმატიკოსი რომ ყოფილიყო, დარჩენილ სიცოცხლეს პარლამენტში ან თავის მამულში გაატარებდა.

საფრანგეთის რევოლუციაც იდეალისტებმა დაიწყეს. ნაპოლეონ ბონაპარტიც კი, რომელმაც ფრანგ რევოლუციონერთა იდეალიზმს ზღვარი დაუდო, საფრანგეთის იმპერატორის ამპლუაში წმინდა წყლის იდეალისტი იყო — მსოფლიო იმპერიის შექმნას შეეცადა. იგი დამარცხდა, მაგრამ პროგრესული შედეგებიც ნათელია: ნაპოლეონმა, სადაც კი ფეხი დადგა, ფეოდალიზმის ნაშთები ძირფესვიანად მოსპო, ხოლო ფრანგ ხალხს შესაძლებლობა მისცა, შეეცნო საკუთარი სულიერი და მატერიალური პერსპექტივები.

არც პირველი ან მეორე მსოფლიო ომის წინა ხანებში (ან თვით ომების მსვლელობისას) აზროვნებდნენ პრაგმატულად პოლიტიკოსები. ვილჰელმ მეორე რომ პრაგმატიკოსი ყოფილიყო, ანტანტის წინააღმდეგ ომში არ უნდა ჩაბმულიყო. ადოლფ ჰიტლერსაც არ უნდა დაეწყო 20-იან წლებში გერმანიის აღორძინებისთვის ბრძოლა.

ორივე მსოფლიო ომი იდეალისტ პოლიტიკოსთა აზროვნების შედეგი იყო.

თუ ეს აზრი სწორია, მაშინ ასეთი აზრიც უნდა ჩამოვყალიბოთ: დღევანდელი მსოფლიო პოლიტიკური რუკის დადგენით პრაგმატიკოსმა პოლიტიკოსებმა იდეალისტი პოლიტიკოსების მიერ აღძრული პროცესები და ამ პროცესების შედეგები დააფიქსირეს.

შეიძლება შემდეგი ზოგადი ფორმულის გამოყვანაც: იდეალისტები ქმნიან — პრაგმატიკოსები განამტკიცებენ.

მსოფლიოს პოლიტიკოსთა შორის ყველაზე დიდ პრაგმატიკოსად შინეული (ამ ნარკვევის დასასრულს ჩვენ შევეცდებით სხვანაირი კვალიფიკაციაც წარმოვადგინოთ) იოსებ ჯუღაშვილიც თავისი ცხოვრების გზაზე საკმაოდ ხშირად ვვევლინებოდა იდეალისტის როლში. როდესაც საქართველოდან მიდის და თავის ძალებს საერთო სარუსეთო ასპარეზზე ცდის, იგი არ არის პრაგმატიკოსი — ასეთი რომ ყოფილიყო, იგი საქართველოში დარჩებოდა და მთელ სიცოცხლეს პოლიტიკურ მოწინააღმდეგეებთან უაზრო პოლემიკაში გაატარებდა, შედეგად ყველაზე დიდი, რასაც ამ შემთხვევაში მიაღწევდა, რომელიმე ქართული გაზეთის რედაქტორობა და რუსეთის სახელმწიფო სათათბიროს წევრობა იქნებოდა. რუსეთში (სსრ კავშირში) ქვეყნის პოლიტიკური ლიდერობისათვის მებრძოლი სტალინიც იდეალისტი იყო. წინააღმდეგ შემთხვევაში, ტროცკის, კამენევის, ზინოვიევის, ბუხარინის გზიდან ჩამოცილებაზე და პირველკაცობაზე არ იფიქრებდა და ეროვნებათა საქმის სახალხო კომისრის რანგით დაკმაყოფილდებოდა.

და ბოლოს (თუმცა ეს სხვა თემაა): მსოფლიო რელიგიების შექმნაში პრაგმატიზმის ნატამალიც არ შეიძლებოდა ყოფილიყო. პრაგმატიკოსი საერთოდ ვერ შექმნის ვერავითარ რელიგიას, მით უმეტეს — მსოფლიოს, ერთი უბრალო მიზეზის გამო: მას ხალხი არ გაჰყვება, ხალხს მისწრაფება იდეალურისკენ აქვს. და ასეთად ადამიანი მამაზეციერმა შექმნა. ქრისტიანობის (მართლმადიდებლობის, კათოლიციზმის) და ისლამის პრაქტიკული არსებობა — ეს არის პრაგმატიზმის უარყოფის და იდეალურის ხორცშესხმისკენ დაუცხრომელი სწრაფვის გამოხატულება.

იდეალურისკენ პერმანენტული ლტოლვის კიდევ ერთი ნიმუშია კომუნისმის იდეა. პრაგმატიკოსთა მარცხი, ან ამ იდეის სხვა მიზნებისთვის გამოყენება აქ არავითარ არგუმენტს არ ქმნის — იგი მაინც რჩება და დარჩება იდეალურისკენ სწრაფვად, რის უფლებასაც ადამიანს და კაცობრიობას ვერავინ წაართმევს. ეს იდეა ცხოველმყოფელია (და ამიტომ — საჭირო) იმ შემთხვევაშიც, როდესაც სხვა რიგის

პრაგმატიკოსები ხედავენ მის ირრეალობას, ცხოველმყოფელია იმი-
ტომ, რომ ადამიანს სჭირდება იდეალურისკენ, მათ შორის — განუ-
ხორციელებელი იდეალურისკენ, მუდმივი, დაუსრულებელი სწრაფვა.
მაგრამ ესეც სხვა თემა...

ჩვენ უნდა დავასკვნათ: დიდი ერები, დიდი ქვეყნები, მათი მე-
ფეები, იმპერატორები, პრეზიდენტები და მთავრობები მხოლოდ პრაგ-
მატიზმის წყალობით არ აღწევდნენ წარმატებებს — მათ მიღწევებში
იდეალიზმს, მეტი თუ არა, პრაგმატიზმის ტოლი როლი მაინც ჰქონდა.
უფრო ზუსტად აზრი ჩვენ უკვე ჩამოვაყალიბეთ: პრაგმატიკოსი პო-
ლიტიკოსები, როგორც წესი, იდეალისტი პოლიტიკოსების დაწყებულ
საქმეს და მოპოვებულ შედეგებს იცავენ, ამკვიდრებენ, განაგრძობენ.
პრაგმატიკოსების ტყვეობაში რომ დარჩენილიყო, კაცობრიობა იდეა-
ლურისკენ მისწრაფებაზე დამყარებულ მუდმივ წინსვლას ვერ განა-
ხორციელებდა.

თუ პრაგმატიზმი არ შეიძლება განხილულ იქნას როგორც მრავ-
ალრიცხოვანი ერების ყოველი დიდი წარმატების ერთადერთი მიზე-
ზი, ასევე არ შეიძლება მისი უარყოფა და იდეალიზმის აღიარება ჩა-
ითვალოს მცირერიცხოვანი ერების, კერძოდ ქართველი ერის, ყველა
უბედურების მიზეზად.

ქართველი ერის ეროვნულ-სახელმწიფოებრივი ცნობიერების გა-
დარჩენა და თვით ფიზიკური არსებობის შენარჩუნება შესაძლებელი
გახდა მეტწილად პოლიტიკოსთა იდეალისტური აზროვნების შედე-
გად. ქართველ პოლიტიკოსთა (მეფეები, ერისმთავრები, მთავრები)
აზროვნებასა და მოქმედებაში, რა თქმა უნდა, ძალიან ხშირად ეხვედ-
ბით პრაგმატიზმის გამოვლინებასაც, მაგრამ ამ შემთხვევაში ეს იდე-
ალისტური პოლიტიკური კურსის შენარჩუნების საშუალებას წარ-
მოადგენდა. ქართველი ლიდერები, ქართველი მეფე-მთავრები იდეა-
ლისტები რომ არ ყოფილიყვნენ, ქართველი ერი აუცილებლად გადაგ-
ვარდებოდა, აითქვიფებოდა, გაქრებოდა დიდ იმპერიებთან ჭიდილში.

უფრო მეტიც გვინდა ვთქვათ: ქართული სახელმწიფოს წარმოქ-
მნა (ძვ. წ. აღ. IV-III საუკუნეები) ისეთ გეოპოლიტიკურ არეალში,
როგორსაც ამიერკავკასია წარმოადგენს, თავისთავად იდეალისტური
აზროვნების ნაყოფი იყო.

ძნელია ვერ იპოვო იდეალისტური საწყისები ფარნავაზ პირვე-
ლის მოღვაწეობაში.

იბერიის (ქართლის) მეფე არტაგიც (ძვ. წ. აღ. I საუკუნე) არ იძლევა წმიდა წყლის პრაგმატიზმის მაგალითებს — მაშინ იგი პომპეუსს ყელზე სახელმწიბმული უნდა ხლებოდა. არტაგის პიროვნებაში იდეალიზმმა საბოლოოდ მაშინ გაიმარჯვა, როდესაც იბერიის მეფემ მის მიერვე დამწვარი ხიდი პომპეუსის მოთხოვნით ისევ ააგო, მაგრამ მტერს არ შეურიგდა და ომი გააგრძელა. ჰქონდა თუ არა რაიმე პერსპექტივა პატარა იბერიის ომს რომის უძლიერეს სახელმწიფოსთან? სამხედრო-სტრატეგიული თვალსაზრისით — არაერთი. პოლიტიკური მნიშვნელობა კი ამ ომისა წარმოუდგენლად დიდი იყო: პირველი, ქართველებს უნდა დაემტკიცებინათ, რომ მათი სახელმწიფო არსებობს და მის არსებობას მომავალშიც რეალური საფუძველი აქვს, ხოლო ხალხს სამშობლოს დაცვის დაუოკებელი სურვილი ამოძრავებს; მეორე, რომაელები უნდა დარწმუნებულიყვნენ იმაში, რომ მათ ომი ჰქონდათ არა ვალების ტომებთან, არამედ იმ ხალხთან, რომლის სახელმწიფოებრიობა უკვე მესამე ასწლეულს ითვლის.

ქართველები პრაგმატიკოსები რომ ყოფილიყვნენ, საერთოდ არ დაიწყებდნენ სახელმწიფოებრივ აღმშენებლობას, ხოლო თუ მაინც შექმნიდნენ სახელმწიფოს, შემდეგში აიღებდნენ ხელს მოცემულ გეოგრაფიულ და პოლიტიკურ სივრცეში ცივილიზაციის შექმნაზე, რასაც მომდევნო საუკუნეებში მათი არსებობის შეწყვეტა მოჰყვებოდა.

რა თქმა უნდა, იმავე არტაგის მოღვაწეობაში პრაგმატული მადგომაც ჩანს. იბერიის მეფემ მის მიერვე დამწვარი ხიდი რომაელთა მოთხოვნით მაინც ააგო. არჩილ ჯორჯაძე აღნიშნავს, რომ ყველა ქართველი პოლიტიკური მოღვაწე გაირებული პიროვნება იყო (კონკრეტულ შემთხვევაში იგი ილია ჭავჭავაძეს გულისხმობდა).

უფრო სრულყოფილად გაორებული პოლიტიკური მოღვაწე შეიძლება დავინახოთ ეგრისის მეფის გუბაზის (VI ს) პიროვნებაში. გუბაზ მეფე რომ ორ დიდ იმპერიას, ბიზანტიასა და ირანს, შორის უაღრესად არახელს ყრელ გარემოში პატარა სახელმწიფოს, ეგრისის, დამოუკიდებლობისთვის ბრძოლაზე ხელს არ აიღებს, — ეს საბოლოოდ, ზოგადად, მაინც პრაგმატიზმის უარყოფის ნიმუშია. გუბაზს არტაგზე ნაკლები შანსი ჰქონდა დამოუკიდებლობის შენარჩუნებისა. ეგრისის მეფე მაინც იბრძვის. ამ ბრძოლას იგივე პოლიტიკური მნიშვნელობა ჰქონდა, რაც არტაგის ბრძოლას, და შედეგებიც იგივე მოჰყვა. გუბაზ მეფეს ბიზანტიელებიც სძულდა და ირანელებიც —

ქართველთა მოდემისთვის ორივე ერთნაირად საშიში იყო. ამიტომ მისი ტაქტიკა პრაქტიკოსის ტაქტიკაა. გუბაზის დგომა ბიზანტიელთა მხარეზე ამ ტაქტიკით იყო გაპირობებული. პოლიტიკური ორიენტაციის შეცვლის დროსაც გუბაზი ამავე მოსაზრებით ხელმძღვანელობდა. ეგრისის სახალხო კრების გადაწყვეტილება ასევე პრაგმატიზმის ნაყოფია.

აქ რამდენიმე დასკვნის ფორმულირებაა საჭირო: პირველი, პრაგმატული პოლიტიკით გუბაზ მეფე და ეგრისის სახალხო კრება იდეალისტური პოლიტიკის ნაყოფის — ეგრისის სახელმწიფოს არსებობის — შენარჩუნებას ცდილობდნენ; მეორე, მრავალრიცხოვან ერებში პრაგმატული პოლიტიკა იდეალისტური პოლიტიკის ნებაყოფლობითი (უცხო ძალის ზემოქმედების გარეშე) უარყოფის ფონზე ყალიბდება და ხოლმე, როგორც სრულიად ბუნებრივი, არა ხელოვნურად თავსმოხვეული მოვლენა. ქართულ სინამდვილეში იდეალისტური პოლიტიკის შეცვლა პრაგმატულით ხშირად იძულებითი (უცხო ძალის ზემოქმედებით) ხდებოდა და, ამდენად, არა ბუნებრივ, არამედ ინსპირირებულ მოვლენას წარმოადგენდა.

შეიძლება შემდეგი ზოგადი დასკვნის ფორმულირებაც: მრავალრიცხოვან ერებში პრაგმატიზმისა და იდეალიზმის დაპირისპირება სტრატეგიის სფეროში მიმდინარეობდა, ქართველი ერისათვის ეს ტაქტიკის სფერო იყო.

ქართველი პოლიტიკოსებისთვის იდეალიზმი რომ სტრატეგია იყო, ხოლო პრაგმატიზმი — ტაქტიკა, ეს კარგად ჩანს ვახტანგ გორგასლის (V საუკუნის მეორე ნახევარი — VI საუკუნის დამდეგი) მოღვაწეობაში. როდესაც ახალგაზრდა გორგასალი თავის ლაშქართან ერთად ირანის მოთხოვნით შუა აზიისა და ინდოეთის ლაშქრობებში მონაწილეობს, ეს პრაგმატული პოლიტიკის გამოხატულებაა. ახლა ზუსტად ძნელი სათქმელია, რა მოუტანა ქართველთა მეფეს ამ ტაქტიკურმა სვლამ (ალბათ ტახტის შენარჩუნება), მაგრამ ცხადია, რომ საბოლოოდ პრაგმატიზმში ვახტანგ გორგასალმა საქართველოს ხსნა ვერ დაინახა — ქვეყნის ხსნის სტრატეგიულ ხაზად მეფემ ირანის წინააღმდეგ შეურიგებელი ბრძოლა აღიარა. სხვა აზრისა რომ ყოფილიყო, ვახტანგ გორგასალი ირანის წინააღმდეგ ომს ვერ გაბედავდა და გულხელდაკრეფილი დაელოდებოდა მოვლენათა განვითარებას. მან, რა თქმა უნდა, კარგად იცოდა, რომ სამხედრო თვალსაზრისით ომის ზედი წინასწარვე განწირული იყო. მაგრამ საბოლოო გადაწყვეტილება

მას უკვე ჰქონდა მიღებული: პრაგმატული პოლიტიკა დაღუპავდა საქართველოს. ამიტომ მოაკვლევინა მეფემ ის, ვინც საპირისპიროდ აზროვნებდა — ვარსკენ პიტიახში. ვახტანგ გორგასალი ირანთან ბრძოლაში დამარცხდა და დაიღუპა, მაგრამ სწორედ ირანის წინააღმდეგ ომში იქნა შენარჩუნებული და განმტკიცებული ეროვნულ-სახელმწიფოებრივი ცნობიერება. ვახტანგ გორგასალმა შეურიგებელი ბრძოლით გადააჯადა მომდევნო ეპოქაში განხორციელებული ისეთი დიდად უარყოფითი მოკლენა, როგორც იყო მეფობის გაუქმება ქართლში. პრაგმატული პოლიტიკით ვახტანგ გორგასალი უკეთეს შედეგს ვერ მიაღწევდა: მეფობა ქართლში მაინც გაუქმდებოდა, და თუ არ გაუქმდებოდა, ქვეყანა სულ მალე ვარსკენ პიტიახშისთანა პრაგმატიკოსების ხელში აღმოჩნდებოდა, რაც არანაკლებ საშიში იყო. მაგრამ ამასთან ერთად აღარ გვექნებოდა ძლიერ დამპყრობელთან თავგანწირული ბრძოლის დიდი ეპოქა, რომელიც საუკუნეების შემდეგაც კვებავდა ქართულ ეროვნულ აზროვნებას.

პრაგმატული პოლიტიკა საქართველოსთვის ზოგჯერ უბრალოდ უშედეგო და უაზრო კი არ იყო, არამედ საშიშვც ეროვნული თვითმყოფადობის გადარჩენის თვალსაზრისით. დავით კუროპალატის პრაგმატული (პრობიზანტიური) პოლიტიკა, რომელიც მემკვიდრეობით მიიღო ბაგრატ მესამემ (975—1014), გამართლებული იყო: ბიზანტიას შეეძლო ხელი შეეშალა საქართველოს გაერთიანებისთვის. მაგრამ მალე პრობიზანტიური პოლიტიკის დადებითი შედეგები დაჩრდილა უარყოფითმა — ბიზანტია იმპერია იყო და მეზობლად ძლიერ ქართულ სახელმწიფოს ვერ მოითმენდა. ბაგრატ მესამის პრაგმატული პოლიტიკა შეცვალა გიორგი პირველის (1014—1027) იდეალისტურმა პოლიტიკამ. გიორგი პირველმა კარგად იცოდა, რომ ბიზანტიასთან კონფრონტაცია და მითუმეტეს ომი საქართველოსთვის უპერსპექტივო იყო. გიორგი პირველს სხვა მიზანი ჰქონდა: საქართველოს უნდა დაემტკიცებინა — დაემტკიცებანა მთელი იმდროინდელი პოლიტიკურად აქტიური მსოფლიოსთვის, — რომ იგი ბიზანტიის პროვინცია არ იყო. წაგებული ომის მიუხედავად, გიორგი პირველმა ეს დაამტკიცა, რიგობა დიდი სამსახური გაუწია ქართველთა ეროვნული ცნობიერების განმტკიცებასა და საქართველოს მომავალს.

კარგად ხედავდა თავისი მამის, გიორგი მეორის (1072—1089), პრაგმატული პოლიტიკის უარყოფით შედეგებს დავით აღმაშენებელი — ქვეყანა ფაქტიურად დაღუპვის პირად იყო მისული. მაგრამ პრაგმა-

ტული პოლიტიკის უარსაყოფად ჯერ დრო იყო საჭირო და რეალური, თუნდაც მცირე, არგუმენტების დაგროვება. პრაგმატულს ვერაინ უწოდებს დავით აღმაშენებლის მიერ თურქ-სელჩუკებისათვის ხარკის პიცემაზე უარის თქმას, რაც უზარმაზარი იმპერიისთვის ომის გამოცხადებას ნიშნავდა. დავით აღმაშენებლის იდეალისტური პოლიტიკა, პირველ რიგში, გიორგი მეორის პრაგმატული პოლიტიკის მარცხმა განსაზღვრა. მიუხედავად იმისა, რომ თურქ-სელჩუკებთან ომში საქართველოს მეფეს წარმატებას ყველაზე დიდი ოპტიმიზტებიც ვერ უწინასწარმეტყველებდნენ, ქვეყნის ხსნის სხვა გზას დავით აღმაშენებელი ვერ ხედავდა. ის, რაც საქართველომ დავით აღმაშენებლის იდეალისტური პოლიტიკით მიიღო, ვერ მიიღებდა ვერავითარი პრაგმატული ნაბიჯებით. ეს მაქსიმუმი იყო — პრაგმატიკა მაქსიმუმზე არ არის გათვლილი. თუმცა არც დავით აღმაშენებელი და არც თამარ ჭეფე არ უგულებელყოფდნენ პრაგმატიზმის საჭიროებას, ქრისტიანული და მაკმადიანური სამყაროს შესაყარზე არსებული პატარა ქვეყნის მეფეები ხშირად იძულებულნი იყვნენ ანგარიში გაეწიათ რეალობისათვის; ასე წარმოიშვა, მაგალითად, ქართული ტოლერანტობა.

ამიერკავკასიაში ჰეგემონიისათვის ირანისა და თურქეთის (ოსმალეთის) ხანგრძლივი მეტოქეობის პერიოდში (XVI-XVIII საუკუნეები), რასაც მოგვიანებით (XVIII საუკუნე) რუსეთის ჰეგემონისტური მისწრაფებებიც დაერთო, მთელი სისრულით გამოვლინდა ქართველ პოლიტიკოსთა აზროვნებაში იდეალიზმისა და პრაგმატიზმის დაპირისპირება. იდეალისტური პოლიტიკის ერთგულების შესანიშნავი ნიმუშია ქართლის მეფეების ლუარსაბ პირველის (1527—1556) და სიმონ პირველის (1556—1569, 1578—1600) მოღვაწეობა. უზარმაზარ იმპერიებს შეჭიდებული ეს მეფეები წინასწარვე განწირულნი იყვნენ, მაგრამ, მიუხედავად ამისა, მიუხედავად მრავალი მარცხისა, მათ დიდი ბრძოლა საქართველოსა და ქართველობის გადასარჩენად ღინც მოიგეს. დღევანდელი გადასახედიდანაც კი ძნელია ლუარსაბის და სიმონის იდეალისტური პოლიტიკის საპირისპირო პრაგმატული პოლიტიკის განსაზღვრა. ქართლის მეფეებს არჩევანი არ ჰქონდათ: მათ თავი უნდა გაეწირათ და გასწირეს კიდეც. მაგრამ გასწირეს არა უბრალოდ პატრიოტიზმისათვის, არამედ იმ მაქსიმალისტური იდეისათვის, რომლის ერთგულებაშიც წყვეტილობისა და ვაკუუმის გაჩენა ისტორიის გზაზე საქართველოს სახელმწიფოებრიობისთვის მომაკვდინებელი იყო. ალბათ ლუარსაბ პირველისა და სიმონ პირველის

თავგანწირული ბრძოლის შედეგიც იყო ის, რომ ქართლი სამცხის მსგავსად თურქეთის ან ირანის პროვინციად არ იქცა. სამცხე ქართლთან შედარებით კიდევ უფრო უიმედო მდგომარეობაში იმყოფებოდა, მაგრამ ისიც ცხადია, რომ სამცხის გადაქცევას თურქეთის პროვინციად სამცხის მთავრების პრაგმატულმა პოლიტიკამ შეუწყო ხელი.

სამცხის მაგალითი დიდი გაფრთხილება უნდა ყოფილიყო ქართველი მეფე-მთავრებისთვის. აუცილებელი იყო ერთმანეთისაგან გამიჯნულიყო პრაგმატიზმი, რომელიც, გარკვეული დათმობების მიუხედავად, საფრთხეს არ უქმნიდა ეროვნულ ცნობიერებას, ეროვნულ თვითმყოფადობას და სახელმწიფოებრივ მომავალს, და პრაგმატიზმი, რომელიც სრული და უაზრო კაპიტულაციის გზით საფრთხეს უქმნიდა ქართულ სახელმწიფოებრიობას.

ჩვენ უკვე აღვნიშნეთ, რომ ქართულ პოლიტიკურ აზროვნებაში პრაგმატიზმს უცხო ძალა (დამპყრობელი) ნერგავდა ინტენსიურად; ძას საქართველოს უიმედო მდგომარეობაც ასაზრდოებდა. თუ ქართველი მეფე უარს იტყოდა პრაგმატულ პოლიტიკაზე, დამპყრობელი უფრო რადიკალურ საშუალებას მიმართავდა. ასეთი საშუალება იყო ქრისტიანი მეფის ნაცვლად ტახტზე გამაჰმადიანებული ბაგრატიონის დასმა. სიმონ პირველის დატყვევების შემდეგ ირანის შაჰმა ქართლი მის გამაჰმადიანებულ ძმას დაუდ-ხანს (1569—1578) ჩააბარა. იგივე ხერხი ირანის შაჰმა 1632 წელს კვლავ გამოიყენა — ამჯერად ქართლის ტახტი სიმონ პირველის ძმის შვილმა ხოსროვ მირზამ—როსტომ-ხანმა (1632—1658) დაისაკუთრა. დინამიკაში სამეფო სახლის წინააღმდეგობის შესუსტების კვალობაზე, პრაგმატული პოლიტიკის გარდაუვალობას ნელ-ნელა აპყვნენ ქართველი ფეოდალები — ეს ცხადად დადასტურდა 1632 წელს, როცა ქართლის თავადებმა როსტომხანს დაუჭირეს მხარი, ხოლო თეიმურაზ პირველი იძულებული შეიქნა იმერეთში გახიზნულიყო.

ძნელი დასადგენი არ უნდა იყოს, რომ ყბადაღებული ქართული ფეოდალური პარტიკულარიზმი გარკვეულწილად დამპყრობთა მიერ დანერგილი პრაგმატული აზროვნების შედეგიც იყო.

ქართული სამეფო-სამთავროების დასუსტების შედეგად (XVII—XVIII საუკუნეები) დამპყრობლები პრაგმატული აზროვნების დამკვიდრების უფრო ძლიერ საშუალებას მიმართავდნენ. ქართლისა და კახეთის მეფეებს ტახტზე ასვლის აუცილებელ პირობად უყენებდნენ

ქრისტიანობის უარყოფასა და გამაჰმადიანებას. გამაჰმადიანებული ქართველი მეფეები მეტწილად დამპყრობლის (ირანის) მოხელეების როლში გამოდიოდნენ და, ამდენად, პრაგმატიზმს ნერგავდნენ ფეოდალთა კლასშიც და მთელ მოსახლეობაშიც.

XVII საუკუნის დამდეგიდან კახეთის სამეფო დაკნინებას იწყებს — იგი დააქციეს ჯერ შაჰ-აბას პირველის, შემდეგ შაჰ-აბას მეორის ლაშქრობებმა. ამ ეპოქის პრაგმატული პოლიტიკა, ცხადია, ქართველ პოლიტიკოსთა იძულებით ნაბიჯს წარმოადგენდა, მაგრამ ისიც ცხადია, რომ ეს პოლიტიკა კახეთს სრული გადაგვარების საფრთხეს შეუქმნიდა. არ იყო გამორიცხული, რომ კახეთის სამეფო სამცხის სამთავროს ბედს გაიზიარებდა.

ქართველ პოლიტიკოსთა პრაგმატული პოლიტიკის წინააღმდეგ პროტესტს წარმოადგენდა ქეთევან დედოფლის მოწამებრივი აღსასრული (1624 წ.). ბიძინა ჩოლოყაშვილი, ელიზბარ და შალვა ქსნის ერისთავები სწორედ პრაგმატული პოლიტიკური აზროვნების ბატონობის ეპოქაში უარყოფენ მას ხელაღებით და ირანის წინააღმდეგ აჯანყებას ბედავენ. მხოლოდ ასეთ იდეალისტურ პოლიტიკას შეეძლო კახეთის გადარჩენის საქმის დაწყება.

ქეთევან დედოფლის მოწამებრივი სიკვდილისა და ბახტრიონის აჯანყების მიუხედავად, XVII საუკუნე მაინც პრაგმატიკოს პოლიტიკოსთა ეპოქა იყო.

უნდა აღინიშნოს აქვე ისიც, რომ, თუ წინათ პრაგმატიზმი (ეთქვათ, იბერიის მეფის არტაგისა, ან ეგრისის მეფის გუბაზისა, თუნდაც ვახტანგ გორგასლისა) იდეალისტური აზროვნების ნაყოფის (ქართული სახელმწიფოებრიობის) გადარჩენას ისახავდა მიზნად, XVII—XVIII საუკუნეების პრაგმატიზმი (ეთქვათ, ქართლის მეფის — ვახტანგ მეხუთე შაჰნავაზისა, ან კახეთის მეფის — დავით მეორე იმამყული-ხანისა) არ იყო გათვლილი მასშტაბურ ამოცანაზე და, საბოლოოდ, ქართულ ეროვნულ ცნობიერებას და ქართულ სახელმწიფოებრიობას საფრთხეს უქმნიდა. ამგვარი პრაგმატიზმის ტყვეობაში გაატარეს ცხოვრება ქართლის მეფეებმა ვახტანგ მეხუთე შაჰნავაზმა (1658—1675), გიორგი მეთერთმეტემ (1676—1688, 1703—1709) და ერეკლე პირველმა ნაზარ-ალი-ხანმა (1688—1703), კახეთის მეფეებმა დავით მეორე იმამყული-ხანმა (1703—1722) და კონსტანტინე მეორემ (1722—1733). ვახტანგ მეექვსეშემაც კი (1703—1724), თუმცა, რაც ქართლის ჯანიშინმა და მეფემ პოლიტიკური პრაგმატიზმით

ქვეყანას აენო, ასეზის აუნაზღაურა დიდი კულტურულ-საგანმანათლებლო და სამეცნიერო მოღვაწეობით; რაც მთავარია, ირანის წინააღმდეგ ამბოხებით ვახტანგ მეექვსემ სცადა ზღვარი დაედო ხანგრძლივი პრაგმატული აზროვნებისათვის ქართულ სინამდვილეში.

ვახტანგ მეექვსის პოლიტიკის მარცხმა კვლავ პრაგმატიზმისკენ უბიძგა კახეთის ბაგრატიონებს — თეიმურაზ მეორეს და მის შვილს ერეკლე მეორეს. ირანის დასუსტების ფონზე კახეთის ბაგრატიონების პრაგმატული პოლიტიკა მომგებიანი იყო. მომგებიანი ჩანდა იგი არა მარტო იმიტომ, რომ თეიმურაზმა და ერეკლემ კახეთისა და ქართლის ტახტები ირანის შაჰის ნებით მიიღეს, ხოლო ერეკლე ქართლ-კახეთის მეფე ასევე ირანის დასტურით გახდა. მთავარი აქ ის იყო, რომ ირანის შაჰმა უკან დაიხია და თეიმურაზს ნება დართო ქრისტიანული წესით დაედგა გვირგვინი მცხეთის სვეტიცხოვლის ტაძარში (1745 წ.) ეს არ იყო მხოლოდ სიმბოლური აქტი. მალე ირანის ნებით თეიმურაზმა და ერეკლემ ყმადნაფიცობის უფლებით მიიღეს განჯის, ერევნისა და ნახჭევანის სახანოები. უფრო დიდი მნიშვნელობა აქონდა იმას, რომ ქართლმა და კახეთმა თავიდან აიცილეს დამლუპველი ომები ირანთან (1795 წლამდე) და თურქეთთან. ყოველივე ამის სანაცვლოდ, არც თეიმურაზ მეორეს და არც ერეკლე მეორეს ეროვნული ცნობიერების, ეროვნული თვითმყოფადობის საზიანოდ პრაქტიკულად არაფერი დაუთმიათ.

რამდენადაც წარმატებული იყო თეიმურაზისა და ერეკლეს პოლიტიკა ირანისა და თურქეთის მიმართ, იმდენად წარუმატებელი გამოდგა ასეთივე პრაგმატული პოლიტიკა რუსეთის მიმართ. ერეკლე მეორემ ვერ გაითვალისწინა, რომ რუსეთის იმპერატორი ეკატერინე მეორე და მისი კარისკაცები — საგარეო პოლიტიკის მესვეურები — უსაშველო პრაგმატიკოსები იყვნენ და, თუ რუსეთის სახელმწიფოს ინტერესები არ მოითხოვდა, ერთი ჯარისკაცის სიცოცხლესაც არ გამოიმეტებდნენ ქართლ-კახეთის დასაცავად. ძალა და ინიციატივა ჩრდილოელი მეზობლის ხელში იყო. როცა ერეკლე მიხვდა, რომ რუსეთისგან რეალურ დახმარებას ვერ მიიღებდა, ხოლო ირანი და თურქეთი გაანაწყენა, სცადა ლავირების დაწყება: თავიდან ჩაღმა არ მოუხდია, ისე მიიბნია მკერდზე რუსული ორდენი, რითაც პრაგმატიზმი უმაღლეს რანგში აიყვანა. მაგრამ მოვლენები უკვე მისგან დამოუკიდებლად ვითარდებოდა: რუსი პოლიტიკოსებისთვის ერეკლე მეორის

თამაში ამოცნობილი იყო; ერეკლეს ჩანაფიქრი გაშიფრა ირანისა და თურქეთის დიპლომატიამაც. სწორუპოვარმა სარდალმა წააგო...

რა თქმა უნდა, კატასტროფას, საერთოდ, ბევრი მიზეზი განაპირობებდა. ამ ნარკვევში მთავართაგან ორი ურთიერთდაკავშირებულის დასახელება შეიძლება: პირველი — საქართველოში იდეალისტური პოლიტიკური აზროვნების ტრადიციების მივიწყება (თუნდაც — დროებითი); მეორე — ქვეყნის დაქუცმაცება, რაც იდეალისტური, იერარქიულად ყველაზე მაღალი, ამოცანის დაქუცმაცებასა და დაკნინებას ნიშნავდა...

ქართული სახელმწიფოებრიობა ისტორიის კუთვნილება გახდა.

დრო განსჯისათვის ქართველ პოლიტიკურ მოღვაწეებს საკმაოდ ჰქონდათ, მთელი 117 წელი — 1801 წლიდან 1918 წლამდე. საუკუნეზე მეტი ქართულ სინამდვილეში, ქართულ პოლიტიკურ აზროვნებაში ერთმანეთს ებრძოდა იდეალიზმი და პრაგმატიზმი. XIX საუკუნის პირველი ნახევრის შეთქმულებები და აჯანყებები პრაგმატიზმის უარყოფას წარმოადგენდნენ. პროცესი ახალ სტადიაში შედის XIX საუკუნის 60-იანი წლების დამდეგიდან. როდესაც ილია ჭავჭავაძე ხაზს უსვამდა — „ჩვენი თავი ჩვენადვე გვეყუდნეს“, იგი ტრადიციული ქართული იდეალიზმის გამგრძელებლად გვევლინებოდა. როდესაც ილია აჯანყებისაკენ არ მოუწოდებდა ერს, იგი პრაგმატიკოსი იყო. მაგრამ პრაგმატიზმი მისთვის ტაქტიკა იყო და არა სტრატეგია; სტრატეგია გამოკვეთილი იყო — საქართველოს გადარჩენა და მისი სახელმწიფოებრიობის აღდგენა. და ილია რეალური ნაბიჯების გადადგმას შეუდგა.

1918 წლის 26 მაისს საქართველოს სახელმწიფოებრივი დამოუკიდებლობის აღდგენა ტრადიციული ქართული იდეალისტური პოლიტიკის გამარჯვების მომასწავებელი იყო.

დიდი ქართველი პოლიტიკოსები იდეალისტები იყვნენ მეტწილად: სახელმწიფოს შემქმნელი ფარნავაზ პირველი, რომთან მებრძოლი იბერიის მეფე არტაგი, ორი დიდი იმპერიის აგრესიისაგან ეგრისის გადარჩენისათვის მოღვაწე გუბაზ მეფე, ირანის წინააღმდეგ აღმდგარი ვახტანგ გორგასალი, ურიცხვ მტრებთან ბრძოლაში დაღუპული არგვეთის მთავრები დავითი და კონსტანტინე, ბიზანტიის იმპერიას შებმული გიორგი პირველი, დიდგორის ველზე საომრად გასული დავით აღმაშენებელი, თანამოაზრეთათვის თავგანწირული ცოტნე დადიანი, მონღოლთა წინააღმდეგ აჯანყებული ულუ დავითი, თემურ-

ლენგის ურიცხვ ლაშქარს შებრძოლებულნი — ბაგრატ მეხუთე და გიორგი მეშვიდე, დამპყრობლებთან უიმედო ჭიდილში ჩაბმულნი — ლუარსაბ პირველი და სიმონ პირველი, მღვდელი თევდორე, მარტყოფისა და მარაბდის გმირები, ქეთევან დედოფალი, ბიძინა ჩოლოყაშვილი, შალვა და ელიზბარ ქსნის ერისთავები, 1832 წლის შეთქმულების მონაწილენი, „მეზავრის წერილების“ ავტორი და სხვები, და ბოლოს საქართველოს ეროვნული საბჭო, რომელმაც 1918 წლის 26 მაისს საქართველოს დამოუკიდებლობა გამოაცხადა.

მათ გვერდით იყვნენ პრაგმატიკოსები, რომელთაც თავიანთთვის განკუთვნილი, მნიშვნელოვანი, ფუნქცია ჰქონდათ. (იყვნენ, რა თქმა უნდა, ცრუიდეალისტებიც და ცრუპრაგმატიკოსებიც).

ეს არის ქართველი ერის ისტორია, მისი მაგისტრალური ხაზი...

საქართველოს დემოკრატიული რესპუბლიკის მთავრობის იდეალისტური პოლიტიკა მარცხით დამთავრდა. ამ პოლიტიკის ზორც-შესხმისათვის ქართველებს იმჯერად არ გვიყო ძალები. 1921 წლის თებერვალ-მარტში საქართველოს კვლავ პრაგმატიკოსი ქართველები დაეპატრონნენ...

მაგრამ, შესაძლოა, ჩვენ მთლად ზუსტნი არ ვართ. შესაძლოა, უფრო ზუსტი ასეთი ფორმულირება იქნება: 1921 წელს დამარცხება წინასწარ იყო ობიექტურად უანაპირობეული, განაპირობა იგი იმ გარემოებამ, რომ წინამავალი დიდი მარცხის შემდეგ გამარჯვებისათვის დრო ვერ არ იყო დამდგარი, ის გამარჯვება, როგორც დამაგვირგვინებელი ეტაპი, არ იყო შედეგი შინაგანი, ბუნებრივი განვითარებისა — იგი ჩვენს გარეთ განხორციელებულმა დროებითმა განვითარებამ მოიტანა; ეს ქმნიდა გარკვეული ხელოვნურობის მომენტს, რაც რეალობაში იმაში მდგომარეობდა, რომ ქვეყანა თვითონ, შინაგანად, ვერ არ ოწო მომზადებული ამ ეტაპისათვის, არც გარეთ იყო შექმნილი შესაბამისი პირობები, სხვა სიტყვებით — გამარჯვება ნაადრევი იყო. პრაგმატიკოსების მოსვლა ბუნებრივი იყო.

როგორც ჩანს, პრაგმატიკოსები ორ შემთხვევაში მოდიან ბუნებრივად. პირველი — როდესაც განხორციელდება იდეალისტების მიერ ჩაფიქრებული და დაწყებული საქმე, და დგება სტაბილიზირების, მოპოვებულის შენარჩუნებისა და განმტკიცების ამოცანა. მეორე — როდესაც ამ საქმის დაგვირგვინება დროზე ადრე ხორციელდება, რაც მარცხს იწვევს, და დგება იდეისა და შესაბამისი გეგმის შენარჩუნე-

ბის ამოცანა, რასაც ტაქტიკური უკანდახევისა და დათმობების ეტაპი მოაქვს. ორსავე შემთხვევაში იდეალისტური, ე. ი. მაქსიმალისტური განაგარიშებული, პოლიტიკა არააქტუალური ხდება, ოღონდ პირველ შემთხვევაში — იმის გამო, რომ იგი მიღწეულია, მეორე შემთხვევაში — იმის გამო, რომ იგი ამ ეტაპზე არარეალურია. ამიტომ, თუ უფრო ზუსტნი ვიქნებით, პირველ შემთხვევაში იდეალისტურ პოლიტიკას პრაგმატული ცვლის, მეორე შემთხვევაში — იდეალისტებს ცვლიან პრაგმატიკოსები.

საქართველოში მაშინ პრაგმატიკოსებმა აიღეს ინიციატივა ხელში. უფრო სწორედ — საქართველოსთვის, რადგანაც ამ პოლიტიკის ავტორი და რეალიზატორი მოსკოვში მყოფი იოსებ სტალინი იყო.

თუ მთელი ეს მჯელობა სწორია, მაშინ ჩვენ, ერთი მხრივ, კარგად გვემის ოპონენტების ემოციები, მაგრამ, მეორე მხრივ, უნდა გავაკეთოთ სამწუხარო კონსტატაცია, რომ ის კონკრეტული რეალობა, რომელმაც ერთ-ერთი შედეგი შექმნა და ათასობით ადამიანის პირად ტრაგედიაში გამოიხატა, ისტორიისათვის და იდეალისტური პროგრამისათვის პროცესის მხოლოდ დანახარჯებს წარმოადგენს, — ასეთია, სამწუხაროდ, ყველა ისტორიული პროცესის, კერძოდ — მაქსიმალისტური გეგმის განხორციელების სქემის, არსი: უდანახარჯებოდ და უდანაკარგებოდ იგი არ განხორციელდება, მისი რეზულტატები მომავალს ეკუთვნის და არა აწყმოს, იგი დაუნდობელიცაა. ისტორიამ, კერძოდ — საქართველოს ისტორიამაც, სტალინის გარდა პრინციპული პროგრამის განმახორციელებელთაგან სხვა დაუნდობელი ფიგურებიც იცის.

ყველაფერი ეს ნიშნავს არა იმას, რომ სტალინი ჟორდანიას პრინციპული მოწინააღმდეგე იყო, არამედ იმას, რომ ორივეს ერთი საბოლოო მიზანი ჰქონდა, ოღონდ — აბსოლუტურად განსხვავებული ტაქტიკა; თავისას განახორციელებდა ის, ვინც მეორეს არ დაუტოვებდა განხორციელების შანსს.

რა განაპირობებდა პრაგმატული (დროებითი) მოქმედების აუცილებლობას?

1. საქართველოს და ქართველობის იდეის გადარჩენის საქმე წინა თაობამ — ილია ჭავჭავაძემ და მისმა თანამებრძოლებმა — განახორციელა: ქართველი ერი, როგორც ერთი საერთო ინტერესით მოაზროვნე ერთიანობა, აღორძინებული იყო; 1918 წელს არსებობდა სრულიად საქართველოს ცნება. მაგრამ, მეორე მხრივ, ეს ვითარება,

პირველ ყოვლისა, განეკუთვნებოდა პოლიტიკური აზროვნების სფეროს, რაც შეეხება მთლიანად ქართველობას, ყველა კუთხეს, ყოველ ელემენტს, მთელ მოსახლეობას (და ბოლოს, ყველა მოქალაქეს, ეროვნების მიუხედავად), აქ ჯერ კიდევ იყო დასაძლევნი სიძნელეები, კერძოდ: ა) კუთხური გაუცხოების ნაშთები, ბ) სოციალური დიფერენცირების ელემენტები, გ) სხვატომელთა მენტალიტეტი. საბოლოოდ, ერის და ქვეყნის პრაქტიკული გამთლიანება ჯერ კიდევ არ ქმნიდა ისეთი ხარისხის სიმყარეს, როდესაც გარკვეული სიძნელეების, გართულებების შემთხვევაში არასასურველი რეციდივები აღარაა მოსალოდნელი (გავიხსენოთ დღევანდელი მდგომარეობის ზოგიერთი ასპექტი).

2. ქვეყნის რეალურად დამოუკიდებლად ცხოვრებისათვის საჭირო ან სასტარტო პოზიციები ეკონომიკაში, სოფლის მეურნეობაში, საფინანსო და ა. შ. სფეროებში ფაქტიურად ნულოვანი იყო (გავიხსენოთ ისევ — აქაც და ქვემოთაც — დღევანდელი მდგომარეობის ზოგიერთი ასპექტი); ამავე დროს, ამოცანა გულისხმობდა მე-20 ს-ის მიღწევების, ტექნოლოგიების და ა. შ. დონეს; სხვათაშორის, იგივე ამოცანა ედგა კულტურის სფეროსაც.

3. რაც განსაკუთრებით საშიში იყო, რუსეთის 1917 წლის მოვლენების შემდეგ საქართველო უცხო, მძლავრი თუ მეორეხარისხოვანი, ქვეყნების ეგოისტურ პოლიტიკაში გასათამაშებელი ბანქოს ქალაღი შეიქმნა. აქ არა მარტო რუსეთისა და თურქეთის უშუალო ინტერესების განსახორციელებელი პოლიგონი იყო, — აქ მოქმედებდნენ ევროპული ინტერესებიც, ადგილობრივი, მეზობელი ქვეყნების, ინტერესებიც, იყო ინტერესთა გადახლართვაც, იყო შეჯახებაც. საქართველო ფაქტიურად პასიური დამკვირვებლის როლში შეიძლება აღმოჩენილიყო, ხოლო მოსალოდნელ შედეგებში ტერიტორიების დაკარგვაც იგულისხმებოდა, თუ მეტი არა. საბოლოო ამოცანას წარმოადგენდა ტერიტორიის დამკვიდრება — არსებული პრეტენზიების ბლოკირება და მომავლის პრეტენზიების ნეიტრალიზება.

4. კიდევ რამდენიმე ამოცანა: საზღვრების გაწმენდა-გამაგრება — შიგნიდანაც და გარედანაც; დემოგრაფიული პრობლემების მოგვარება ქვეყნის ზოგ რაიონში (მათ შორის — დედაქალაქში) და სხვ.

მთავარ პრობლემას, რა თქმა უნდა, რუსეთის იმპერიული მადა ქმნიდა — მისი მთლიანად უკუგდება ამ ეტაპზე არარეალური ჩანდა (ხოლო გადაჭრითი ცდა — საშიში, პერსპექტივის პოზიციებიდან),

მაგრამ რეალური იყო ამ მადის დაკმაყოფილების ოპტიმალური (ჩვე-
ნი პერსპექტივის ვერმოძსპობი) ვარიანტის მონახვა. ანტანტამ საქარ-
თველო და მთლიანად კავკასია უკვე სცნო რუსეთის ინტერესების
სფეროდ...

ერთი სიტყვით, ახალ ეტაპზე საქართველო შესაქმნელი იყო. ამ-
ოცანას წარმოადგენდა საქართველოს სახელმწიფოს შექმნა არა
ფორმალურად (რაც შეიძლება დროებითი ყოფილიყო), არამედ სა-
ბოლოოდ — უდანაკარგვოდ (ტერიტორიები და ა. შ.) და პერსპექ-
ტივაში შეუქცევადად. ეს იყო პროცესი, დროში განფენილი.

რამდენად სწორად აზროვნებდა სტალინი, ამას საბოლოოდ მო-
მავლის ანალიტიკოსები განსაზღვრავენ, მაგრამ ფაქტია, რომ მან,
ფიგურალურად თუ ვიტყვით, საქართველო ამ ნერვად მიიხსნია, რომე-
ლსაც ჯერ სათბური ესაჭიროებოდა და მხოლოდ შემდეგ — გარეთ,
პაერზე, გამოიტანა. ეს სათბური საბჭოთა კავშირი იყო.

იმ თბონენტთა საყურადღებოდ, რომლებიც გაავლებენ, ერთი
შეხედვით, ჩვენს მსჯელობათა საწინააღმდეგო პარალელებს, ვი-
ტყვით შემდეგს: ერეკლე მეფის და მისი წინამორბედების პრაგმა-
ტიზმმა ჯერ ქართლ-კახეთი, შემდეგ ქვეყანა, როგორც ასეთი, გააუკ-
მა და მომდევნო თაობებს ერთადერთი, ყველაზე კინი, ამოცანა და-
ახვედრა: ქვეყნის, საქართველოს იდეის — ჯერ იდეის — აღორძინე-
ბა; სტალინის პრაგმატიზმი იდეალისტური გეგმის ელემენტი იყო,
მან შექმნა სახელმწიფო: მართალია — საბჭოთა სოციალისტური,
მაგრამ — საქართველოს რესპუბლიკა, რომლის საზღვრები მტკიცედ
იყო გავლებული რუკაზე, ხოლო შიგნით მიმდინარე აღმშენებლობი-
თი, კომპლექსური პროცესები ობიექტურად ამზადებდნენ სუვერე-
ნული არსებობისათვის სასტარტო პოზიციებს.

როგორც ითქვა, ეს პროცესი დროს საჭიროებდა. სხვათაშორის,
დღეს ჩვენ, ამ პროცესის პოზიციებიდან, ჯერ კიდევ დასამტკიცებე-
ლი გვაქვს, რომ დრო, რომელიც საბჭოთა კავშირის დაშლით დასრ-
ულდა, ჩვენთვის და ჩვენი მიზნებისთვის საკმარისი იყო.

პრაგმატული პოლიტიკა, რომელიც 1921 წლიდან ზორციელდ-
ებოდა, შედეგთა ისეთ ჯამს ქმნიდა, როდესაც საბოლოო მიზანი და-
მახსოვრებული იყო (დამახსოვრებული — ერთი კაცის მიერ, სხვები
თავ-თავიანთ ფუნქციებს ასრულებდნენ, ზოგი კარგ საქმეს აკეთებდა,
ზოგი — ცუდს). პრაგმატიკოსი სტალინი მაქსიმალისტურ, გარეშე
თვალისათვის — განუზორციელებელ, ამოცანას ემსახურებოდა, რას-

აც ჩვენ, როგორც მკითხველი დიდი ხანია მიხედვებოდა, იდეალისტურ პოლიტიკურ აზროვნებას ვუწოდებთ.

მცირერიცხოვანი ერების ისტორია თავისი სპეციფიკური კანონზომიერებებით ვითარდება. ქართველ პოლიტიკოსთა იდეალიზმი განპირობებული იყო დღევანდლობამდე ამოსული ჩვენი ისტორიის ერთადერთი მუდმივი პრობლემით: სახელმწიფოებრიობის გადარჩენის — აღდგენისა და შენარჩუნების — პრობლემით; პრაგმატიზმი გარკვეული ეტაპების ტაქტიკა იყო. ძალიან ხშირ შემთხვევაში იდეალიზმს ქვეყნის უიმედო მდგომარეობა კვებავდა, ასევე ძალიან ხშირად პრაგმატიზმს — იძულება, უცხო ძალების ზეწოლა. ყველაფერი ეს ქმნიდა ერის ტრაგედიას. ქართველ ერს ხანგრძლივად, დამშვიდებით არ შეეძლო ეცხოვრა პრაგმატული პოლიტიკით — ამ დროს გადაგვარებისა და სახელმწიფოებრიობის მოსპობის საფრთხე იქმნებოდა. არჩევანი არ არსებობდა. ეს უკვე ქართველ პოლიტიკოსთა ტრაგედია იყო.

და ბოლოს: ჩვენი დღევანდელია ახალ ისტორიულ ზღურბლს ქმნის. ჩვენ შეგვიძლია დავაგვირგვინოთ პროცესი. ჩვენ ისიც შეგვიძლია, რომ ახალი პოლიტიკური აზროვნება შევქმნათ.

დღეს ჩვენ არ უნდა აგვერიოს ერთმანეთში იდეალისტი და ცრუ-პრაგმატიკოსი, ასევე — პრაგმატიკოსი და ცრუიდეალისტი;

დღეს ჩვენ არ უნდა დავარქვათ რეალიებში გარკვეულ პრაგმატიკოსს მტერი, ასევე არ უნდა დავარქვათ მტერი საბოლოო მიზნის რეალობაში დარწმუნებულ იდეალისტს;

დღეს ჩვენი მთავარი ამოცანაა, წინა საუკუნეში აღორძინებულ იდეალისტურ პროგრამას მეორე მარცხიანი რეალიზაცია არ შევუქმნათ. ჩვენ არ უნდა ვათქმევინოთ შთამომავლობას, რომ იდეალისტური მიზნის ხორცშესხმისათვის ძალები არ გვეყო, ხოლო პრაგმატული პოლიტიკა გადაგვარებით დაგვემუქრა. რომ გზა (მესამე?) ქართველმა პოლიტიკოსებმა ვერ იპოვეს...

საქართველო და საბარეოპოლიტიკური ორიენტაციის პრობლემა

„ორ ზღვას შუა ძველისძველად
საომარი იყო ლელო“.

„საქართველოს ისტორია არის მცირერიცხოვანი ერის ისტორია. მცირერიცხოვანმა ერმა თავისი განვითარების შესაბამისი კონცეფცია უნდა შეიმუშავოს. არ იქნება კორექტული ვეძებოთ ჩვენს ისტორიაში ბუნებრივი ეტაპები ზესიძლიერისა და მხოლოდ რაღაც უკუღმართობით განპირობებული სიღუბჭირის საფეხურები. ეს არის ერთი მთლიანი ისტორია მცირერიცხოვანი ერისა, რომლის ფუნდამენტური საზრუნავი ყოველთვის იყო გადარჩენა და თვითმყოფადობის შენარჩუნება, და ამ გზაზე, ერთი მხრივ, ყოველნაირი ეტაპები ბუნებრივი, მეორე მხრივ, არ არის მოსალოდნელი განუზომელი და ყოვლისმომცველი დღესასწაული, როდესაც ეროვნული და პოლიტიკური დარდი და საზრუნავი ამოწურული იქნება, — ამოცანა, მდგარი მცირერიცხოვანი ერის წინაშე, ყოველთვის სპეციფიკურია. (...) საქართველოს ისტორია უმეტესწილად კატასტროფის ან უბედურების საფრთხის წინაშე მდგომი ერის ისტორიაა, რომელსაც გმირული ენერჯის უკიდურესი კონცენტრაცია იხსნიდა ხოლმე, ან სასწაული, მაგრამ — სასწაული კანონზომიერი. და ჩვენი არსებობის -- მცირერიცხოვანი ერის არსებობის — სტრატეგია შესაბამისი იყო.

(...) საქართველოს ისტორია არის იმ მცირერიცხოვანი ერის ისტორია, რომელსაც ყველაზე ხშირად უზღებოდა გამოსავლის გამონახვა ვეშაპთა ჭიდილში და მოვლენათა მისგან დამოუკიდებელ ცულაში. ამიტომ უნივერსალურ სტრატეგიას წარმოადგენდა გონიერი მანევრირება“ (ა. სილაგაძე, „რანი ვყოფილვართ... რანი ვართ... რანი ვიქნებით“. სტატია პირველად დაიბეჭდა 1988 წ. დეკემბერში;

შემდეგ იხ. წიგნში — ა. სილაგაძე, საქართველო 88—90, თბ. 1992, გვ. 28—29).

საყოველთაოდ მიღებული ფორმულით, საქართველოს, როგორც სახელმწიფოს, გეოპოლიტიკურ ადგილს ერთი მთავარი ფაქტორი განაპირობებდა — დასავლეთისა და აღმოსავლეთის, ანუ ქრისტიანულ და მაკმადიანურ სამყაროთა, მიჯნაზე მდებარეობა.

ეს სწორიცაა და არასწორიც. ნოე ჟორდანიას, მაგალითად, მიაჩნდა, რომ ლაპარაკი უნდა იყოს არა მარტო დასავლეთსა და აღმოსავლეთზე, არამედ ჩრდილოეთსა და სამხრეთზეც.

სწორია ეს ფორმულა მხოლოდ იმ შემთხვევაში, თუ, მთელი ისტორიის გლობალური დანახვისას, ამ ფორმულაში უფრო სრულ და ფართე, ზოგად, შინაარსს ვიგულისხმებთ: საქართველო საერთოდ იყო მიჯნაზე; ერთი მხრივ, იგი იყო (და არის) სპეციფიკური ქვეყანა, ორ სამყაროს შორის მდებარე, ორი სამყაროს შეხვედრის ადგილი, გარკვეული სახით — ევრაზიული ცივილიზაციური ხიდი; მეორე მხრივ, მის სახელმწიფოებრივ სახეს და პოლიტიკურ ბედს ყოველთვის — და არა მხოლოდ ქრისტიანობასა და მაკმადიანობას შორის საზღვრის გაჩენის შემდეგ — განაპირობებდა მიჯნაზე ყოფნა, და მას, ამ მიჯნას და ამ საზღვარს, ქმნიდა კომპლექსი გეოგრაფიული, პოლიტიკური, კულტურული, ეკონომიკური შესაყარებისა ისე, რომ სხვადასხვა დროს, სხვადასხვა ეპოქაში, რეალიზაცია იყო მეტ-ნაკლებად სხვადასხვაგვარად აქცენტირებული; მაგრამ ყველა შემთხვევაში ტიპოლოგიურად ერთი იყო — ან უნდა ყოფილიყო — საქართველოს, როგორც სახელმწიფოს, არსებობის ეროვნული კონცეფცია, რომელსაც სწორედ მიჯნის ფაქტორი უნდა გაეთვალისწინებინა; კერძოდ — გაეთვალისწინებინა ორი მთავარი, ღერძული მომენტი: ერთი — დიდ სახელმწიფოთა ინტერესების გადაკვეთა, მეორე — ცივილიზაციის სხვადასხვა დონეთა გადაკვეთა.

კიდევ ერთი, მნიშვნელოვანი საკითხი. განაპირობებულობა აქ ორმხრივი იყო: მიჯნის ფაქტორი, ერთი მხრივ, განაპირობებდა ჩვენი სახელმწიფოს პოლიტიკური აზროვნებისა და პოლიტიკურ ქმედებათა არსს, მეორე მხრივ, განაპირობებდა სხვადასხვა ინტერესთა და ცივილიზაციის სხვადასხვა დონეთა მატარებელი ქვეყნებისა და ხალხების დამოკიდებულებას ჩვენი სახელმწიფოს მიმართ, როგორც შესაყარზე მდებარე და, შესაბამისად, გარკვეული სტრატეგიული გასაღების მფლობელი, ქვეყნის მიმართ.

რაც შეეხება გახალისებს, მისი კონკრეტული, მატერიალიზებული გამოხატულება იყო ორ ზღვას შორის ყოფნა და დარიალის კარის მფლობელობა.

თავდაპირველად (ძვ. წ. აღ. I ათასწლეულის შუა ხანები — ახ. წ. აღ. პირველი საუკუნეები) ჩვენს სახელმწიფოებრივ ბედს მნიშვნელოვნად განსაზღვრავდა ერთი სერიოზული ფაქტორი — ჩამორჩენილი, ეელურ მდგომარეობაში მყოფი, მომთაბარე, სახელმწიფოებრიობის არმქონე ჩრდილოეთის და განვითარებული, სახელმწიფოებრიობის მქონე, ეკონომიკურად და კულტურულად დაწინაურებული სამხრეთის (ახლო აღმოსავლეთის) საზღვარზე არსებობა. ამ ფაქტორმა სერიოზული პრობლემების წინაშე დააყენა ქართველ ტომთა უძველესი სახელმწიფოებრივი გაერთიანებები — დიაოხი და კოლხა (ძვ. წ. აღ. II ათასწლეულის დასასრული — I ათასწლეულის შუა ხანები).

აღმოსავლეთის უძველესი ცივილიზაციის ხალხებს — ხეთებს, მითანელებს, ასურელებს, ურარტუს და მიდიის სახელმწიფოებს (ძვ. წ. აღ. II — I ათასწლეული) დიდი საფრთხე შეუქმნეს ცენტრალური აზიიდან გამოსულმა მომთაბარეებმა. ძვ. წ. აღ. I ათასწლეულში და ახ. წ. აღ. პირველ საუკუნეებიდან მოყოლებული, შეინიშნება ხალხთა დიდი მოძრაობა ცენტრალური აზიიდან დასავლეთით, კერძოდ — კიმერიელების, სკვითების, ჰუნების, ალანების, პაჭანიკების, ხაზარების, ყივჩაღებისა (და, ბოლოს, XIII საუკუნეში, მონღოლებისა). ეს მომთაბარე ხალხები ცენტრალური აზიიდან ე. წ. „ვაკეების დიდი გზით“ მოდიოდნენ დასავლეთის მიმართულებით და ცივილიზებული სამყაროსათვის საცნაურნი ხდებოდნენ მხოლოდ მას შემდეგ, რაც მდინარეებს ვოლგასა და დონს გადმოლახავდნენ და რეალურად დაემუქრებოდნენ მაღალი კულტურის სახელმწიფოებს, მაგალითად — საბერძნეთსა და რომს. უფრო მეტ საფრთხეს ეს ხალხები (კიმერიელები და სკვითები) ძვ. წ. აღ. I ათასწლეულში სამხრეთის (ძველი აღმოსავლეთის) კულტურულ სამყაროს უქმნიდნენ. ვაკეებით ცენტრალური აზიიდან შედარებით იოლად მოსული ველური მასა ვოლგის გადალახვის შემდეგ პრობლემის წინაშე დგებოდა: დასავლეთის მიმართულებით გზის გაგრძელებას აძნელებდა კარპატების მთები; სამხრეთით გაჭრას ხელს უშლიდა კასპიის ზღვა, კავკასიონის მთავარი ქედი, შავი ზღვა და ბალკანეთის მთები; ჩრდილოეთით გადაადგილება სულაც არ იზიდავდა მომთაბარეთ — მკაც-

რი კლიმატური პირობები და შეზღუდული საარსებო საშუალებანი სტიმული ვერ იქნებოდა ათასობით კილომეტრის გავლისათვის, მით უფრო, რომ ცოტა მოგვიანებით (ახ. წ. აღ. პირველი საუკუნეები) ჩრდილოეთიდან, პირიქით, სამხრეთისკენ და სამხრეთ-დასავლეთისკენ დაიწყო მოძრაობა სლაურმა ტომებმა და ნორმანებმა. ასეთ ვითარებაში ცენტრალური აზიიდან მოსული მომთაბარეები — კიმერიელები და სკვითები — კასპიის ზღვასა და კავკასიონის მთავარ კედს შორის არსებულ ვიწრო ზოლში გაიჭრნენ და სასიკვდილო საფრთხე შეუქმნეს მახლობელი აღმოსავლეთის ცივილიზაციას. გზა ქართულ მიწებზე გადიოდა. ასე რომ, ჯერ კიდევ სახელმწიფოებრივი ცხოვრების გარიჟრაჟზე ქართველთა წინაშე უმწვავესად დადგა პოლიტიკური ორიენტაციის საკითხი. ეს არ იყო უბრალოდ საგარეოპოლიტიკური კურსის არჩევის პრობლემა. ეს იყო ყოფნა-არყოფნის საკითხი. თუმცა ისიც ფაქტია, რომ საქართველოსთვის პოლიტიკური ორიენტაციის საკითხი ყოველთვის, ყველა ეპოქაში, ყოფნა-არყოფნის საკითხი იყო.

ასევე გარიჟრაჟზე ჩვენი სახელმწიფოებრიობისა ფაქტი შეიქნა ის, რომ თავიანთ პოლიტიკურ თამაშებში ამიერიდან ქართველებს გასათვალისწინებელი ჰქონდათ ველური ჩრდილოეთის პრობლემა, რომელთანაც ობიექტურ და უშუალო მიმართებაში წყდებოდა პოლიტიკური სელების არჩევა (ეს მოცემულობა შემდეგაც გადაჰყვა ჩვენს ისტორიულ ბედს).

ამიერკავკასიაში კიმერიელების გამოჩენის დროისათვის (ძვ. წ. აღ. VIII საუკუნე) დიაოხს და კოლხას დიდი ომები ჰქონდათ გადახდილი ურარტუსთან. დიაოხი ამ ბრძოლას შეეწირა, მისი ტერიტორიის ნაწილი ურარტუმ დაიპყრო, ნაწილი კოლხამ შეიერთა. ძვ. წ. აღ. VIII საუკუნეში კიმერიელებმა კოლხაც დაამარცხეს, დაეცა მეორე ქართული სახელმწიფოც. შეიქმნა კრიტიკული მდგომარეობა: აღარ არსებობდა ორი ქართული სახელმწიფოებრივი გაერთიანება, სამხრეთიდან ქართული ტერიტორიების ზელში ჩაგდებას ცდილობდა ურარტუ, ძლიერდებოდა ურარტუს მეზობელი მიდიის სახელმწიფო. ასეთ ვითარებაში ძვ. წ. აღ. VIII საუკუნის ბოლოს ამიერკავკასიაში შემოიჭრნენ სკვითები. დღეს ჩვენთვის უცნობია იმ ჩვენი შორეული წინაპრების — პოლიტიკოსის თუ პოლიტიკოსთა ჯგუფის — ვინაობა, რომელთაც კიმერიელების გამანადგურებელი ლაშქრობისგან გაჩანაგებულ და პოლიტიკური არჩევანის პრობლ-

ემის წინაშე პრაქტიკულად პირველად დამდგარ თანამომხმეთ შესთავ-
აზეს გეგმა — მიდიელებთან და სკვითებთან ერთად ებრძოლათ ურ-
არტუს წინააღმდეგ, რადგან სწორედ ურარტუ წარმოადგენდა ყველ-
აზე დიდ საფრთხეს ქართველთათვის. ძვ. წ. აღ. 590 წელს მიდიაჲ
ქართველებთან და სკვითებთან კავშირში მოსპო ურარტუს სახელმ-
წიფო, რომელმაც ვერ გაუძლო ორმაგ დარტყმას: ჩრდილოეთიდან
— ქართველებისა და სკვითებისას, სამხრეთიდან — მიდიელებისას.
მიდიელების მიერ ქართველთა მიმხრობა მიდიის დიპლომატიის წა-
რმატება იყო, მაგრამ ქართველების მიერ ურარტუს წინააღმდეგ
სკვითების გამოყენება უკვე ქართული დიპლომატიის დიდ მიღწევად
უნდა ჩაითვალოს.

ასე და ამგვარად, უკვე ძვ. წ. აღ. I ათასწლეულის შუა ხანებში
ქართულმა დიპლომატიამ შეძლო გამოეყენებინა ჩრდილო კავკასიის
მთისწინეთში თავმოყრილი, დიდი დამანგრეველი უნარის მქონე
ველური ხალხების ძალა საკუთარი ინტერესებისათვის.
თუ უფრო ზოგადად შევხედავთ, — შეძლო გამოეყენებინა თავისა
გეოპოლიტიკური როლი და მდგომარეობა.

ამ საკითხს კიდევ უფრო მეტი მნიშვნელობა ენიჭებოდა იბერ-
იის (ქართლის) სამეფოს წარმოშობის პერიოდში (ძვ. წ. აღ. IV—
III საუკუნეები). იყო თუ არა ალექსანდრე მაკედონელის ლაშქარი
იბერიაში და მართლა დატოვეს თუ არა მაკედონიელებმა მცხეთაში
თავიანთი სარდალი აზო, საპოლემიკო საკითხია. მაგრამ ამ ამბებთან
დაკავშირებით ქართველი მემატიანეს ცნობა იმის შესახებ, რომ
დამპყრობთა წინააღმდეგ აჯანყებულმა ფარნავაზმა ჩრდილო კავკა-
სიის მთისწინეთში მომთაბარე ტომები გამოიყენა, ძალზე საგულის-
ხმოა ჩვენთვის. მაშინ ფარნავაზი სხვა მოკავშირეს ვერ იპოვნიდა
(თუ არ ჩავთვლით ეგრისის სამეფოს), რადგან იმჟამინდელი ქვეყნ-
ები მაკედონიელთა მიერ იყო დაპყრობილი. სამაგიეროდ, შეიძლებოდა
ჩრდილო კავკასიის მთისწინეთში აღმოსავლეთიდან მოსული მომთა-
ბარეების გამოყენება, მით უმეტეს, რომ ჩრდილო კავკასიიდან მთა-
კარი გადასასვლელის — დარიალის კარი ქართველებს ეკავათ
და კონტროლს უწევდნენ ამ ხალხების მოძრაობას სამხრეთისაკენ.
ეს დიდ უპირატესობას აძლევდა იბერიის მეფეს. ქართველები აკონ-
ტროლებდნენ მთავარ გზას, მათ შეეძლოთ სამხრეთიდან აგრესიის
შემთხვევაში დარიალის კარი გაეხსნათ და მეგზურობაც გაეწიათ

სამხრეთისაკენ დაძრული დამანგრეველი მასისათვის. ფარნაევამა ეს უპირატესობა მარჯვედ გამოიყენა.

რომაელთა დაპყრობების დაწყებისთანავე (ძვ. წ. აღ. I საუკუნე) საქართველოს საგარეო პოლიტიკა დიდი საერთაშორისო პოლიტიკის ნაწილად იქცა. რომის აგრესიას იბერია წინ ვერ აღუდგებოდა. ძვ. წ. აღ. I საუკუნეში რომაელებმა იბერია დაიპყრეს, მაგრამ იბერიის მეფეს არტაგს ურჩობაც აპატიეს და რომის მოკავშირეც და მეგობარიც უწოდეს. იბერიის სამხედრო ძლიერება და ეკონომიკური პოტენციალი რომაელებს, რა თქმა უნდა, ვერ შეაშინებდა. იბერია ამ თვალსაზრისით რომისთვის პრობლემას არ წარმოადგენდა, მაგრამ რომის პოლიტიკოსებსა და სარდლებს სხვა რამ აშინებდათ: იბერიელებს დარიალის კარი არ გაეხსნათ და რომის აზიურ სამფლობელოში არ შეეშვათ ჩრდილოეთ კავკასიაში მომთაბარე ხალხები (მით უფრო, რომ რომის სამფლობელოები ევროპაში — ბალკანეთში — უკვე იზიდავდა ამ ხალხებს). ასეთ ვითარებაში რომის დიპლომატია თავის გამარჯვებად მიიჩნევდა იბერიის მეფეთა დასტურს ჩაიკეტათ ჩრდილოეთიდან, კავკასიიდან, გამოსასვლელი გზები. ასე რომ, დამარცხების შემთხვევაშიც კი იბერიის მდგომარეობა უიმედოდ არ გამოიყურებოდა — ქართველებმა ჩრდილო კავკასიის მთისწინეთში მომთაბარე ხალხების ფაქტორზე პოლიტიკური თამაშით სოლიდური დამცავი ფარი შეიქმნეს.

ეს იყო მაშინაც და შემდგომაც ქართული პოლიტიკის ალფა და ომეგა — ქვეყნის სტრატეგიულად ხელსაყრელი (თუმცა რთული და სახიფათო) მდებარეობის გონივრული გამოყენება. საბოლოოდ, უკვე ძველი და ახალი წელთაღრიცხვების საზღვარზე ცხადი გახდა: ერთი მხრივ, გეოგრაფიული მდგომარეობა, რომელსაც ეფუძნება გეოპოლიტიკა, ქვეყანას რთულ პრობლემებს უქმნიდა, კერძოდ — განაპირობებდა აქ რომაელი დამპყრობლების მოსვლას, მეორე მხრივ, იგივე მდგომარეობა ქმნიდა სტაბილიზაციის მექანიზმს, კერძოდ — საშუალებას აძლევდა იბერიის მეფეებს მოეხდინათ სამხედრო მარცხის კომპენსირება: რომაელები ბევრ რასმე დათმობდნენ, თუ იბერია კავკასიის კარებს დახურავდა და გართულებებს ააცილებდა მათ.

...დღეს, საუკუნეთა გადასახედიდან, რა თქმა უნდა, ძალიან ადვილია განუსაზღვრო ჩვენს წინაპრებს მთავარი, გლობალური ამოცანა, სამერმისო ამოცანა: დასწრებაზე თამაში — ჩრდილოეთსა და სამხრეთს შორის კარების გასაღებს ყოველთვის, თავიდან, უნდა

ეუღარუნა და არა მოვლენათა განვითარების, მომხდარი ფაქტების, კვალდაკვალ...

პოლიტიკური ორიენტაციის საკითხი კლასიკური სახით ქართველ პოლიტიკოსთა წინაშე დადგა მას შემდეგ, რაც III საუკუნიდან ამიერკავკასიაში რომს სასანიდთა ირანის ძლიერი სახელმწიფო დაუპირისპირდა. რომის იმპერიის (IV საუკუნიდან აღმოსავლეთ რომის იმპერიის — ბიზანტიის) და ირანის ხანგრძლივ ბრძოლაში პატარა საქართველოსთვის არჩევანის გაკეთება, რა თქმა უნდა, ძნელი იყო. ირანის ინტერესები ამიერკავკასიაში უფრო რეალური ჩანდა, ვიდრე ბიზანტიისა, — რომის იმპერია ორად გაყოფის მომენტისთვის (IV საუკუნე) უკვე დასუსტებული იყო, მით უფრო სუსტი იყო მისი აღმოსავლეთი ნაწილი, ბიზანტია. სწორედ ამიტომ ვახტანგ გორგასლის პოლიტიკური ორიენტაცია — მეგობრული ურთიერთობის დამყარება ირანთან სწორი გადაწყვეტილება იყო. მეორე მხრივ, ისიც ცხადი იყო, რომ ეს ღოგმა არ უნდა ყოფილიყო. ვახტანგ გორგასალმა შეძლო თავისი ძალაუფლების განმტკიცება, მაგრამ მალე ქრისტიანული ქართლის მაზღვანურ ირანთან ურთიერთობაში ქართლის მეფემ სასიკვდილო საფრთხე დაინახა და პოლიტიკური ორიენტაცია შეცვალა — მოკავშირედ ბიზანტიის იმპერია დასახა. ირანის მხრიდან საფრთხე იმდენად ძლიერი იყო, რომ გორგასალმა, ეგრისში ბიზანტიელთა თვითნებობის მიუხედავად, მაინც ბიზანტიური ორიენტაცია აირჩია.

ვახტანგ გორგასალი მძიმე მდგომარეობაში ჩააგდო იმანაც, რომ ქართლის მეფეს ჩრდილოეთ კავკასიის ფაქტორის გამოყენების საქმეში გართულებები შეუქმნა ალანთა (ივსთა) შემოჭრამ ქართლის სამეფოს საზღვრებში. თუ ქართველი მეფეები ერთ ღროს რომის იმპერიის დიპლომატიასთან ურთიერთობაში მარჯვედ იყენებდნენ ჩრდილოეთ კავკასიის მთისწინეთში მომთაბარე ხალხებს, ვახტანგ გორგასალს ამ შემთხვევაში, პირიქით, თავსატეხი გაუჩნდა. ალანებმა, რომლებიც ხანგრძლივი გადაადგილების (მომთაბარეობის) შემდეგ ჩრდილო კავკასიის მთისწინეთში დამკვიდრებას ცდილობდნენ, თვალი დაადგეს საქართველოს (ქართლს). ვახტანგ გორგასალმა ჩრდილოეთიდან წამოსული საფრთხე ღროზე შენიშნა, ალანები სასტიკად დაამარცხა და ღარიალის კარი საიმედოდ ჩაკეტა.

ბიზანტიისგან რეალური დახმარების მიუღებლობის შემთხვევაში ვახტანგ გორგასალი ირანს ვერ გაუმკლავდებოდა. ასეც მოხდა: ვახტანგი დამარცხდა, ქართლში ირანი გაბატონდა.

532 წელს „საუკუნო ზავით“ ბიზანტიამ და ირანმა გაიყვეს გავლენის სფეროები. ბიზანტიამ სცნო ირანის გაბატონება ქართლში, ხოლო ირანმა ბიზანტიისა — ეგვიპტის. ქართლი მაინც უფრო მძიმე მდგომარეობაში აღმოჩნდა — აქ მეფობა გაუქმდა. ირანი გრძნობდა თავის უპირატესობას და 542 წელს ეგრისშიც დიდი ლაშქარი შეიყვანა. დაიწყო ე. წ. „დიდი ომიანობა“, რომელიც 20 წელს გრძელდებოდა: ამ ომში ეგრისის მეფე სამხედრო ძალით ქვეყანას ვერ გადაარჩენდა, საჭირო იყო მოვლენათა განვითარების შესაძლო სცენარის მაქსიმალურად სწორად განსაზღვრა და მომგებიანი საგარეოპოლიტიკური კურსის შერჩევა. გუბაზ მეფის მიერ გადადგმული ნაბიჯები, რომელთა მიზანი ბიზანტიისა და ირანის დაპირისპირებიდან მოგების მაქსიმუმის მიღება იყო, ქართული დიპლომატიის დიდ შესაძლებლობებზე მიუთითებს. გუბაზის სახით ბიზანტიელებმა სერიოზული მოწინააღმდეგე დაინახეს, ამიტომაც მოკლეს იგი 554 წელს. იმავე წელს ეგრისის სახალხო კრება, ბიზანტიელთა მიმართ საყოველთაო და სამართლიანი ზიზღის მიუხედავად, მაინც სწორ პოლიტიკურ ორიენტაციაზე დადგა — ბიზანტიასთან მოკავშირეობა არჩია. კრებაზე გამოსული ორივე პოლიტიკოსი — აიეტი (პროირანული ორიენტაცია) და ფარტაძე (პრობიზანტიური ორიენტაცია), რა თქმა უნდა, ჭკვიანი დიპლომატები იყვნენ, მაგრამ ფარტაძე უფრო პრაგმატულ პოლიტიკას მისდევდა. ის ამ შემთხვევაში სწორი იყო: ირანი ეგრისიდან ბიზანტიას ვერ გააძევებდა, ხოლო გამარჯვებული ბიზანტია პროირანული ორიენტაციის ეგრისს კიდევ ათას უბედურებას დაატეხდა თავს. მალე ეს ვარაუდი გამართლდა. უფრო მეტიც, 628 წელს ბიზანტიის კეისარმა ჰერაკლემ ხაზარების დახმარებით — ისევე ჩრდილო კავკასიის ფაქტორი! — ირანელებს თბილისი წაართვა.

არაბების გამოჩენისა და ბატონობის ეპოქაში (VII–IX საუკუნეები) ქართველ პოლიტიკოსებს დიდი არჩევანის საშუალება, სამწუხაროდ, არც ჰქონდათ. არაბებმა დაიპყრეს მთელი ახლო აღმოსავლეთი, მცირე აზიაში სასტიკი მარცხი აგემეს ბიზანტიას. ასეთ ვითარებაში ტრადიციული პრობიზანტიური პოლიტიკური კურსი აზრს კარგავდა — ბიზანტიას თავისი ბედი უჭირდა. ამიტომაც ქვეყ-

ნის გადარჩენის გზებიდან პრაქტიკულად მხოლოდ ერთი — არაბებთან ურთიერთობის მოგვარება — რჩებოდა. ამ პოლიტიკას ადგა ქართლის ერისმთავარი სტეფანოზი. ჰაბიბ იბნ-მასლამას „დაცვის სიგელი“ (VII საუკუნის 50-იანი წლები) შექმნილ სიტუაციაში ქართული დიპლომატიის გამარჯვებულ უნდა მივიჩნიოთ. ცოტა მოგვიანებით ამ პოლიტიკის გამგრძელებლად, მაგრამ — განმავითარებლად და ტრანსფორმატორად, გვევლინება ერისმთავარი ნერსე, რომელმაც კარგად დაინახა, რომ დამპყრობთა მიმართ უსაზღვრო დათმობები უკვე გადაგვარების საფრთხეს უქმნიდა ერს. ამით იყო გაპირობებული ნერსეს პოზიცია: პროარაბული ორიენტაციის აუცილებლობის დროებითი აღიარება და შემდეგ მისი შეცვლა — ბრძოლის დაწყება დამპყრობთა წინააღმდეგ.

არაბებთან ბრძოლაში თითქოს განწირული ბიზანტიის იმპერია გადარჩა, ხოლო სახალიფო დაიშალა (IX ს.). ეს ფაქტი სულაც არ მეტყველებდა იმაზე, რომ ბიზანტია აღმავლობის გზაზე იდგა, მაგრამ, მეორე მხრივ, მას ძალუძდა აქტიურად შეეშალა ხელი საქართველოს გაერთიანებისათვის, რისთვისაც, სხვა საშუალებებთან ერთად, მხარს უჭერდა ოპოზიციას ქვეყნის შიგნით. ასეთ სიტუაციაში დიდი მნიშვნელობა ენიჭებოდა დოზირების ფაქტორს პრობიზანტიური ორიენტაციის გატარებაში. ბაგრატ III და ბაგრატ IV მაინც პრობიზანტიურ ორიენტაციას არჩევენ, მაგრამ გიორგი I — ანტიბიზანტიურს, რასაც ომიც კი მოჰყვა ბიზანტიასა და საქართველოს შორის. არ შეიძლება არ დაეასკვნათ, რომ ორ კუროპალატს შორის მოღვაწე გიორგი I, რომელმაც პრინციპულად არ მიიღო კუროპალატის ტიტული, სულაც არ დგამდა წინდაუხედავ ნაბიჯს. დღეს გადაჭრით ვერაფერს იტყვიან: საქართველოს გაერთიანების საქმეს რას მოუტანდა იმაზე მეტს მესამე კუროპალატი, ვიდრე მოუტანა ბიზანტიის წინააღმდეგ ხმალშემართულმა მეფე გიორგიმ. როგორც ჩანს, თავისი ანტიბიზანტიური პოლიტიკური კურსით გიორგი პირველმა გაანეიტრალა მამამისის — ბაგრატ მესამის პრობიზანტიური პოლიტიკური ორიენტაციის ზოგიერთი მაკნი შედეგი (თუნდაც ეროვნული ცნობიერების გადარჩენის თვალსაზრისით) და ამავე დროს გარკვეული პოლიტიკური დივიდენდები დაუტოვა შვილს — პრობიზანტიური ორიენტაციის ბაგრატ მეოთხეს.

თუ ბაგრატ მესამის ეპოქაში პრობიზანტიურ პოლიტიკას რეალური შედეგები ჰქონდა (ისევე როგორც რეალური შედეგები ჰქონდა გიორგი

პირველის ანტიბიზანტიურ ორიენტაციას), ბაგრატ მეოთხის ეპოქაში იგი თანდათანობით აზრს კარგავს, ხოლო გიორგი მეორის მეფობისას უაზრობად იქცევა. თურქ-სელჩუკების დაპყრობების დასაწყისშივე ბიზანტიის სასტიკ მარცხს მანასკერტთან ბრძოლაში (1071 წ.) შედეგად მოჰყვა ბიზანტიის მიერ აღმოსავლეთის (მცირე აზიის) პროვინციების დაკარგვა.

როდესაც დავით აღმაშენებლის მეფობა დაიწყო (1089 წ.), საქართველოს სამხრეთ-დასავლეთიდან, სამხრეთიდან და სამხრეთ-აღმოსავლეთიდან (შავი ზღვიდან კასპიის ზღვამდე) სელჩუკთა იმპერია ერტყა. დავით აღმაშენებელი ვარკვეულ ვაკეში აღმოჩნდა: მოკავშირედ ბიზანტია არ გამოდგებოდა, ხოლო დასავლეთ ევროპის ქვეყნებიდან დახმარების მიღება რომ არარეალური იყო, ეს ნათელი ჩანდა ჯვაროსანთა ლაშქრობების შედეგების მიხედვით. თითქოს აბსოლუტური და გადაუღაბავი რეალობა იყო ის, რომ თავისი სამხედრო-ეკონომიკური პოტენციალით საქართველო თურქ-სელჩუკებს ვერ გაუმკლავდებოდა. ამგვარ, პრაქტიკულად გამოუვალ, ვითარებაში დავით აღმაშენებელმა მაინც მაქსიმალისტური ამოცანა დაუსახა ქვეყანას, ხოლო მიზნის მისაღწევ საშუალებებს შორის ერთ-ერთი ჩრდილოეთში აღმოაჩინა: მან ისევ და ისევ ჩრდილო კავკასიის ფაქტორი გამოიყენა — დარიალის კარით ყივჩაღები გადმოიყვანა და საგრძნობლად გაამძიერა, უფრო მობილური გახადა, საქართველოს სამხედრო ძალები.

დავითის, დემეტრე პირველის, გიორგი მესამის, თამარის ეპოქაში პოლიტიკური ორიენტაციის საკითხი, როგორც ასეთი, არც მდგარა, მოკავშირის პრობლემა არ არსებობდა, რადგანაც პრაქტიკულად არ არსებობდა პოტენციური ძლიერი მოკავშირე. თავისი თავის იმედით მყოფი საქართველოსთვის ერთადერთ ტაქტიკურ იარაღად რჩებოდა საერთაშორისო მდგომარეობის გამოყენება, საერთაშორისო კონიუნქტურაზე ოპერატიული რეაგირება (ჯვაროსანთა ომები, თურქ-სელჩუკთა იმპერიის დაშლა და სხვ.). ფაქტიურად იგივე ითქმის გიორგი ბრწყინვალის (1314—1346) ხანაზეც.

ახალი ეტაპი საქართველოს სახელმწიფოებრივ და პოლიტიკურ ისტორიაში მე-13 საუკუნის შემდეგ, ძირითადად — მე-15 საუკუნიდან, იწყება. ეს არის ეტაპი, რომელიც ზოგიერთი ნიშნით, ასეთ შთაბეჭდილებას ტოვებს: საქართველომ თანდათანობით დაიწყო დაიწყება იმისა, რომ იგი სპეციფიკური ქვეყანაა, რომ მას შეხედავენ,

ერთი მხრივ, როგორც ევროპას აზიაში, მეორე მხრივ, როგორც აზიას ევროპაში; საქმე ისაა, რომ იგი მაინც, ყველა შემთხვევაში, იყო და სხვების თვალშიც რჩებოდა სწორედ სპეციფიკურ ქვეყნად, ორი სამყაროს შეხვედრის ადგილად, — აქ მთავარი ის იყო, თუ რამდენად იზრუნებდა თვითონ იგი თავისთავადობის შენარჩუნებაზე, და რამდენად მნიშვნელოვანი და სერიოზული ძალა იქნებოდა პოლიტიკურად ეს თავისთავადი ქვეყანა. პოლიტიკურ ასპექტში ეს იყო ეტაპი, როდესაც შეიძლებოდა ჩაღებულყოფიერ ფუნდამენტი მომავალი ნეიტრალური სახელმწიფოსთვის. სამწუხაროდ, მოხდა პირიქით: ეს არის ეტაპი ჩვენს ისტორიაში, როდესაც ობიექტური თუ სუბიექტური ფაქტორების გამოისობით, ჩვენი ეროვნული კონცეფცია თანდათანობით განუღგა ბალანსირების და გადაზრებში დოზირების პოლიტიკას, დაფუძნებულს ჩვენს გეოპოლიტიკურ და გეოსტრატეგიულ მოცემულობაზე, პირველ ყოვლისა — ჩრდილოეთიდან სამხრეთისკენ გამავალი კარის მფლობელობის ფაქტორზე. თუ უფრო ზუსტნი ვიქნებით, ეს კონცეფცია სამი ელემენტის ერთობლიობით იქმნებოდა: პირველი — ერთიანი ქართული მიდგომა პოლიტიკური (resp. საგარეოპოლიტიკური) დოქტრინის ჩამოყალიბებისადმი; მეორე — ბალანსირების პოლიტიკა; მესამე — რეგიონულ ლიდერობაზე პრეტენზიის განხორციელება.

მე-15 საუკუნის დასასრულიდან ამიერკავასიაში ჰეგემონობისთვის ბრძოლას იწყებენ ირანი და თურქეთი. მე-18 საუკუნის დამდეგიდან შავი და კასპიის ზღვებისკენ გაიჭრა რუსეთი. საქართველო უკვე დაშლილია სამეფო-სამთავროებად... ამ პერიოდში საქართველო პოლიტიკურ სიტუაციას ფაქტიურად ვიდარ მართავს; პროირანული, პროთურქული, პროდასავლური და, ბოლოს, პრორუსული ორიენტაცია იძულებითი ნაბიჯები იყო და არა გარკვეული სტრატეგიული ხაზის გათვლილი ელემენტები, ისინი საპერსპექტივო პოზიტივს არ ქმნიდნენ, რადგანაც უმეტესწილად მხოლოდ უკვე მომხდარზე რეაქციას წარმოადგენდნენ.

რა თქმა უნდა, არავითარ შემთხვევაში არ შეიძლება იმის მტკიცება, რომ ქართველი ლიდერები, ქართველი პოლიტიკოსები არ მოქმედებდნენ თავგანწირულად. ქართველ მეფეთა დამსახურება ამ ეპოქაში ის იყო, რომ ისინი კატასტროფულ სიტუაციაში, წაგებული ბრძოლების თუ საგარეოპოლიტიკური მარცხის შემდეგ, მაინც პოულობდნენ რაღაც ფაქტორს, რომელზეც შეიძლებოდა დაფუძნებულიყო

საქართველოს და ქართველობის გადარჩენისთვის ბრძოლა. ამ ბრძოლაში იყო კომპრომისებიც, ზოგჯერ — გაუმართლებელი, იყო კონკრეტული შეცდომებიც, იყო აშკარა უკუსვლა(ც); მაგრამ ისიც ფაქტია, რომ სამი დიდი სახელმწიფოს საჯიჯგნად ქცეული, უმოკავშირედ დარჩენილი ქართველობა მაინც არ გადაგვარდა და, ბოლოსდაბოლოს, მე-18 ს-ის დამლევეს იმას მაინც მიაღწია, რომ მაშინდელი საერთაშორისო სტანდარტების დონეზე შედგენილი ხელშეკრულებით დაუკავშირდა რუსეთს, რითაც: ამ ხელშეკრულების დარღვევის და მოკავშირის მიერ განხორციელებული ოკუპაციისა და ანექსიის მიუხედავად, შორეულ შთამომავლობას დაუტოვა სახელმწიფოებრიობის აღდგენისთვის ბრძოლის იურიდიული უფლება. ეს შეიძლება ერეკლე მეფის და ქართული დიპლომატიის გარკვეულ წარმატებადაც კი ჩაითვალოს. დიპლომატიას, საერთოდ, ძალიან უჭირდა, კერძოდ — გაძნელებული იყო პროგნოზირება და ხელსაყრელი კურსის განსაზღვრა. და მაინც აქტიურად მოქმედებდნენ კახეთის მეფეები ლევანი (1518—1574) და ალექსანდრე მეორე (1574—1605), ქართლში — თეიმურაზ პირველი და სხვები. როსტომ-ხანმა (1532—1658), ვახტანგ V შაჰნავაზმა (1658—1675), ვახტანგ მეექვსემ (1703—1724) ბევრი იმეცადინეს ქვეყნის გადარჩენისთვის. რაც შეეხება თეიმურაზ მეორეს (1744—1762) და ერეკლე მეორეს (1762—1798), მათ ქართლისა და კახეთის ერთ სამეფოდ გაერთიანებაც კი მოახერხეს — ეს შექმნილ სიტუაციაში მხოლოდ დიპლომატიური სვლებით შეიძლებოდა განხორციელებულიყო. ამავე საშუალებით იქნა თავიდან აცილებული ომები თურქეთთან — საერთოდ, ხოლო ირანთან — 1795 წლამდე.

და მაინც, საქართველო უკვე ის აღარ იყო. აღარ იყო, პირველ რიგში, ფუნქციონალურად.

რა თქმა უნდა, ამისთვის ბევრი მიზეზი არსებობდა, მათ შორის — ისეთებიც, რომლებიც ზედაპირზე ჩანან. სახელდობრ: 1. ორი ძლიერი სახელმწიფოს — ირანის და თურქეთის — დაუოკებელი, ეროვნული ინტერესების დონეზე ატანილი, მისწრაფება ამიერკავკასიაში, შავი ზღვიდან კასპიის ზღვამდე სივრცეზე, გაბატონებისკენ. რასაც შესაბამისი, დაუნდობელი, მოქმედებები ახლდა თან; 2. რუსეთის იმპერიის ასეთივე მისწრაფება, რომლის რეალიზების სტრატეგიულ ხაზს წარმოადგენდა ირანის და თურქეთის პრეტენზიების ბლოკირება ამიერკავკასიაში (ხოლო ტაქტიკურ იარაღთაგან ერთ-ერთი, სხვათა-

შორის, იყო რეგიონის ქრისტიანი მოსახლეობის მხარდაჭერის მი-
პოვება); 3. დასავლეთ ევროპის სახელმწიფოების ფაქტიური უძლე-
ურება აღმოეჩინათ, თავიანთი ინტერესების გათვალისწინებით, რაიმე
რეალური დახმარება ქართული სამეფო-სამთავროებისათვის (ამი-
ტომ ქართველი ლიდერებისთვის ევროპის დაპირებებზე დაყრდნობით
განსაზღვრა პოლიტიკური ორიენტაციისა ფაქტიურად უაზრობა
იყო); 4. კავკასიის მთიანეთში ზურგის მოშლა, რაც განპირობებული
აყო ამ მხარეში თურქეთისა და ირანის პოზიციების განმტკიცებით
(კავკასიის მთიანეთის გამაჰმადიანებული მოსახლეობა თურქეთის
და ირანის ბუნებრივ მოკავშირედ იქცა, რაც განსაკუთრებით ნათ-
ლად მე-18 ს-ში გამომჟღავნდა); 5. ამიერკავკასიაში მოკავშირის
არარსებობა — აქ ქრისტიანული სახელმწიფო, გარდა ქართული სა-
მეფო-სამთავროებისა, არ ფუნქციონირებდა; 6. ქართული პოლიტი-
კური ერთეულების მწირი შესაძლებლობები, კერძოდ — იმაში, რომ
ჰქონოდათ დროული ინფორმაცია ირანის, თურქეთის, რუსეთის (აგ-
რეთვე დასავლეთის ქვეყნების) უმაღლეს წრეებში მიღებული გადა-
წყვეტილებების და კულუარებში მიღწეული პოლიტიკური გარიგებე-
ბის შესახებ და სხვ.

მაგრამ იყო რამდენიმე მთავარი — შინაგანი — მიზეზი. ამ პერი-
ოდში, განსაკუთრებით — მე-16—მე-18 საუკუნეებში. ერთიანი ქარ-
თული პოლიტიკა აღარ არსებობდა, აღარ იდგა პოლიტიკური ორი-
ენტაციის, როგორც ერთიანი საქართველოს პოლიტიკური ორიენტა-
ციის, პრობლემა. თავ-თავიანთ კურსებს საზღვრავდნენ უკვე ქართ-
ლის სამეფო, კახეთის სამეფო, იმერეთის სამეფო, სამეგრელოს სამ-
თავრო, აფხაზეთის სამთავრო, სამცხე-საათაბაგო... ამ სიტუაციის
უბედურება ის იყო, რომ დაქუცმაცებულ საქართველოს გეოპოლი-
ტიკური და გეოსტრატეგიული შესაძლებლობანიც დაქუცმაცებული
ჰქონდა.

მეორე და ასევე მთავარი მიზეზი იმაში მდგომარეობდა, რომ
საქართველომ ბოლომდე არ გამოიყენა თავისი გეოპოლიტიკური პო-
ზიცია, რომელიც, კერძოდ, — გარკვეულ ფარგლებში და გარკვეულ
ვადებში — იძლეოდა ბალანსირების პოლიტიკის განხორციელების
საშუალებას.

საბოლოოდ შეიქმნა ისეთი სიტუაცია, როდესაც ქართლ-კახე-
თის სამეფო, შემდეგ — იმერეთის სამეფო და სამთავროები შეეწირნენ
დიდ პოლიტიკას ისე, რომ ამ პოლიტიკას მხოლოდ დიდი ქვეყნები

ქმნიდნენ, ხოლო პატარა ქვეყნები — ე. ი. ჩვენი სამეფოები — განაჩენს დახურულ კარს მიღმა ელოდებოდნენ. 1801 წლის კატასტროფა პრაქტიკულად არ იყო ქართლ-კახეთის და რუსეთის, ან ქართლ-კახეთის და ირან-თურქეთის ურთიერთობათა შედეგი, — ეს იყო ირან-თურქეთ-რუსეთის ხანგრძლივ პოლიტიკურ ურთიერთობათა, ხანგრძლივი პოლიტიკური წინააღმდეგობის შედეგი; საქართველომ ამ პოლიტიკურ პროცესში ვერ მიიღო იმ დონით მონაწილეობა, რომელსაც მას უქმნიდა მისი გეოპოლიტიკური ზღვომარეობა. რუსეთმა აიძულა თურქეთი და ირანი ხელი აეღოთ ამიერკავკასიაზე — საქართველო ერგო რუსეთს, ირანს ან თურქეთს რომ აეძულებინათ რუსეთი ხელი აეღო ამიერკავკასიაზე — ქართლ-კახეთის სამეფოს ლიკვიდაცია ირანის ან თურქეთის სასარგებლოდ მოხდებოდა. ლოგიკა ჩვენთვის ერთადერთი იყო: ქართულ სამეფოებს (უფრო ზუსტად კი — საქართველოს, ერთიანს) შეეძლოთ ეარსებათ მანამდე, სანამ რეგიონში ბატონობის პრეტენზიის მქონე დიდ სახელმწიფოთა ჭიდილში წონასწორობა იარსებებდა; წონასწორობის დარღვევა, დისბალანსის შექმნა და დიდ სახელმწიფოთაგან რომელიმეს გამარჯვება ჩვენთვის კატასტროფას ნიშნავდა. საქართველოსთვის ამოცანას წარმოადგენდა აქტიური ბრძოლა წონასწორობის დაცვისათვის, ოქროს შუაღელის ადგილის მოპოვებისათვის, მეცადინეობა ბალანსირების პოლიტიკის გატარებისათვის, ხოლო მიზანი ისეთი სიტუაციის შექმნა უნდა ყოფილიყო, რომ დისბალანსი სხვისთვისაც არ ყოფილიყო მისაღები, რომ არცერთს დიდ სახელმწიფოთაგან არ მოსურვებოდა ჩვენი ქვეყნის (სამეფოების) მოსპობა — ეს მათთვის, თითოეულისათვის, არახელსაყრელი და განსახორციელებლად ძნელი სურვილი უნდა ყოფილიყო, მათ, თითოეულს, ერთადერთი რეალური სურვილი უნდა ჰქონოდათ — ჩვენი ქვეყნის (სამეფოების) პოლიტიკაში, მათდამი დამოკიდებულებაში მათთვის ხელსაყრელი განწყობილების შექმნა.

წონასწორობის დაცვა, პოლიტიკური ლაიერება, არავითარ შემთხვევაში არ არის დაკავშირებული ვიწრო პრაგმატიზმთან, როდესაც მხოლოდ მომენტზე გათვლილი ამოცანის (დროებითის), ან პოლიტიკოსის ეგოისტური, პრაქტიკული მიზნის მსახურება იგულისხმება: დაბალანსებასაც, გადახრასაც (თუნდაც რადიკალურს) ერთ ან მეორე მხარეს მხოლოდ იმ შემთხვევაში აქვს აზრი, თუ ყველაფერი ეს მაქსიმალისტური (იდეალისტური) ამოცანის, საბოლოო ამოცანის, ინტერესებს ემსახურება.

რა თქმა უნდა, ამგვარი, მასშტაბური, ამოცანის დასმას და, რაც მთავარია, დადებითად გადაჭრას ბევრი პრობლემა უშლიდა ხელს, სუბიექტური ხასიათისა და ობიექტურისაც.

საქართველოს ხელსაყრელი მდგომარეობის, კერძოდ — ჩრდილოეთიდან სამხრეთით გზის, გამოყენების შესაძლებლობებში ბევრი რამ შეცვალა მონღოლთა ბატონობის ეპოქამ. ერთ-ერთი შედეგი ის იყო, რომ საქართველომ ვერ მოასწრო ჩრდილო კავკასიის მთისწინეთის „ათვისება“, რაც მის პოზიციას, მოცემული სტრატეგიული მომგებიანობის ფარგლებში, კიდევ უფრო და საბოლოოდ განამტკიცებდა. იყო სხვა მომენტებიც. დავით ულუმ (1247-1270) კიდევ შეძლო კავკასიის ფაქტორის გამოყენება: აჯანყებულ მეფეს მონღოლებმა დასაშაული აპატიეს, რადგანაც მან იკისრა ჩრდილოეთიდან გადმოსასვლელი გზის დაცვა ქართული ჯარით. საქმე ის იყო, რომ მონღოლთა იმპერიის ოთხ ნაწილად გაყოფის შემდეგ კავკასიის ქედს გადაღმა ტერიტორია ოქროს ურდოს შემადგენლობაში აღმოჩნდა. ხოლო ამიერკავკასია ილხანების სახელმწიფოს ერგო; იმ ვითარებაში, როდესაც ოქროს ურდოს ყაენები ცდილობდნენ ჩრდილოეთიდან ამიერკავკასიაში (ე. ი. ილხანების სახელმწიფოს საზღვრებში) გაჭრას, დიდი მნიშვნელობა ენიჭებოდა იმას, თუ ვის მხარეს დაიჭურდა ქართველთა მეფე; დავით ულუმ ეს შანსი ხელიდან არ გაუშვა.

მოვლენებმა ცვლა დაიწყო მე-13 საუკუნიდან, იმ დროიდან, როდესაც მონღოლებმა გაანადგურეს ყივჩაღები. ხელ-ფეხი გაეხსნათ ჩრდილო კავკასიის მთისწინეთში რამდენიმე საუკუნის წინ მოსულ ალანებს (ოვსებს) — მათ უკვე ჰქონდათ მყარად მოკიდებული ფეხი ჩრდილო კავკასიის ბარში და დაიწყო წინ წაწევა კავკასიის მთიანეთისკენ, კერძოდ — დარიალის ხეობაში. ეს იმას ნიშნავდა, რომ ისინი თავიანთი კონტროლის ქვეშ აქცევდნენ ჩრდილოეთიდან სამხრეთისკენ გამავალი გზის ერთ, ჩრდილოეთ, ნაწილს. უფრო მეტიც, მონღოლებთან კავშირში ოსები ქართლშიც შემოიჭრნენ და გორის ციხეც კი იგდეს ხელთ; გიორგი ბრწყინვალემ დიდი ბრძოლის შემდეგ განდევნა ისინი ქედს გადაღმა და ისიც მოახერხა, რომ აღიდგინა პოზიციები კავკასიის მთიანეთის მკვიდრთა ერთ ნაწილში. მაგრამ, საერთოდ, სიტუაცია ისეთი იქმნებოდა, რომ ოსთა მიერ სტრატეგიული გზის ნაწილზე კონტროლის დაწესებამ ქართულ პოლიტიკას შეუზღუდა ჩრდილოეთ კავკასიის ფაქტორის გამოყენების შესაძლებლობა. საქართველო კარგავდა დარიალის ხეობის მთავარი, ფაქტიუ-

რად — ეროადერთი, ჩამკეტის ფუნქციას, რაც იმას ნიშნავდა, რომ იკარგებოდა ის დიდი უპირატესობა, რომელსაც, რომაელთა ეპოქიდან მოყოლებული, კარგად იყენებდნენ ქართველი მეფეები.

გარკვეული, მაგრამ არაპრინციპული, ცვლილებები მიმდინარეობდა რუსეთში მონღოლთა ბატონობის დასრულების შემდეგ (მე-15 საუკუნის ბოლო): ჩრდილოეთ კავკასიის მთისწინეთი მონღოლური სახელმწიფოების — ყირიმის სახანოსა და ასტრახანის სახანოს — ხელშია; ოსები ამ დროისათვის მთისწინეთის ბარში აღარ სახლობენ, მაგრამ, მაღალმთიან რეგიონში გადანაცვლებული, თავგამოდებით ცდილობენ დარიალის ხეობის კონტროლს; სახანოები აქ მათ მეტოქეობას ვერ უწევენ, ხოლო რუსეთმა მოგვიანებით დაიწყო პოზიციების განმტკიცება, ჯერ — მთისწინეთში, კიდევ უფრო გვიან — მთაში. (რუსეთზე უფრო ადრე, როგორც უკვე ითქვა, კავკასიის მთის მოსახლეობაში თავიანთი გავლენა გაავრცელეს ირანმა და თურქეთმა, რაც საქართველოსათვის ასევე საზიანო იყო).

მდგომარეობის მკვეთრი შეცვლისთვის ობიექტური პირობები შეიქმნა მას შემდეგ, რაც ივანე მრისხანემ აშკარად და დაუფარავად განაცხადა პრეტენზიები ჩრდილო კავკასიაზე. ჩრდილო კავკასიაში რუსეთის გაბატონების პერსპექტივა, სამხრეთიდან ასეთივე სურვილის მქონე დიდი სახელმწიფოების და ამ ორ დაპირისპირებულ ძალას შორის ამიერკავკასიის, ძირითადად — საქართველოს, არსებობის პირობებში, კვლავ აქტუალურს ხდიდა ამიერკავკასიაში გადმოსასვლელი გზების გახსნა-ჩაკეტვის ფუნქციას, საშუალებას აძლევდა ქართულ დიპლომატიას რეალურად აღედგინა საქართველოსათვის ეს ფუნქცია. ირანის და თურქეთისთვის, რა თქმა უნდა, ცხადი იყო ამიერკავკასიაში რუსეთის გაჭრის პერსპექტივა, ისევე როგორც ცხადი იყო რუსეთისთვის ის, რომ მისი ოპონენტები უბრძოლველად არ დათმობდნენ ამიერკავკასიას; ეს სიტუაცია დარიალის ხეობას კვლავ უმნიშვნელოვანეს ფაქტორად ხდიდა, ხოლო საქართველოს ამოცანას უსახავდა ახალ ვითარებაშიც შეესრულებინა ამ გზის პატრონის მოვალეობები. ეს ამოცანა იმას გულისხმობდა, რომ თავიანთი სიმკათიები და გზის გამოყენების პრიორიტეტი ქართველ პოლიტიკოსებს არ გადაეცათ არავისთვის „უფასოდ“ და ჩაყენებინათ მხოლოდ თავიანთი პოლიტიკური, სახელმწიფოებრივი ინტერესების გრძელვადიან სამსახურში. ქართველმა პოლიტიკოსებმა, როგორც ჩანს, სტრატეგიული შეცდომა დაუშვეს: იმის ნაცვლად, რომ ჰქონ-

ოდათ ლაიერებისა და ბალანსირების პოლიტიკა, ისინი ცალსახად, გამქლავებულად და მაშინვე დადგნენ ერთ მხარეს — ერთ ორიენტაციასზე. ამგვარი ფორსირებული პოლიტიკის შედეგი იყო არა უბრალოდ ის, რომ იკარგებოდა მეორე მხარის პოლიტიკური ნდობა, არამედ მთავრად ის, რომ საქართველო ხელს იღებდა სწორედ ფუნქციასზე, რომლის წყალობითაც ის სახელმწიფოები, ვისთანაც მას პოლიტიკური შეხებები ჰქონდა, ერთმანეთის მეტოქეები უნდა ყოფილიყვნენ არა საქართველოს წინააღმდეგ, არამედ საქართველოსთვის ბრძოლაში, ხოლო ამისათვის რეალურად გაეთვალისწინებინათ არა მარტო საკუთარი, არამედ საქართველოს ინტერესებიც, და ეფიქრათ ყოველ საჭირო შემთხვევაში იმ კომპენსაციებზეც, რასაც საქართველო მიიღებდა. (ასეთი მიდგომა რომ რეალურიც იყო და სათანადოდ აღქმულიც პოლიტიკოსების მიერ, თვალნათლივ ჩანს ნადირ-შაჰის მაგალითიდან: ნადირ-შაჰმა ამკარად აიღო გეზი საქართველოს სახელმწიფოებრივ სტაბილიზაციაზე და ამით თვითონაც მოიგო; საწინააღმდეგო მაგალითი: აღა-მაჰმად-ხანმა არა მარტო საქართველოს ავნო, არამედ საკუთარ თავსაც — ირანს. ამ შემთხვევაში ჩვენთვის კიდევ უფრო ხაზგასასმელი ისაა, რომ საქართველომ, ჩვენმა პოლიტიკამ, თავის დროზე ვერ გამოიტანა სათანადო დასკვნები ნადირ-შაჰის კურსიდან), ჩვენ პირიქით მოვიქცეთ: ჯერ კიდევ მაშინ, როდესაც რუსეთის გაბატონება ამიერკავკასიაში კი არა, ჩრდილო კავკასიაშიც კი არ იყო რეალური (მე-15 საუკუნის 80-იანი წლები — მე-16 საუკუნის 80-იანი წლები), კახეთის მეფე ორ ელჩობას მიავლენს რუსეთში (1483, 1491); შემდეგში, 1587 წელს, ალექსანდრე ლევანის ძე ივანე მრისხანეს „ფიცის წიგნს“ მიართმევს; 1589 წელს რუსეთის მეფე კახეთის მეფეს „წყალობის სიგელს“ უგზავნის.

ნელ-ნელა იკვეთებოდა სიტუაცია, რომ სხვა ქვეყნები საქართველოს, როგორც ჩრდილოეთიდან გადმომავალი გზის მფლობელს, ვერ გამოიყენებდნენ. ირანისა და თურქეთისათვის ერთადერთი დასკვნა რჩებოდა — საქართველოს, როგორც სახელმწიფოს, განადგურება (რაშიც მათ აქტიურად ჩააბეს კავკასიის მთის მოსახლეობა); პარადოქსი ის იყო, რომ პერსპექტივაში, თავისი მიზნების განხორციელების დაკვალად. იგივე დასკვნა მისაღები იქნებოდა რუსეთისთვისაც, რადგანაც მას საქართველო აღარ დასჭირდებოდა — საქართველო თავის ტრადიციულ ფუნქციას თანდათანობით კარგავდა. ის, რასაც საქართველო კარგავდა, საერთაშორისო ფუნქცია იყო.

ასე და ამგვარად, იმ უბედურების მიზეზი, რაც მე-18 საუკუნის გასრულების შემდეგ განხორციელდა, იყო ის, რომ საქართველომ დაკარგა, ვერ გამოიყენა მის ხელთ არსებული გეოპოლიტიკური და გეოსტრატეგიული სიკეთენი, ვერ აწარმოა შესაბამისი პოლიტიკური თამაში.

მაგრამ ყველაფერი, რაც ზემოთ ითქვა, მოვლენათა ახსნის ერთ-ერთი ვერსიაა. სრულებითაც არ არის გამოირიცხული მეორენაირი ინტერპრეტაცია: იმ პერიოდში, რომელზეც საუბარია, ქართულ პოლიტიკას არ დაეიწყნია თავისი ქვეყნის ტრადიციული საერთაშორისო ადგილი და ფუნქცია, არ გადაუხვევია გონიერი მანევრირების გზიდან, მოკავშირეთა ძიებაში ფართე არჩევანის ქონის და, აქედან გამომდინარე, წონასწორობის დაცვის გზიდან (გაეიხსენოთ, თუნდაც, სულხან-საბას ვოიაჟი ევროპაში, ან გარკვეულ ეტაპზე ერეკლეს თამაში ჩრდილოეთსა და სამხრეთს შორის), პირიქით — გადახრა. თანაც დემონსტრაციული, ჩრდილოეთიდან გამოჩენილი ახალი ძალის მხარეს სწორედ მომგებიანი პოლიტიკური თამაშის დაწყება იყო ახალ სიტუაციაში. სწორედ ტრადიციული მოძალადეების დაწოლის განეიტრალებისკენ ან გაწონასწორებისკენ მიმართული ლოგიკური ნაბიჯი იყო (სხვა საკითხია, რომ საბოლოოდ წარმატება ვერ იქნა მოპოვებული). მაშინ საერთო დასკვნა მხოლოდ ასე უნდა ჩამოეყალიბოთ: თავისი სტრატეგიული პოზიციის მაქსიმალურ და წარმატებით გამოყენებაში საქართველოს, საერთაშორისო კონიუნქტურის გარდა, გადაჭრით შეუშალა ხელი იმან, რომ საქართველო აღარ არსებობდა, — იყვნენ დაქუცმაცებული ქართული პოლიტიკური ერთეულები, რომელთაც ცალკეულად იგივე შესაძლებლობანი და უპირატესობანი არ გააჩნდათ, რაც ერთიან საქართველოს, და არც ამ ცალკეული შესაძლებლობებისა და უპირატესობების მექანიკური ჯამი უდრიდა იმ ოდენობას, რაც ერთიან საქართველოს ჰქონდა...

მე-19 საუკუნე დაიწყო იმით, რომ საქართველოს არც საგარეო პოლიტიკა ჰქონდა, არც საგარეოპოლიტიკური ორიენტაციის პრობლემა: საქართველო აღარ იყო სახელმწიფო, იმის შესახებაც კი არ შეიძლება ლაპარაკი, რომ მის გარეთ მეტროპოლია არსებობდა, — საქართველოს, როგორც საზოგადოებას, დარჩა ერთადერთი პრობლემა, ეს იყო მისი, საზოგადოებას, დამოკიდებულება რუსეთთან.

ახალი ეტაპი საუკუნის მეორე ნახევრიდან იწყება. დღეს ძნელია ცალსახად იმის განსაზღვრა, თუ რა ორიენტაციაზე იდგა ილია:

ჭავჭავაძე, მაგრამ ერთი რამ ცხადია: ილიამ და მისმა თანამებრძოლებმა, რომელთაც ქვეყნის დამოუკიდებლობის იდეა ასულდგმულე-ბდათ, პრაქტიკულად — და, რა თქმა უნდა, არა იურიდიულად — მი-აღწიეს საქართველოს ავტონომიას რუსეთის იმპერიის შემადგენ-ლობაში (ბანკი, „დედა ენა“, წერა-კითხვის გამავრცელებელი საზო-გადოება, ქართული პრესა, ქართული წიგნი, ქართული თეატრი, ქარ-თული ისტორიოგრაფია...), მიაღწიეს იმას, რომ ორი გუბერნიის ფორმალურ ფონზე აღდგა საქართველოს ცნება, აღდგა, შესაბამისად, მეორე ცნებაც — ქართველი, რომელიც დაუპირისპირდა ზოგად „კავკასიელს“.

ყველაფერი ეს იმასაც ნიშნავდა, რომ აღდგენას იწყებდა ერთიანი ქართული პოლიტიკური აზროვნება, არა ქართლ-კახეთის, არა იმერეთის და ა. შ., არამედ სწორედ ერთიანი ქართული. ის, რომ ამ ერთიან ქართულ აზროვნებაში იყო სხვადასხვა, ზოგჯერ ურთიერთგამომრიცხავი, მიდგომა, არაფერს არ ცვლის — ეს იყო მსოფლმხედველობრივი ან პარტიული პლურალიზმი სწორედ საერთო-ქართულ პოლიტიკურ ხედვაში, და არა დანაწევრებულ საქართვე-ლოზე ორიენტირებული ხედვა.

ამრიგად, იმ სამი ელემენტიდან, რომელიც ქმნიდა ჩვენს პო-ლიტიკურ, კერძოდ — საგარეოპოლიტიკურ, დოქტრინას, პირველად დაიწყო აღდგენა ერთიანი ქართული პოლიტიკის ფაქტორმა.

სხვა საკითხია, რომ მის შიგნით წარმოშობილი პლურალიზმიც თავისთავად რთულ პრობლემებს ქმნიდა მაშინაც და შემდგომაც. წინააღმდეგობები უკვე 60-იან—90-იან წლებშიც აშკარა იყო, ხო-ლო მომდევნო საუკუნის დამდევისათვის უკვე მკვეთრი დიფერენცი-რება მოხდა პარტიებსა და მიმდინარეობებს შორის (რასაც დიდად შეუწყო ხელი უცხო გარემოში შემუშავებული სოციალისტური იდე-ეების დანერგვამ). არჩილ ჯორჯაძის სიცოცხლეში (გარდ. 1913 წ.) ჯერ კიდევ ბევრი დაბრკოლება ელობებოდა ილიას გზის უარყოფას, ჯორჯაძე თავგამოდებით ცდილობდა 1905—1907 წლების რევოლუ-ციის მიერ პრაქტიკულად უკუგდებული საერთო ნიადაგის იდეის ხორცშესხმას. 1909 წ. გამოქვეყნებულ ნაშრომში — „შეთანხმების იმედი (1903 წლიდან 1909 წლამდე)“ იგი დაჟინებით, თუმცა დიდი ტაქტით, მოუწოდებდა საზოგადოებას, პოლიტიკურ პარტიებსა და მიმდინარეობებს, რამ აუცილებელი იყო რუსეთთან დამოკიდებულე-ბის საკითხში ერთიანი შეხედულების შემუშავება და ერთი ფრონტით

შოქმედება. მან თითქოს შეძლო დაერწმუნებინა ოპონენტები უმთავრესში: რუსეთთან დამოკიდებულების სფეროში პარტიებსა და მიმდინარეობებს შორის საერთო უფრო მეტია, ვიდრე სადაო. მაგრამ, საბოლოოდ, ვერც ამ მოწოდებებმა, ვერც, ზოგადად, საერთო ნიადაგის იდეამ განხორციელება ვერ პოვა.

1905—1907 წლების რევოლუციის შემდგომ რუსეთთან დამოკიდებულების საკუთარი კონცეფციები წარმოადგინეს: სოციალ-დემოკრატიებმა, სოციალისტ-ფედერალისტებმა და ეროვნულ-დემოკრატიებმა.

ეროვნულ-დემოკრატიები (რევზ გაბაშვილი, დათა ვაინაძე, შალვა ქარუმიძე, გიორგი გვაზავა, სპირიდონ კელია და სხვ.) ყველაზე ახლოს იდგნენ ილია ჭავჭავაძესთან. გულში რა ედოთ, ძნელი მისახვედრი არ არის, მაგრამ ლეგალურ გამოცემებში ეროვნულ-დემოკრატიებს საქართველოს სახელმწიფოებრივი დამოუკიდებლობის მოთხოვნა არ წამოუყენებიათ, ისინი მხოლოდ რუსეთის სახელმწიფოს შემადგენლობაში ფართე ეროვნული ავტონომიის მოთხოვნით იფარგლებოდნენ. თუმცა ისიც უნდა აღინიშნოს, რომ ცოტა მოგვიანებით ეროვნულ-დემოკრატიების (გ. გვაზავა) მიერ გეორგიევსკის ტრაქტატის პირობების აღდგენის მოთხოვნა თავისთავად ნიშნავდა, რომ ამ მიმდინარეობას ფართე ავტონომია არ აკმაყოფილებდა და სახელმწიფოებრივი დამოუკიდებლობის აღდგენის საკითხს აყენებდა.

სოციალისტ-ფედერალისტებს (გიორგი ლასხიშვილი, გრიგოლ რცხილაძე, სამსონ ფირცხალავა და სხვ.) მიაჩნდათ, რომ იმ ეტაპზე რუსეთის შემადგენლობაში ფედერაციის განხორციელება დიდ მონაპოვრად უნდა ჩათვლილიყო.

სოციალ-დემოკრატიები (ნოე ჟორდანი, ნოე რამიშვილი, კარლო ჩხეიძე, ირაკლი წერეთელი და სხვ.) თვლიდნენ, რომ სოციალიზმის ინტერესები მოითხოვდა რუსეთში უნიტარული სახელმწიფოს შენარჩუნებას, არა ავტონომიებად რუსეთის ხალხების დაშლას, არამედ მათ გაერთიანებას სოციალისტური რევოლუციის განხორციელების მიზნით. ეროვნული საკითხი, სოციალ-დემოკრატიების აზრით, მხოლოდ სოციალური რევოლუციის შემდეგ გადაიჭრებოდა. (ეროვნული საკითხისადმი ასეთ ნიჰილისტურ მიდგომას არ დაეთანხმნენ ცნობილი სოციალ-დემოკრატიები ვლადიმერ დარჩიაშვილი და აკაკი ჩხენკელი: დარჩიაშვილმა სოციალ-დემოკრატია რიგები დატოვა, ხოლო ჩხენკელმა კონფლიქტს თავი აარიდა და თავის შეხედულებებზე დროებით უარი თქვა).

როგორც არ უნდა ყოფილიყო ეროვნულ საკითხთან დამოკიდებულება, მნიშვნელობა არ ჰქონდა – ყველა პოლიტიკური პარტია და მიმდინარეობა ეროვნულ მოძრაობას განიხილავდა როგორც სერიოზულ ძალას, რომელსაც რუსეთის იმპერიაში დიდი პერსპექტივები ჰქონდა. სრულიად საწინააღმდეგოდ დააყენა საკითხი იოსებ ჯულაშვილმა (სტალინმა). მან, მისთვის დამახასიათებელი გამბედაობით (არად ჩააგდო ცნობილი ავტორიტეტების – რუდოლფ შპრინგერის, ოტტო ბაუერის, კარლ კაუცკის, გიორგი პლეხანოვის, ნოე ჟორდანას, არჩილ ჯორჯაძის, ელადიმერ ლენინის შეხედულებანი) ჩამოაყალიბა შემდეგი დასკვნები: 1) რუსეთის იმპერიას, მის პოლიტიკურ, ეკონომიკურ და სოციალურ სისტემას, იმპერიაში მცხოვრები დაპყრობილი ხალხების ეროვნული მოძრაობა ვერ დაანგრევდა, თუნდაც ყველა ჩაგრული ერი ერთდროულად აჯანყებოდა მეტროპოლიას; 2) შორეულ მომავალშიც კი წარმოუდგენელი იყო რუსეთის იმდაგვარი დემოკრატიზაცია, რომ მას დაპყრობილი ერებისთვის ავტონომიები ებოძებინა, პირიქით – მოსალოდნელი იყო ველიკორუსული შოვინიზმის მკვეთრი გაძლიერება, პატარა ერების ასიმილაციის დაჩქარება; 3) დაპყრობილი ხალხების ეროვნული მოძრაობა არ შეიძლებოდა განხილულიყო როგორც მოკავშირე ძალა სოციალისტური რევოლუციისთვის ბრძოლაში (ეროვნული მოძრაობა არსად არ სცნობდა სოციალური მოძრაობის პრიმატს; „სოციალისტური სამოთხის“ დაპირებით ეროვნული მოძრაობის „მოთვინიერება“ შეუძლებელი იყო).

ი. სტალინის ნაშრომში „მარქსიზმი და ნაციონალური საკითხი“ (1913 წ.) სწორედ ესაა მთავარი და არა ის, თუ როგორ განმარტა მან ერის ცნება და სწორია თუ არა ეს განმარტება.

ქართულ სინამდვილეში სტალინის დასკვნის მნიშვნელობა ან ვერ გაიგეს, ან არ გაიგეს (უფრო სავარაუდოა მეორე). ყოველ შემთხვევაში, ყველანი ძველ შეხედულებაზე რჩებოდნენ: სოციალ-დემოკრატებს კიდევ ჰქონდათ იმედი, რომ ეროვნულ მოძრაობას გაასოციალისტურებდნენ, თავიანთი მხრივ, არც ეროვნულ-დემოკრატები და სოციალისტ-ფედერალისტები კარგავდნენ თავიანთ იმედებს. არც რუსეთში მიუღიათ სტალინის დასკვნები სერიოზულად. სულ მალე მოვლენათა განვითარებამ დაადასტურა ამ შეხედულებათა ჭეშმარიტება.

რა გეგმებს უსახავდა სტალინი საკუთრივ საქართველოს, დღეს ამის მხოლოდ რეკონსტრუირება შეიძლება — გამოძვინარე მისი ზოგადი შეხედულებებიდან ნაციონალურ საკითხზე და განსაკუთრებით იქიდან, რაც პრაქტიკულად განხორციელდა საქართველოს მიმართ დღემდე ჩათვლით. სტალინის გეგმა მარტივი (ერთი შეხედვით) და რეალისტური იყო: ჯერ იმპერიის დანგრევა, შემდეგ — ახლის შექმნა, რომელშიც საქართველოსთვის ახალი, ფორმალურად სახელმწიფოებრივი, ადგილის მოპოვება იქნებოდა შესაძლებელი, ამასობაში ქვეყნის (სახელმწიფოს) ფაქტიური შექმნა იმ თეორიული მომავლის გათვალისწინებით, რომელიც რეალური უნდა გამხდარიყო განვითარების გარკვეულ ეტაპზე, მოვლენათა მსვლელობის დაკავალად, შესაბამისი შინაგანი და საერთაშორისო კონიუნქტურის არსებობის პირობებში, — ერთხელ და სამუდამოდ...

პირველმა მსოფლიო ომმა ბევრი რამ შეცვალა ჩვენს აზროვნებაში, კერძოდ — რუსეთთან დამოკიდებულების საკითხში. ამ თემაზე ხმამაღალი ლაპარაკი ომის, ადმინისტრაციულ-პოლიტიკური რეჟიმის გამკაცრების, პირობებში, რა თქმა უნდა, გაძნელებული იყო. ამ შემთხვევაში თავისი ისტორიული მისია კარგად შეასრულა ქართულმა ემიგრაციამ, რომელმაც არა მარტო სახელმწიფოებრივი დამოუკიდებლობის იდეა წამოაყენა, არამედ მოახერხა გაფორმებულიყო ორგანიზაციულადაც („საქართველოს დამოუკიდებლობის კომიტეტი“), უფრო მეტიც — აჯანყების მოწყობის მიზნით საქართველოში თავისი სპეციალური დესპანიც მოავლინა (მიხაკო წერეთელი, ემიგრაციის ლიდერი).

მსოფლიო ომის ფონზე წარმოშობილი სიახლე ის იყო, რომ საქართველოში აღდგა საგარეოპოლიტიკური აზროვნება (შესაბამისად — პოლიტიკურ ორიენტაციასთან დაკავშირებული პრობლემატიკა), რომელიც ჯერ მხოლოდ ემბრიონალური იყო (რაც ბუნებრივია სახელმწიფოებრიობადაკარგული საზოგადოების პირობებში), მაგრამ რომლიც ხედვის არეშიც უკვე არა მარტო რუსეთი იყო არამედ — გლობალური სიტუაცია, დაკავშირებული ომის მსვლელობასთან.

სოციალისტ-ფედერალისტებმა თავიანთი დამოუკიდებელი პოზიცია პრაქტიკულად დაკარგეს, ერთმანეთს დაუპირისპირდა ორი შეხედულება — სოციალ-დემოკრატებისა და ეროვნულ-დემოკრატებისა. ეროვნულ-დემოკრატების აზრით, ომში რუსეთის დამარცხება დიდად შეუწყობდა ხელს ქართველი ერის თვითგამორკვევის (თვითგანსახ-

ღერის) საქმეს. სოციალ-დემოკრატები მიუთითებდნენ, რომ ომში დამარცხებით, მარიალია, გაადვილდებოდა რუსეთის პრობლემის მოხსნა, მაგრამ არანაკლები სიმწვავეთ დადგებოდა თურქეთის პრობლემა. ეს მომენტი არც ეროვნულ-დემოკრატებს ავიწყებოდათ, მაგრამ ვარაუდობდნენ ევროპის ქვეყნების დახმარებით ძალთა დაბალანსებას (ამ შემთხვევაში გარკვეულ როლს თამაშობდა ეროვნულ-დემოკრატების მჭიდრო იდეური კავშირი ქართულ ემიგრაციასთან). სოციალ-დემოკრატები თურქეთის პრობლემის გადაჭრას ევროპის ქვეყნების ძალებით არარეალურ საქმედ მიიჩნევდნენ და საკითხს ასე აყენებდნენ: რუსეთის ფაქტორის მოხსნა დაუყოვნებლივ წარმოშობს თურქეთის ფაქტორს, ორივე ფაქტორის ერთდროულად მოხსნა კი არარეალურია.

სასტიკ ომში გახვეულ კონტინენტზე მოვლენათა განვითარების პროგნოზირება ძალიან ძნელი იყო. ამ პირობებში ქართული ემიგრაციის მიერ შემოთავაზებულმა იდეამ რუსეთის წინააღმდეგ აჯანყებისა მხარდაჭერა ვერ პოვა – ქართველი პოლიტიკოსები ფრთხილობდნენ.

იყო კიდევ ერთი ვითარება, რომელიც გაუღენას ახდენდა ჩვენს სინამდვილეზე: ომის წლებში ევროპის ქვეყნებში, კერძოდ დიდ იმპერიებში (რუსეთი, ავსტრია-უნგრეთი, გერმანია), ძალზე პოპულარული გახდა ერთა თვითგამორკვევის ლოზუნგი; ამის გათვალისწინებით, ქართველმა სოციალ-დემოკრატებმა მხარი დაუჭირეს საქართველოს ავტონომიის იდეას. ამას თითქოს უნდა შეერბილებინა წინააღმდეგობა პოლიტიკურ პარტიათა შორის, ერთიანი ფრონტის შემუშავებაც რეალური ჩანდა...

1917 წლის თებერვალში რომანოვების იმპერიამ არსებობა დაასრულა. აღარ არსებობდა ძველი რუსეთი, აღარ არსებობდა მონარქია, რომელმაც 1801 წლის 12 სექტემბერს ქართლ-კახეთის სამეფო გააუქმა და შემდეგ მთელი საქართველო დაიპყრო.

მაგრამ ჯერ კიდევ ბევრი რამ გაურკვეველი იყო.

ჯერ კიდევ არსებობდა რუსეთის უზარმაზარი არმია, რომელიც კავკასიის ფრონტზე იდგა და გასვლას არ ჩქარობდა.

გაურკვეველი იყო რუსეთის დროებითი მთავრობის პოლიტიკა, გაურკვეველი იყო სამხედრო-პოლიტიკური სიტუაცია მსოფლიო ომის ფრონტებზე.

გარკვეული მხოლოდ ერთი რამ იყო: ახლოვდებოდა უდიდესი ცვლილებების დრო; საქართველოსთვის ეს შეიძლებოდა ყოფილიყო იმპერიის გარეშე ცხოვრების, ან რუსეთის დაწოლის გამაწონასწორებელი ფაქტორების არსებობის პირობებში ცხოვრების დრო. ალბათ ეს პერსპექტივა იყო იმის მიზეზი, რომ ის, რაც სახელმწიფოებრივი სუვერენიტეტის მოპოვების შემდეგ იქნებოდა ბუნებრივი — საგარეო-პოლიტიკური აზროვნების დამკვიდრება — საქართველოში ფაქტიურად დამოუკიდებლობის მიღწევამდე განხორციელდა. ქართველი პოლიტიკოსების ინტერესების სფეროში უკვე არა მარტო ერთი, არამედ რამდენიმე სხვადასხვა ქვეყანა იყო, არა მარტო იმპერიის შიდა სიტუაცია, არამედ საერთაშორისო კონიუნქტურა.

სახელმწიფოებრივი დამოუკიდებლობის აღდგენის საკითხი, პირველ ყოვლისა, მოითხოვდა ორი მთავარი ფაქტორის — რუსეთის და თურქეთის ფაქტორების — განხილვას. რა თქმა უნდა, გადამწყვეტი მნიშვნელობისა იყო რუსეთის ფაქტორი, მაგრამ პირველმა მსოფლიო ომმა აშკარა გახადა თურქეთის ფაქტორის აქტუალურობაც. ზოგადი და ტრადიციული მიზეზების გარდა, ამაზე ვითარებაც მიუთითებდა: რუსეთის არმიის მიერ ამიერკავკასიის დატოვება ახალი ოკუპაციის საფრთხეს ბადებდა, ხოლო თურქეთის შემოტევის შემაჩერებელი ძალა რეგიონში არ არსებობდა — ქართული ჯარი სუსტი იყო, სომხური — კიდევ უფრო სუსტი და არაორგანიზებული, აზერბაიჯანელები თურქეთის აგრესიის წინააღმდეგ ბრძოლას საერთოდ არ აპირებდნენ.

პირველი მსოფლიო ომის წლებში ქართველმა პოლიტიკოსებმა რუსეთის და თურქეთის ფაქტორების მოხსნის გეგმა ვერ მონახეს. როგორც ჩანს, მაშინ ეს პრაქტიკულად შეუძლებელი იყო. მითუმეტეს, რომ ომის ვითარებაში ევროპა თავისი პრობლემებით იყო დაკავებული და საქართველოს მოსალოდნელი დამოუკიდებლობისთვის გარანტიების შექმნა არ აინტერესებდა.

ომის მესამე წლის ბოლოსთვის მდგომარეობა ასეთი იყო. რუსეთი წარმატებით იდგა ამიერკავკასიის ფრონტზე და თურქეთის ტერიტორიაზეც იყო შეჭრილი. დროებითი მთავრობის ფუნქციონირების პირობებში საქართველო კვლავ რუსეთის ნაწილს წარმოადგენდა. ამიერკავკასიაში მართვა-გამგეობას განახორციელებდა ოზაკომი („ამიერკავკასიის განსაკუთრებული კომიტეტი“), მაგრამ მის გვერდით არსებობდნენ: მუშათა, ჯარისკაცთა და გლეხთა დეპუტატების საბჭოები (რევოლუციური ხელისუფლების ორგანო) და, რაც მთა-

ვარია, საქართველოს ეროვნული ინტერპარტიული საბჭო, რომელიც 1917 წ. აპრილში შეიქმნა და მოგვევლინა ეროვნული ხელისუფლების ჩანასახის როლში. ცხადია, ამ საზღვრებში ირგანოდან საქართველოზე და დამოუკიდებლობაზე მხოლოდ ინტერპარტიული საბჭო ფიქრობდა.

მაგრამ პრობლემას ის წარმოადგენდა, რომ საბჭოში (სოციალ-დემოკრატები, სოციალისტ-ფედერალისტები, ეროვნულ-დემოკრატები, სოციალისტ-რევოლუციონერები, ალიონელები, რადიკალ-დემოკრატები) გაუთავებელი პოლემიკა მიმდინარეობდა, რაც არ იძლეოდა საშუალებას შემუშავებულიყო ერთი გარკვეული კურსი პოლიტიკური ორიენტაციისა. სერიოზული კამათი იყო, კერძოდ, იმაზეც, გაეწყვიტათ თუ არა სახელმწიფოებრივი კავშირი რუსეთთან (ერთ მხარეს იყვნენ სოციალ-დემოკრატები, სოციალისტ-ფედერალისტები, სოციალისტ-რევოლუციონერები, მეორე მხარეს — ეროვნულ-დემოკრატები). ამასობაში საზოგადოებაში, საზოგადოებრივ-პოლიტიკურ მოძრაობაში, ნელ-ნელა დამკვიდრდა აზრი იმის შესახებ, რომ რუსეთის დემოკრატიული სახელმწიფოს შემადგენლობაში ქვეყნის ცხოვრება შესაძლებელია: ქართული სამეფო-სამთავროების მომსპობი იმპერია აღარ არსებობდა, ოზაკომი სულაც არ ჰგავდა იმპერიისდროინდელ მმართველობას და არც ღრობითი მთავრობა აპირებდა ჯერჯერობით ძველებური კოლონიური რეჟიმის აღდგენას (თავის როლს ისიც თამაშობდა, რომ რუსეთის პოლიტიკური ცხოვრების სათავეში იდგნენ რუსეთის დემოკრატიის ისეთი აღიარებული ქართველი ლიდერები, როგორებიც იყვნენ კარლო ჩხეიძე და ირაკლი წერეთელი). თუმცა ყველა ეს არგუმენტი მხოლოდ იმისთვის კმაროდა, რომ ანტიიმპერიული განწყობილებების შესუსტება ღრობითი მოვლენა ყოფილიყო.

რუსეთისადმი (და მისი დემოკრატიული ლიდერებისადმი—კ. ჩხეიძე, ი. წერეთელი, ა. კერენსკი, მ. სკობელევი და სხვ.) რწმენა, რომელიც ქართულ პოლიტიკურ ელიტას ჯერ კიდევ ჰქონდა, 1917 წ. 25 ოქტომბრის სახელმწიფო გადატრიალების შემდეგ საგრძნობლად განეღობა (თვით ისეთი პრორუსული ორიენტაციის პოლიტიკოსებშიც კი, როგორებიც იყვნენ ნ. ჟორდანიას, ნ. რამიშვილი, ის. რამიშვილი, ე. გეგეჭკორი და სხვ., რომ აღარაფერი ვთქვათ გ. გვაზავაზე, რ. გაბაშვილზე, სპ. კელიაზე, კ. აფხაზზე, დ. ვაჩნაძეზე და სხვ.). საქართველოში კვლავ დაიწყო ფიქრი რუსეთის ფაქტორის მოხსნაზე. მაგრამ, რა თქმა უნდა — არაპროდუქტიულად და არამიზანდარსახულად. ეს ნათლად გამოჩნდა ინტერპარტიული საბჭოს ინიციატივით

მოწვეულ პირველ ეროვნულ ყრილობაზე (1917 წ. 19—24 ნოემბერი), რომლის მონაწილეები პრაქტიკულად სოლიდარულნი იყვნენ ორ საკითხში: პირველი — იმედიანად უყურებდნენ რუსეთში ბოლშევიკური რეჟიმის დამხობის შესაძლებლობას, მეორე — ერთხმად აღიარებდნენ, რომ ამიერკავკასიიდან რუსეთის წასვლა მაშინვე გამოიწვევს თურქეთის აგრესიას; საბოლოოდ, მიზანშეწონილად იქნა მიჩნეული კარგი ურთიერთობების შენარჩუნება კავკასიის ფრონტზე მოქმედ რუსეთის არმიასთან (რომელმაც არ ცნო 25 ოქტომბრის გადატრიალება).

მორიგი გამოფხიზლებისთვის ქართველ პოლიტიკოსებს საბაბი მისცა 1917 წლის ბოლოსა და 1918-ის დასაწყისის ამბებმა, როდესაც ახალმა რუსეთმა სცადა კავკასიის ფრონტიდან მოხსნილი ჯარების გადაადგილება გამოეყენებინა ფართომასშტაბიანი აჯანყების მოსაწყობად და საქართველოში საბჭოთა ხელისუფლების დასამყარებლად (ამიერკავკასიაში საბჭოთა რუსეთის მთავარი აგენტის — სტეფანე შაუმიანის გეგმა). ცდა უშედეგოდ დამთავრდა, 1918 წ. იანვარში რუსეთის ჯარებმა თბილისთან სასტიკი სამხედრო მარცხიცი იწვნის. საბოლოოდ, არმიამ დატოვა საქართველო. პერსპექტივის პოზიციებიდან, ქართველ პოლიტიკოსებს (რომელთაც აღარ ეპარებოდათ ეჭვი ბოლშევიკების იმპერიულ მისწრაფებებში) ორი იმედი-და რჩებოდათ: ერთი — რომ ანტანტის მიერ ინტერვენციის დაწყებას (1918 წ. მარტ-აპრილი) რუსეთის დამარცხება მოჰყვებოდა, მეორე — რომ რუსეთში ბოლშევიკური რეჟიმი საბოლოოდ მაინც დაემხო-ბოდა (ამ ილუზიის გაელენას ჩვენმა პოლიტიკოსებმა გაცილებით გვი-ან, ემიგრაციაში ყოფნის წლებშიც კი, ვერ დააღწიეს თავი).

1918 წლის გაზაფხულზე გაჩაღებულმა სამოქალაქო ომმა უდი-დესი პრობლემები შეუქმნა რუსეთს — მან კონტროლი დაკარგა სა-კუთრივ ველიკოროსიის ტერიტორიის დიდ ნაწილზე. რაც შეეხება ამიერკავკასიას, აქ რუსეთს საკუთარი ინტერესების დაცვისთვის ფაქ-ტიურად არაერთი საშუალება აღარ გააჩნდა. ამრიგად, რუსეთის პრობლემის მოხსნა საქართველოსთვის რუსეთშივე შექმნილმა ვითა-რებამ გახადა რეალური. მაგრამ მაშინვე გახდა აშკარა მეორე რეა-ლობა: საქართველოსთვის პრობლემები ასე მარტივად არ წყდებოდა — საქართველოსა და მთელი ამიერკავკასიის (ამიერკავკასიის ფედე-რაციული დემოკრატიული რესპუბლიკა) მიმართ თავისი აგრესიული გეგმების განხორციელებას შეუდგა თურქეთი (ამისთვის მას ხელსაყ-

რელ ფონს ბრესტ-ლიტოვსკის ზავის პირობებიც უქმნიდა). რეალობა იყო ისიც, რომ ამიერკავკასიის ერების სამოკავშირეო სახელმწიფო მკედრადშობილი გამოდგა. 1918 წ. აპრილ-მაისისთვის სომხეთი თითქმის მთლიანად თურქების მიერ იყო ოკუპირებული.

ქართველი პოლიტიკოსების სასარგებლოდ უნდა ითქვას, რომ მათ შეძლეს სიტუაციაში დროული ორიენტირება: რუსეთის ფაქტორის მოხსნის პირობებში, მთელი ყურადღება თურქეთის აგრესიის აღკვეთისკენ მიმართეს. ქართველმა დიპლომატებმა (აკ. ჩხენკელი, ნ. ნიკოლაძე) ზედმიწევნით ზუსტად შეაფასეს საერთაშორისო ვითარება (1918 წ. მაისის დამდეგი და შუა ხანები) და გერმანიის ფაქტორის ამოქმედება გადაწყვიტეს — გერმანიას მიმართეს დასახმარებლად. ეს, შექმნილ სიტუაციაში, ერთადერთი სწორი და რეალური აქცენტი იყო პოლიტიკური ორიენტაციის კურსის შერჩევაში: მართალია, უფრო შორეული მომავლის პოზიციებიდან არც ამ არჩევანს ჰქონდა პერსპექტივა, მაგრამ, მეორე მხრივ, მიმდინარე მომენტის პოზიციებიდან, მხოლოდ მას შეეძლო შეექმნა ქმედითი დაბრკოლებები სამხრეთიონ მომავალი საფრთხისათვის. თურქეთი ხანდახან კიდევ ეურჩებოდა ხოლმე გერმანიას, მაგრამ საბოლოოდ, სურდა თუ არ სურდა, უნდა გაეთვალისწინებინა გერმანიის, როგორც მსოფლიო იმში მისი მოკავშირის, მოთხოვნები. გერმანიის დიპლომატიამ აქტიური თანამშრომლობა დაიწყო ქართველ კოლეგებთან, ბევრ მნიშვნელოვან საკითხში გაარკვია ისინი, კერძოდ, როგორც ჩანს, სწორედ მან აცნობა ქართველ პოლიტიკოსებს, რომ მოსალოდნელი იყო რუსეთ-თურქეთის ფარული ალიანსი — ერთი მხრივ, დამლუპველი საქართველოსთვის, მეორე მხრივ, საზიანო გერმანიის აღმოსავლური პოლიტიკისთვის. ამრიგად, ინტერესები ამ შემთხვევაში ორმხრივი და დაბალანსებული იყო: საქართველოს გერმანია სჭირდებოდა თურქეთის პრობლემის მოსახსნელად, საქართველო გერმანიისათვის საჭირო იყო აღმოსავლური პოლიტიკის წარმოებაში ფორპოსტის როლში.

ეს უკანასკნელი გარემოებაც ობიექტურად იყო განპირობებული: ანგლოფილური სომხეთის და თურქოფილური აზერბაიჯანის არსებობის პირობებში, ამიერკავკასიაში გერმანიის ერთადერთი მოკავშირე მხოლოდ საქართველო შეიძლებოდა ყოფილიყო. ბუნებრივი იყო, რომ სწორედ გერმანიის დიპლომატიამ მიანიშნა ქართველ პოლიტიკოსებს ამიერკავკასიის სამოკავშირეო სახელმწიფოს დაშლის აუცილებლობაზე.

ასე რომ, 1918 წ. 26 მაისის აქტი — საქართველოს სახელმწიფო-
ებრივი დამოუკიდებლობის აღდგენა — არავითარ შემთხვევაში არ იყო
ქართველ პოლიტიკოსთა მხრიდან მხოლოდ პატრიოტული ენსტი, ამ
აქტს ობიექტური დასაყრდენი ჰქონდა: იგი რეალური იყო იმის გამო,
რომ შესაძლებელი შეიქნა ორი ფაქტორის — რუსეთისა და თურქე-
თის ფაქტორების — მოხსნა.

რუსეთთან დაკავშირებით ჩვენ ეს ყოველთვის გვახსოვს, მაგრამ
გაცილებით ნაკლებად ვაქცევთ ყურადღებას (და ეს საბოლოოდ ხელს
გვიშლის არა მარტო 1918 წლის მოვლენებში გარკვევაში, არამედ
შემდგომი განვითარების შეფასებაშიც, და, საერთოდ, საქართველოს
ისტორიული ბედის განსაზღვრაში) იმ გარემოებას, რომ საქართვე-
ლოს დამოუკიდებლობის რეალურობა სხვა — არა მარტო რუსეთის —
ფაქტორების ნეიტრალიზებასთანაც იყო და არის დაკავშირებული.
ამავე კონტექსტში (1918 წლის გერმანიის გახსენებით): ყველაფერი
ეს აუცილებლად მოითხოვდა და მოითხოვს პოლიტიკური ორიენტა-
ციის სფეროში დაულალავ მუშაობას — ანალიზსა და პროგნოზირე-
ბას, საგარეოპოლიტიკურ კურსში დოზირებული აქცენტების გაკე-
თებასა და ცვლას, ბალანსირი-ქვეყნების არჩევანის შექმნას...

1918 წლის 26 მაისიდან ნოემბრამდე საქართველოს დამოუკი-
დებლობის გარანტიის როლს ფაქტიურად გერმანიის იმპერია ასრუ-
ლებდა. პოლიტიკური ორიენტაციის შეცვლასთან დაკავშირებული
საფრთხე ნულს უდრიდა რუსეთში სამოქალაქო ომის მძვინვარების
გამო (1918-20 წ.წ.). მაგრამ მოვლენები კალეიდოსკოპურად იცვლე-
ბოდა და თანდათანობით ცხადი ხდებოდა, რომ საქართველოსთვის
ბედნიერებაზე ფიქრი ჯერ ნაადრევი იყო. გერმანია ომში დამარცხ-
და, ქვეყანაში რევოლუცია დაიწყო, გერმანიის ჯარებმა საქართველო
დატოვეს, გერმანოფილური საგარეოპოლიტიკური კურსი დასრულდა;
საბჭოთა რუსეთმა გაიმარჯვა სამოქალაქო ომის ფრონტზე; დაახ-
ლოება დაიწყო რუსეთმა და თურქეთმა; ომში გამარჯვებულმა ქვეყ-
ნებმა (ინგლისი, საფრანგეთი, ამერიკის შეერთებული შტატები) სა-
ქართველო და მთელი ამიერკავკასია რუსეთის გავლენის სფეროდ აღ-
იარეს. აი, მოვლენები, რომლებმაც ფაქტიურად წინანდელი ვითარება
დააბრუნეს: ქართული სახელმწიფოებრიობის პრობლემა ისევ მხოლოდ
რუსეთთან გახდა დაკავშირებული და მასზე დამოკიდებული. ამ ვითა-
რების ნეიტრალიზების მცდელობა ამჯერად მარცხით დასრულდა.

1918 წლის ნოემბრის შემდეგ ქართველ პოლიტიკოსებს ფაქ-

ტიურად არ ჰქონიათ გამოკვეთილი სახით პოლიტიკური ორიენტაციის კურსი (ისევე როგორც რუსეთის მოსალოდნელი აგრესიისაგან თავის დაცვის პოლიტიკური გეგმა). ეს არ ნიშნავს იმას, რომ არაფერი კეთდებოდა, პირიქით: 1920 წ. 7 მაისს დაიდო რუსეთ-საქართველოს ხელშეკრულება; 1919-20 წლებში ქართველი პოლიტიკოსები (ა. ჩხენკელი, ე. გეგეჭკორი, კ. ჩხეიძე, ირ. წერეთელი და სხვ.) თავგამოდებით მუშაობდნენ ანტანტის ქვეყნებთან. ანტანტა მართლაც წარმოადგენდა ერთადერთ სერიოზულ ძალას, რომელსაც შეეძლო საქართველოს დამოუკიდებლობის გარანტიის როლი შეესრულებინა, მაგრამ არც პარიზის კონფერენცია, არც ცალკე აღებული რომელიმე დიდი ქვეყანა არ დათანხმდა წინ აღდგომოდა რუსეთის შემოსვლას საქართველოში (ევროპის პოლიტიკოსთა დიპლომატიური ჟესტები, რა თქმა უნდა, საქმეს ვერ უშველიდა). მიუხედავად მცდელობებისა, ქართველმა პოლიტიკოსებმა რუსეთის გავლენის სფეროდან საქართველოს გამოყვანა ვერ შეძლეს, არარუსული პოლიტიკური ორიენტაციის კურსი წარმატებით ვერ დაგვირგვინდა. ეს იყო ობიექტური მოცემულობა, რომელიც განსაზღვრა პირველი მსოფლიო ომის შემდეგ შექმნილმა საერთაშორისო სიტუაციამ. საბჭოებს შესაძლებლობა მიეცათ პოლიტიკური და სამხედრო თვალსაზრისით კარგად მოემზადებინათ საქართველოს ოკუპაცია...

მნიშვნელობა იმ ბედნიერი ეპოქისა, რომელსაც საქართველომ დემოკრატიული რესპუბლიკის ეპოქა ჰქვია, ჩვენს ისტორიაში ძნელია გადაჭარბებით შეფასდეს. საქართველომ გაიხსენა და გაახსენა სხვებს, რომ იგი სახელმწიფოა, ხოლო ჩვენთვის, ამ ნარკვევში, საინტერესო საკითხის პოზიციებიდან, დარწმუნდა და დაარწმუნა სხვები, რომ შეიძლება ყველაფრის აღდგენა, რომ იგი უკვე მზადაა იყოს თანამედროვე სახელმწიფო, რომლის განსაკუთრებული მნიშვნელობა უნდა აღიაროს ყველამ, ვისაც რაიმე პოლიტიკური კავშირი ექნება მოცემულ რეგიონთან. ცხადი გახდა, კერძოდ: 1) რომ კვლავ და საბოლოოდ არსებობს ერთიანი საქართველო, რომელსაც ძალუძს ერთიანი სახელმწიფოებრივ-პოლიტიკური დოქტრინის შექმნა და განხორციელება; 2) რომ საქართველოსთვის რეგიონულ ლიდერობაზე პრეტენზიის განცხადება სრულიად რეალურია; 3) რომ საქართველო ისევ საინტერესო ქვეყანაა — არა მარტო უშუალო მეზობლებისათვის, არამედ სახელმწიფოთა მთელი წყებისათვის, და მას შეუძლია თავისი ტრადიციული საერთაშორისო ფუნქციების შესრულება, რაც

კონიერული ბალანსირების პოლიტიკის განხორციელებისათვის იძლევა საშუალებას; 4) და ბოლოს – რომ, ყოველივე აქედან გამომდინარე, მარცხი დროებითია, ისტორიული პროცესის დაგვირგვინება მხოლოდ დროშია გადავადებული.

დღეს ყოველივე ამის დრო დადგა – დადგა დრო იმის განხორციელებისა, რაც ექსპერიმენტის სახით 1918-21 წლებში გავიარეთ. უფრო მეტიც, დღეს უკვე დაწყებულია რეალიზება: 1) საქართველოს გეოპოლიტიკური უპარატესობებისა (რა თქმა უნდა, შესაბამისი სირთულეების არსებობის ფონზე); მართალია, ჩვენთვის ბლოკირებულია ჩრდილოეთიდან მომავალი გზის გამოყენების შესაძლებლობები, მაგრამ ძალაშია სამხრეთიდან გამავალი კარის კონტროლის ფუნქცია; რაც მთავარია, აქტუალიზებულია – შესაძლოა, წინანდელზე უფრო მეტად – ორ ზღვას შუა მდებარე გზის, ტრანსკავკასიური დერეფნის, ფაქტორი; 2) საქართველოს ადგილისა პლანეტის მოცემულ, ერთ პატარა, ნაწილში: შექმნილ კავკასიურ სიტუაციაში საქართველოს ამკარად შეუძლია იყოს რეგიონული ლიდერი, ცივილიზებული, მისაღები არა მარტო ადგილობრივი სუბიექტებისათვის, არამედ მთლიანად მსოფლიო თანამეგობრობისათვის; გარდა ამისა, კვლავ, ახალი ძალით, ხდება აქტუალური საქართველოს, როგორც სხვადასხვა პოლიტიკური ინტერესებისა და სხვადასხვა ცივილიზაციათა მიჯნაზე მყოფი ქვეყნის, როლი, გარკვეული ევრაზიული შესაყარის როლი მოცემულ რეგიონში (კონკრეტული სამომავლო რეალიზებით: შეხვედრების ადგილი, შტაბ-ბინების ადგილი და ა. შ.), 3) იმ კონიერული ბალანსირების პოლიტიკისა, რომელიც მცირერიცხოვანი ქვეყნების მთავარი პრაქტიკული იარაღია; შეიძლება ითქვას, რომ საქართველომ, როგორც გეოგრაფიულ, ფინანსურ, ეკონომიკურ, პოლიტიკურ შესაყარებზე მდებარე ქვეყანამ, უკვე დაიწყო ამ პოლიტიკის განხორციელება, იმის თქმაც შეიძლება, რომ დაიწყო წარმატებით, რაც დღეს უკვე იძლევა საშუალებას ზომიერი გადახრაც კი გაკეთდეს პოტენციური პოლიტიკური მოკავშირეების ფართე არჩევანში.

არჩევანი ახლადფეხადგმულ სახელმწიფოს აქვს. ნეიტრალური პოზიციის ტრადიციებიც აქვს. სასწავლიც ბევრი აქვს. ჩვენ თავიდან უნდა ვისწავლოთ, რომ საგარეო პოლიტიკაში განყენებული მორალის კატეგორიებისათვის უპირატესობის მინიჭება, საკუთარ პრაგმატულ გეოპოლიტიკურ ინტერესებთან შედარებით, ნიშნავს დამარცხებას პერსპექტივაში.

ბანუოფელი საქართველოსათვის

„ქართლად ფრიალი ქუეყანაჲ აღირაცხების“...

დასაწყისისათვის — ორი ციტატა აღრინდელი პუბლიკაციებიდან.

პირველი: „მაუხედავად იმისა, რომ ეროვნული კონსოლიდაციის აქტი ათასწლეულზე გაცალებით მეტი ხნის წინ განხორციელდა, შემდგომი განვითარების შედეგად, რუსეთის იმპერიაში შევიდა არა საქართველო, არამედ ქართული სამეფოები და სამთავროები ცალცალკე“ (ა. სილაგაძე, საქართველო 88-90, გვ. 7; სტატია — „ტაძარი“ — დაიბეჭდა 1988 წ. სექტემბერში).

მეორე: „ჩვენი პოლიტიკური ცხოვრების პროვინციულ სცენაზე უკანასკნელი სამი წლის განმავლობაში ზედიზედ დადგმული სამოყვარულო სპექტაკლების შემყურეებმა, ჩვენ ყველაფერი, რაც ხდებოდა ჩვენს ირგვლივ, ისე დავინახეთ, რომ გამოგვჩნა მთავარი. მთავარი კი ის არის, რომ ჩვენ ვიშლებით, ანუ ვუქმდებით.

ჩვენ ვერ ვხედავთ, რომ საქართველო ისტორიულ ზღურბლოან დგას, რაც იმაში გამოიხატება, რომ ისტორიამ არჩევანი შემოგვთავაზა: ვიყოთ თუ არა ჩვენ ანუ საქართველო ერთიანი ქვეყანა, ქვეყანა, რომელიც ღმერთმა გვიბოძა ამ მოცემულ ტერიტორიულ ფარგლებში, ვიყოთ თუ არა ჩვენ ამ მოცემული ტერიტორიის ერთიანი პატრონნი, თუ დავიშალოთ ტერიტორიებად, ხალხებად, ადამიანებად (...).

ჩვენ არც ის გვინდა დავინახოთ, რომ ეს არ არის უკანასკნელ დროს წარმოქმნილად ან გარედან მოსულად დასმული ამოცანა.

(...) საქართველოს დაშლის ანუ მისი გაუქმების პროცესში, უფ-

რო ზუსტად — მცდელობის პროცესში, შეიძლება ერთი, ჩვენთვის არასასურველი, კანონზომიერება ჩამოყალიბდეს.

როგორ მოულოდნელადაც არ უნდა მოგვეჩვენოს, ჩვენი ისტორიის უკანასკნელ მონაკვეთში მისი, ამ პროცესის, შეჩერების მძლავრი ცდა ჩვენი მხრივ განხორციელდა მე-19 ს-ში, ე. ი. მაშინ, როდესაც ჩვენი ანშლუსი მოხდა, როდესაც ჩვენ უნდა გავმჭრაღიყავით რუკიდან, ე. ი. ურთულეს ვითარებაში, როდესაც ერს კოლონიზატორის უმძიმესი პრესი აწვა ზემოდან.

(...) მეორეჯერ ამ პროცესის ნეიტრალიზება ხდებოდა საბჭოთა პერიოდის პირობებში, ე. ი. ისევ უმძიმეს ვითარებაში, როდესაც კვლავ იმპერიის პრესი გვაწვა. და ისევ როგორ მიუღებელიც არ უნდა იყოს ეს მოსაზრება ვინმესთვის, ჩვენ ამ მხრივ კვლავ წარმატებები გვქონდა.

(...) და აი, ყველაფერ ამას მოჰყვა დღევანდელი, რომელიც სწორედ ისტორიულ ზღურბლს ქმნის, რადგანაც ჩვენ დღეს არ გვაწვება ვიდაცის პრესის სიმძიმე (...), როდესაც ჩვენ გვექმნება საშუალება თვითონ განვაგოთ ჩვენი ბედი (...). სწორედ ამ სიტუაციაში შეიძლება ჩამოყალიბდეს კანონზომიერება, რომელიც ზემოთ ვახსენეთ: იმ პირობებში, როდესაც მარტონი ვართ დარჩენილი საკუთარ თავთან, ჩვენ ვერ ვწყვიტთ ჩვენს სასარგებლოდ ამოცანას — გვინდა თუ არა დავშალოთ საქართველო, გვინდა თუ არა გავაუქმოთ იგი, როგორც ასეთი, გვინდა თუ არა დავადგეთ დაღუპვის გზას.

ჯერჯერობით, ჩვენ ვამტკიცებთ, რომ გვინდა“ (ა. სილაგაძე, თვალი გავუსწოროთ სინამდვილეს, გაზ. „საქ. რესპუბლიკა“, 1993 წლის 2 მარტი).

ახლა ვნახოთ, როგორ ებრძოდნენ დამღუპველ პროცესებს ჩვენი უშუალო წინაპრები, რომლებმაც იცოდნენ, რა ფაქტორი იყო წამყვანი ჩვენი სახელმწიფოებრიობის განხორციელების საქმეში.

... ალექსანდრე I დიდის (1412-1442) შემდეგ, XV საუკუნის ბოლოსთვის, საქართველოს დაშლა სამეფო-სამთავროებად უკვე მომხდარი ფაქტი იყო. შემდეგ საუკუნეებში გარკვეული წარმატება იქნა მიღწეული 1762 წელს, როდესაც თეიმურაზ მეორის გარდაცვალების შემდეგ ერეკლე მეორე ქართლ-კახეთის მეფე გახდა. მაგრამ — მხოლოდ გარკვეული. სოლომონ პირველმა (1752-1784) ვერ შეძლო დასავლეთ საქართველოს გაერთიანება: სამეგრელოს, გურიის, აფხაზეთისა და სვანეთის სამთავროები დამოუკიდებელ პოლიტიკურ

ერთეულებად რჩებოდნენ, არცერთი მთავარი იმერეთის მეფის უზუნაესობას არ სცნობდა. ასე რომ, XVIII საუკუნის მეორე ნახევარში, როდესაც რუსეთ-საქართველოს ურთიერთობა ახალ სტადიაში შევიდა, რუსეთის იმპერიამ ურთიერთობას ამყარებს არა ერთიან საქართველოსთან, არამედ ცალკეულ, დამოუკიდებელ ქართულ პოლიტიკურ ერთეულებთან. რუსეთთან დიპლომატიური ურთიერთობა და სამხედრო-პოლიტიკური კავშირი ჰქონდა არა საქართველოს, არამედ ქართლ-კახეთის სამეფოსა და იმერეთის სამეფოს ცალ-ცალკე. 1783 წელს გეორგიევსკში რუსეთის იმპერიასა და ქართლ-კახეთის სამეფოს შორის დადებული ტრაქტატი (ხელშეკრულება) არ შეიძლებოდა გავრცელებულიყო და არც გავრცელებულა სხვა ქართულ სამეფოსამთავროებზე. ისევე როგორც 1801 წლის 12 სექტემბერს ალექსანდრე პირველის მანიფესტით გაუქმდა მხოლოდ ქართლ-კახეთის სამეფო და ოკუპაცია და ანექსია ქართლ-კახეთის მიმართ განხორციელდა. იმერეთის სამეფო 1804 წელს სამხედრო მუქარის პირობებში იქნა შეყვანილი რუსეთის იმპერიის მფარველობაში. 1810 წელს რუსეთმა სამეფო დაიპყრო — ოკუპაცია და ანექსია მხოლოდ იმერეთის სამეფოს მიმართ განხორციელდა. 1803 წელს რუსეთის იმპერიის მფარველობაში შევიდა სამეგრელოს სამთავრო, 1804 წელს — გურიის სამთავრო, 1810 წელს — აფხაზეთის სამთავრო. ოკუპაცია და ანექსია სამთავროების მიმართ ცალ-ცალკე განხორციელდა. 1857 წელს ფაქტიურად, ხოლო 1867 წელს იურიდიულად გაუქმდა სამეგრელოს სამთავრო; 1857 წელს ფაქტიურად, ხოლო 1859 წელს იურიდიულად გააუქმეს სვანეთის სამთავროც. 1864 წელს გაუქმებულ იქნა აფხაზეთის სამთავრო.

ქართლ-კახეთის სამეფოს გაუქმების შემდეგ მთელ აღმოსავლეთ საქართველოს განაგებდა „საქართველოს მმართველობა,“ რომელსაც სათავეში ედგა სამხედრო მოხელე — იგი იმავე დროს კავკასიის ჯარების მთავარსარდალიც იყო. მთავარსარდალის მოადგილე (თანაშემწე) ითვლებოდა „საქართველოს მმართველად“. ქართლ-კახეთი დაყოფილი იქნა მაზრებად (თავდაპირველად — ხუთი მაზრა: თბილის-ლიორეს, გორის, დუშეთის, თელავის, და სიღნაღისა). იმერეთის სამეფოს ტერიტორია, ქართლ-კახეთის სამეფოსგან განსხვავებით, ოლქებად დაიყო (სულ ექვსი ოლქი: ქუთაისის, ვაკის, საჩხერის, ჩხარის, რაჭის და ბაღდაღისა).

საქართველოს ისტორიული ტერიტორიის ნაწილი რუსეთის იმპერიამ თურქეთთან ომების შედეგად ჩაიგდო ხელში. 1806-1812 წლების ომის დასრულების შემდეგ, ბუქარესტის ზავით, სოხუმი რუსეთის შემადგენლობაში შევიდა. 1828-1829 წლების რუსეთ-თურქეთის ომში კვლავ რუსეთმა გაიმარჯვა და ადრიანოპოლის ზავით რუსეთის შემადგენლობაში შევიდა ფოთი, ახალქალაქი, ახალციხე, ასპინძა, აწყური, ხერთვისი, აბასთუმანი და მთელი შავიზღვისპირა ზოლი მდ. ჩოლოქიდან მდ. ყუბანამდე. 1877-1878 წლების ომში მარცხის შემდეგ, სან-სტეფანოს ზავის პირობებისა და ბერლინის კონგრესის გადაწყვეტილების თანახმად, თურქეთმა რუსეთს დაუთმო საქართველოს ისტორიული ტერიტორია: აჭარა, შავშეთი, კლარჯეთი, იმერხევი, კოლა-არტაანი და ოლთისი.

1840 წელს განხორციელდა ამიერკავკასიის ადმინისტრაციული მმართველობის რეორგანიზაცია. მთელი ამიერკავკასია გაიყო ორ ადმინისტრაციულ ერთეულად: საქართველო-იმერეთის გუბერნიად და კასპიის ოლქად. საქართველო-იმერეთის გუბერნიაში შედიოდა თბილისის, გორის, თელავის, გურჯაანის, ქუთაისის, ახალციხის, გურიის, ელიზავეტპოლის, ალექსანდრეპოლის, ერევნისა და ნახჭევანის მაზრები. ამრიგად, საქართველო-იმერეთის გუბერნიაში არაქართული ტერიტორიაც შევიდა (ყოფილი განჯის, ერევნისა და ნახჭევანის სახანოები).

როგორც ზემოთ აღინიშნა, ამ პერიოდისათვის (1840 წ.) ჯერ კიდევ არსებობდა სამეგრელოს, აფხაზეთისა და სვანეთის სამთავროები, მათ შინაგანი ავტონომია შენარჩუნებული ჰქონდათ, ადმინისტრაციული მმართველობის რეფორმა მათ არ შეხებიათ. სამთავროების გაუქმებისა და სამხრეთ-დასავლეთ საქართველოს შემოერთების შემდეგ 1882 წელს ამიერკავკასიის ადმინისტრაციული დაყოფა კვლავ შეიცვალა. ცვლილებები მოხდა შემდეგ ხანებშიც. საბოლოოდ, რუსეთის იმპერიაში შემავალი საქართველოს ისტორიული ტერიტორია დაიყო შემდეგ ადმინისტრაციულ ერთეულებად: თბილისის გუბერნია, ქუთაისის გუბერნია, სოხუმის ოკრუგი, ბათუმის ოლქი და ზაქათალის ოკრუგი. ეს დაყოფა აღარ შეცვლილა რუსეთის იმპერიის აღსასრულამდე.

ცხადია, საქართველოს ადმინისტრაციულ დაყოფას 1802-1917 წლებში თავისი შორს გამიზნული ამოცანები ჰქონდა. შემთხვევითი მომენტი საქართველოს ტერიტორიის ადმინისტრაციულ მოწყო-

ბაში გამოარიცხული იყო. სხვა მიზნებთან ერთად (ქართველთა ასი-მილაკია, დემოგრაფიული სიტუაციის შეცვლა, ეკონომიკური ექსპანსიის გაძლიერება და სხვ.) ადმინისტრაციული დაყოფა მთავარ მიზნად ისახავდა „საქართველოს“ და „ქართველის“ ცნებების მოსპობას. სამეგრელოს, აფხაზეთის და სვანეთის სამთავროების შენარჩუნებაც ამავე მიზანს ემსახურებოდა. რატომ მაინცდამაინც ამ სამთავროებს შეუნარჩუნდათ შინაგანი ავტონომია ნახევარ საუკუნეზე მეტი ხნის მანძილზე? რატომ გააუქმეს გურიის სამთავროს ავტონომია ძალიან მალე (1828-1829 წწ), ან რატომ არ მისცეს შინაგანი ავტონომია, ვთქვათ, რაჭის საერისთაოს? მიზეზი ერთადერთია: პეტერბურგელმა პოლიტიკოსებმა კარგად იცოდნენ, რომ ფეოდალური პარტიკულარიზმის გამოცდილების მქონე სამთავროები გარკვეულ დრომდე ისევ უნდა შეენარჩუნებინათ, გაეღვივებინათ იქ სეპარატიზმი და საქართველოს ცნებიდან გამოეყოთ სამეგრელო, აფხაზეთი და სვანეთი; ამ შემთხვევაში ლინგვისტურმა ფაქტორმა ითამაშა მნიშვნელოვანი როლი. არც ის იყო შემთხვევითი, რომ რუსულ ადმინისტრაციაში პრაქტიკულად დამკვიდრდა ცნებები: იმერელი, მეგრელი, სვანი, გურული, აჭარელი, ქართლელი, კახელი.

სეპარატიზმის გაღვივებას ისახავდა მიზნად ცალკე ადმინისტრაციულ ერთეულებად ბათუმის ოლქის, სოხუმის ოკრუგისა და ზაქათალის ოკრუგის გამოყოფა. პეტერბურგელ პოლიტიკოსებს ამ შემთხვევაში, რა თქმა უნდა, აჭარის, აფხაზეთისა და საინგილოს ეთნოგრაფიულ-რელიგიური პრობლემები არ აინტერესებდათ. საქართველოს ისტორიული ტერიტორია უნდა დანაწილებულიყო — ეს იყო მთავარი. წინააღმდეგ შემთხვევაში, ზაქათალის ოკრუგი (საინგილო) ერთი მაზრის სახით შეიძლებოდა შესულიყო თბილისის გუბერნიაში. ისევე როგორც ბათუმის ოლქი და სოხუმის ოკრუგიც მაზრების სახით შეიძლებოდა გაერთიანებულიყო ქუთაისის გუბერნიაში. და ბოლოს, სავსებით შესაძლებელი იყო მთელი საქართველო იმპერიის შემადგენლობაში შეეყვანათ საქართველოს გუბერნიის სახით (რუსეთის იმპერიაში ტერიტორიისა და მოსახლეობის მიხედვით ამაზე დიდი გუბერნიებიც არსებობდა). მაგრამ ამ შემთხვევაში ერთი ადმინისტრაციული ერთეულის (გუბერნიის) შიგნით იყრიდა თავს საქართველოს ისტორიული ტერიტორია — ეს კი მძლავრი დაბრკოლება იქნებოდა საქართველოს და ქართველის ცნების მოსპობის საქმეში.

საბოლოოდ, ვითარება, რომელიც შეიქმნა, ურთულესი იყო ქვეყნისათვის, არსებითად — დამლუპკველი. ერთი მხრივ, ქვეყანა, როგორც ასეთი, ფაქტიურადაც და იურიდიულადაც არ არსებობდა, მეორე მხრივ, ყველაფერი ისე იყო დაგეგმილი, რომ პერსპექტივაში ერს, როგორც ასეთს, არ ეარსება. მაგრამ ამ მრავალპლანიან გეგმაში, განგების ძალით, ერთი შეცდომა მაინც იქნა დაშვებული, რომელიც — ქართველობის მხრიდან უკომპრომიზობისა და მიზანმიმართული მეცადინეობის შემთხვევაში — შანსს ზრდიდა (ამ აზრს იზიარებს წინამძღვარე ნარკვევის ერთი ავტორი — ა. სილაგაძე, ნაკლებად — მეორე ავტორი, ვ. გურული). საქმე ისაა, რომ თეორიულად გეგმის უფრო კარგი ვარიანტი არსებობდა. საქართველოს ცნების ამოძირკვის მიზნიდან გამომდინარე, არავითარ შემთხვევაში არ იყო მიზანშეწონილი არსებული სტატუს-კვოს შეცვლა, ყველა სამეფო და სამთავრო, რომელიც შევიდა იმპერიის შემადგენლობაში (რასაც სათანადო იურიდიული გაფორმება ახლდა თან), უნდა დარჩენილიყო იმავე ფარგლებში, აღმინისტრაციულ-ტერიტორიული დაყოფა უნდა დარჩენილიყო იმავე ფარგლებში, უნდა დარჩენილიყო სათანადო ნომენკლატურაში (მაზრა იქნებოდა ეს თუ უფრო დიდი ერთეული) იგივე სახელწოდებები (ქართლ-კახეთი, იმერეთი, გურია და ა.შ.). მოხდა პირიქით: შექმნილ სიტუაციაში, მართალია, არ არსებობდა საქართველოს ცნება, მაგრამ, ჯერ ერთი, აღარ არსებობდა არც კუთხეთა სახელწოდებები, მეორეც, თბილისის ცნების ქვეშ გუბერნიად გაერთიანება, ქუთაისის ცნების ქვეშ გუბერნიად გაერთიანება და ა. შ. სწორედ გაერთიანების საქმეს შეიძლებოდა მომსახურებოდა, ე. ი. საქართველოს ცნების რეალიზებას მომავალში. ფაქტიურად, როგორ პარადოქსულადაც არ უნდა მოგვეჩვენოს, გარკვეული თვალსაზრისით წინ გადადგმული ნაბიჯიც კი შეიძლება დავინახოთ იმასთან შედარებით, რაც გვექონდა მე-19 ს-მდე, რატომ უნდა, სასურველი პერსპექტივის პოზიციებიდან: თუ აღდგებოდა ქვეყანა, აღდგებოდა არა ცალ-ცალკე ერთეულები, არამედ რაღაც დოზით გაერთიანებულად. მოვლენათა შემდგომი განვითარება სწორედ ამდაგვარი იყო: როდესაც ცარისტული რუსეთი დაინგრა, 1918 წელს საქართველოში არავის გახსენებია, რომ იმპერიის შემადგენლობიდან განთავისუფლდნენ მასში თავის დროზე შეყვანილი იმერეთი, გურია და ა. შ., გაჩნდა სწორედ ერთიანი დამოუკიდებელი საქართველოს ცნება, ხოლო მისი ტერიტორიული ფარგლების განსა-

ზღერა დაეყრდნო სწორედ იმას, რომ არსებობდა ქუთაისის გუბერ-
ნია (ეს საქართველოა!), თბილისის გუბერნია (ეს საქართველოა!) და
ა. შ.

...მაგრამ ვითარება მართლაც კატასტროფული იყო. ყველაფერი
კეთდებოდა იმისათვის, რომ ისტორიული მეხსიერებიდან საქართვე-
ლო ამოშლილიყო. დრო ცოტა რჩებოდა. მდგომარეობას ისიც ართ-
ულებდა, რომ ადრე არსებობდა ერის სულიერი და მატერიალური
ძალების დამრავლავი, გამაერთიანებელი ორი ძალა — ბაგრატიონთა
სამეფო დინასტია და ქართული ეკლესია. კოლონიურმა ხელისუფ-
ლებამ 1802 წლიდან დაიწყო ქართლ-კახეთის სამეფო სახლის წარმო-
მადგენელთა დევნა და შევიწროება, რაც საბოლოოდ მათი საქართ-
ველოდან გადასახლებით დამთავრდა. იგივე გამეორდა იმერეთშიც.
ბაგრატიონთა სამეფო დინასტიის წარმომადგენლები ერის ბრძოლას
ვეღარ უხელმძღვანელებდნენ. 1811 წელს გაუქმებულ იქნა საქართ-
ველოს მართლმადიდებლური ეკლესიის ავტოკეფალია. საქართვე-
ლოს ეკლესიის მართვა-გამგეობა ჩააბარეს ეგზარხოსს, რომელსაც
რუსეთის უწმინდესი სინოდი ნიშნავდა.

ამგვარ ურთულეს მდგომარეობას საქართველომ ადექვატური
რეაგირება დაუპირისპირა — და ეს იყო ჩვენი ბედნიერება. ეროვნუ-
ლი მოძრაობის მათრგანიშებელი ძალის როლში მოგვევლინა ქართ-
ული ფეოდალური არისტოკრატია. ლაპარაკია, ჩვენდა საბედნიერ-
ოდ, ეროვნულ მოძრაობაზე არა საქართველოს რომელიმე კუთხეში,
არამედ ეროვნულ მოძრაობაზე მთელი საქართველოს მასშტაბით.
1832 წლის შეთქმულება სწორედ ამას დამადასტურებელი იყო.
შეთქმულებს მთელი საქართველოს ბუნებრივად, მათ დამდიეს
არა მარტო ფეოდალური პარტიკულარიზმის ელემენტი მემკვიდრეობა,
არამედ რუსეთის საოკუპაციო ხელისუფლების ენერგიული ღონის-
ძიებების შედეგად გაღვივებული თუ დანერგილი სეპარატიზმი. ეს
მომენტი სწორად შენიშნეს 1832 წლის შეთქმულებაში ჭკვიანმა
რუსმა სახელმწიფო მოღვაწეებმა. 1804 წლის მთიულეთის აჯანყე-
ბა, ან 1812 წლის კახეთის და 1819-20 წლის იმერეთის აჯანყებები
რუსეთის საოკუპაციო ხელისუფლებამ როგორც ჩვეულებრივი „ბუ-
ნტები“ ისე გამოიძია, ხოლო 1832 წლის შეთქმულთა საქმის ძიებას
უზარმაზარი დრო და ენერგია მოახმარა — ყველაფერი ძირფესვიან-
ად გამოარკვია და შესაბამისი დასკვნებიც გააკეთა. იმპერიის მესვე-
ურებს შეთქმულების შედეგები იმდენად არ აწუხებდათ, რამდენადაც

ის, რომ საქართველოში, ერთი მხრივ, მკვიდრდებოდა მათთვის საშიში იდეა, ხოლო, მეორე მხრივ, გამოიძებნა ის ძალა, რომელიც ხვალ შეიძლებოდა სათავეში ჩასდგომოდა ამ იდეის განხორციელებას — მთელი საქართველოს, მთელი ქართველი ერის კონსოლიდაციას რუსეთის ბატონობის წინააღმდეგ ბრძოლაში. სწორედ ამიტომ საოკუპაციო ხელისუფლება არა მარტო დასჯილ, არამედ „შეწყალბულ“ შეთქმულებსაც დიდი გაფაციცებით აღევენებდა თვალყურს.

ის, რაც რუსეთის იმპერიას ძალზე აშინებდა საქართველოში, აღარ გამოვლენილა 1832 წლას შემდეგ მეოთხედ საუკუნეზე მეტი ხნის მანძილზე. მაგრამ XIX საუკუნის 50-იანი წლების მიწურულიდან და 60-იანი წლების დამდეგიდან ვითარება იცვლება. დაიწყო საქართველოსა და ქართველობის გადარჩენისათვის ბრძოლის ახალი, დიდი ეპოქა.

XIX საუკუნის 50-იანი წლების მიწურულიდან და 60-იანი წლების დამდეგიდან სამოღვაწეო ასპარეზზე გამოდის სამოციანელთა დიდი თაობა, რომელმაც გადამწყვეტი როლი შეასრულა ერთიანი საქართველოს აღდგენისათვის ბრძოლაში: ილია ჭავჭავაძე (1837-1907), დიმიტრი ყიფიანი (1814-1887), აკაკი წერეთელი (1840-1915), იაკობ გოგებაშვილი (1840-1912), გიორგი წერეთელი (1842-1900), ნიკო ნიკოლაძე (1843-1928), სერგი მესხი (1845-1883) და სხვ. ეს იყო მოღვაწეთა ბრწყინვალე კრებული, რომელსაც მშვენივრად ესმოდა, რომ, ყოველგვარი მოსამზადებელი ეტაპების გარეშე, მოძრაობა უნდა დაწყებულიყო არა კოლონიზაციის უშუალო შედეგების აღსაკვეთად — ქართული სამეფო-სამთავროების აღსადგენად, არამედ ერთიანი საქართველოს პოზიციებიდან. საქართველოს გამთლიანება ქართული სახელმწიფოებრიობის აღდგენის, მისი დამკვიდრებისა და გაგრძელების ერთადერთი, ისტორიულად გამოცდილი, ვარანტი იყო.

ამ თანავარსკვლავედში აშკარად გამოირჩეოდა ილია ჭავჭავაძე, რასაც თვით სამოციანელები აღიარებდნენ. ნიკო ნიკოლაძე 1873 წელს წერდა: „1861 წლის ახალი თაობა ჩვენ ცხოვრებაში პატიოსანი გრძნობით აღვსებული შემოვიდა, იმას კეთილი მიზანი ჰქონდა, პატივისცემი მიმართულება, შრომისა და ბრძოლის სურვილი და ახალგაზრდული აღტაცება, მაგრამ, როგორ ან რისთვის დავმალეთ, რომ ამ თაობას, ამ ახალ რაზმს შეადგენდა თითქმის მარტო ერთი კაცი — ილია ჭავჭავაძე; რომელიც წინამძღოლიც იყო და რაზმიც, ან უფრო სწორად რომ ვთქვათ, ურაზმო წინამძღოლი იყო იმ ახალი

თაობისა“. ილიას გაველენას განიცდიდა მთელი ქართული სინამდვილე, მთელი ეპოქა. დღეს ძნელი სათქმელია: ის დიდი ეპოქა, რომელმაც საქართველოსა და ქართველობის გადარჩენაში გადამწყვეტი როლი ითამაშა, ილია ჭავჭავაძემ მოიყვანა, თუ თვით ილია, რაღაც გარდაუვალობის კანონებით, მოიყვანა ამ ეპოქამ.

საქართველოსა და ქართველობის გადარჩენისათვის ბრძოლის აუცილებლობას გაუსვა ხაზი ილია ჭავჭავაძემ თავის პირველსავე პუბლიცისტურ წერილში „ორიოდე სიტყვა თავად რევაზ შალვას ძის ერისთავის მიერ კაზლოვის „შეშლილის“ თარგმანზედა“ (1860): „სამი ღვთაებრივი საუნჯე დაგვრჩა ჩვენ მამა-პაპათაგან: მამული, ენა და სარწმუნოება. თუ ამათაც არ უპატრონეთ, რა კაცები ვიქნებით, რა პასუხს გავცემთ შთამომავლობას?“ მაგრამ მამულის, ენისა და სარწმუნოების გადარჩენა ძნელი, თითქმის შეუძლებელი ჩანდა.

ქართულ ეროვნულ ცნობიერებას ძლიერი დარტყმა ჰქონდა მიყენებული. ილია ჭავჭავაძემ თავის ბრწყინვალე წერილში „ზოგიერთი რამ“ რეალიები მთელი სისრულით შენიშნა. ეს წერილი 1866 წელს დაიწერა, მაგრამ ცენზურის წინააღმდეგობის გამო მხოლოდ 1876 წელს დაიბეჭდა გაზეთ „დროებაში“. კითხვაზე — „სად არის ქართველი და ქართველობა?“ ილია უარყოფითად პასუხობს: „ქართველები არ არიან, მაშ რა არიანო? არიან თავადნი, აზნაურნი, მღვდელნი, ვაჭარნი, გლეხნი, ჩინიანნი და უჩინონი — ყველანი არიან, და ქართველოჲ კი არსად არის. თავადს აზნაური სძულს, აზნაურსა — თავადი, გლეხსა — ორივე, ნუთუ ესენი ქართველნი არიან, ერთის დედის საქართველოს ოჯახის შვილნი? თავადის აზრი — სათავადოა, აზნაურის — სააზნაურო, გლეხის — საგლეხო, ვაჭრისა — სავაჭრო, ნუთუ, ესენი ქართველნი არიან, ერთის თესლზედ აღმოსულნი? თავადის აზრი აზნაურს არ უხდება, აზნაურისა — თავადსა, ორივესი — გლეხსა, ნუთუ ესენი ქართველნი არიან, ერთისა და იგივე ხორცისა და სულის ნაყოფნი და ერთის დედის საქართველოს ბუძუთი გაზრდილნი?“ თუ ამ შებმთხვევაში ილია ჭავჭავაძე უფრო სოციალურ მომენტს წამოსწევს წინა პლანზე, ქვემოთ ამჟამად ერთიანი ეროვნული ცნობიერების არარსებობაზე სწუხს: „აბა დაიძახე: ქართველო-თქო, თუ შავის ზღვიდამ მოყოლებული კასპიის ზღვამდე მარტო დიპ-გადმოვადებულის ქართველის მეტმა (ე. ი. გორის მაზრაში მცხოვრებელმა) შემოგხელოს ვინმემ. და თუ გაჭირდა, იქნება კახელმაც თავისი მსხვილი კისერი შენკენ მოიღრიტოს, სხვა-

ნი კი ყურსაც არ გათხოვებენ, თითქო ამათ არა ეძახიო, თითქო ისინი კი ქართველები არ არიანო“. იმავე აზრს ილია ასეც აყალიბებს: „ქართველი ჩვენის ტომის საერთო სახელი აღარ არის, აღარც შინა და აღარც გარეთ, არც მახლობლისათვის და არც უცხოისათვის. იმერელი — იმერელია, გურული — გურულია, მეგრელი — მეგრელია, ქართლელი — ქართლელია, და სულ ყველანი კი ერთად ქართველები არ არიან“. ყოველივე ზემოთ მოტანილის ფონზეც კი შეიძლება გადაჭარბებულად მოგვეჩვენოს ილიას წერილის ერთი ადგილი: „მამულის ხსენებაზედ ეხლანდელს ქონდრის-კაცს თავისი ნებუდაყრილი სახნავი მიწა წარმოუდგება ხოლმე; მამულისათვის ბრძოლა ეხლა სასამართლოში შეტანილი ღერბიან ქაღალდზედ სადაო საჩივარია; მამულისათვის ძლევა მოსილობა — მოგებულის საქმის განაჩენის პირია, ჯეროვნად შემოწმებული; მამულის სიმაგრე — ტყრუსული ღობეა, ვენახ გარშემო შემორტყმული; მამულის პატივი — ნეხვია, სახნავ მიწაზედ სასუქად დაყრილი მამულიშვილობა — მხენელისა და მთესველის სახელიდაა“. მაგრამ ყველაფერი ეს ფაქტია იყო (ჩავიხედოთ ჩვენს გულებში — დღეს არ არის ფაქტი?).

აი, ასეთ უძნელეს, უიმედო სიტუაციაში იწყებოდა ბრძოლა საქართველოსა და ქართველობის გადასარჩენად — საქართველოს ერთიანობისათვის. იწყებოდა და მიმდინარეობდა, სხვათაშორის, გარკვეული სერიოზული იდეური წინააღმდეგობების პირობებში. ცნობილია ილია ჭავჭავაძის უთანხმოებანი ნიკო ნიკოლაძესთან, გიორგი წერეთელთან, სერგეი მესხთან, ივანე მაჩაბელთან და ბოლოს, არჩილ ჯორჯაძესთან. მაგრამ ამ უთანხმოებაშიც კი წინა პლანზე ყოველთვის საქართველოს ინტერესები იდგა — ეს პრინციპული, საკითხი იყო, ამის გარეშე გამარჯვება შეუძლებელი იქნებოდა.

სამოციანელთა დიდმა თაობამ, ილიას წინამძღოლობით, გამარჯვება მოიპოვა.

ყველაფერი იმაზე მეტყველებს, რომ მათ დაისახეს არა მარტო ნგრევის (იმპერიის მიერ შექმნილი სიტუაციის). არამედ შენების ამოცანა, რომელშიც არა მარტო საქართველოს და ქართველობის გადარჩენა იგულისხმებოდა, არამედ მომავალი საქართველოსათვის საძირკველის ჩაყრა. შეიძლება თქმა ასეც: არსებობდა არა მარტო ზოგადი იდეა გადარჩენისა, არამედ კონკრეტული გადაამჭრელი ზომეზიცი, მაგრამ გადაამჭრელი ზომები, მიმართული არა მარტო სახელმწიფოებრიობის არმქონე, შთანთქმულ ქვეყანაში ერის შეკერისკენ და მი-

სი პოტენციალის შენარჩუნებისკენ, არამედ მომავალში მკვდრეთით აღ-
მდგარი, სახელმწიფოებრიობის მქონე ქვეყნის ახლავე შენებისკენ. სა-
ბოლოოდ: საქართველოს და ქართველობის ცნებების გადარჩენის
(პირველი რიგის ამოცანა) გვერდით—პარალელურად, ერთდროულად—
ყო საზოგადოების ისეთი მოღვაწეობაც, თითქოს ქვეყანა უკვე სხვა,
ახალ მდგომარეობაშია—იგი სახელმწიფოა (1990 წ. თებერვალში გა-
მოქვეყნებულ წერილში წინამდებარე ნარკვევის ერთ-ერთი ავტორი
ქვეყნის წინაშე შემდეგ ამოცანას ხედავდა: „დამოუკიდებლობის
მდგომარეობის კონკრეტული შენება ახლავე. ეს არის დეტალური.
შემოქმედებითი პროცესის დაწყება იმ მდგომარეობაში, რომელშიც
არ გვინდა ვიყოთ, იმ მდგომარეობისთვის, რომელშიც გვინდა ვიყოთ.
ახალი სტრუქტურების, მომავალი საქართველოს კონკრეტული
სტრუქტურების შენება უნდა დაეწყოთ დღესვე — ისე, თითქოს უკ-
ვე ვართ დამოუკიდებელ საქართველოში“. ა. სილაგაძე, საქართვე-
ლო: 88-90, თბ. 1992 წ., გვ. 137). ყველაფერმა ამან ის მოიტანა,
რომ ილია ჭავჭავაძე და მისი თანამოაზრენი ფაქტიურად მთავრობ-
ის ფუნქციებს განახორციელებდნენ და ქმნიდნენ უნიკალურ სიტუ-
ციას: სახელმწიფო არ არსებობდა, მაგრამ არსებობდა და მოქმედ-
ბდა მთავრობა — კამუფლირებული სახელმწიფოს კამუფლირებული
მთავრობა. და იგი, ყოველ შემთხვევაში — მისი ლიდერი, ამზადებ-
და, როგორც ჩანს, ეროვნულ კონცეფციას, რომელიც გარდაუვალ
პოლიტიკური ფასეულობების შემცველი იქნებოდა.

ზემოთ თქმულის ნათელი ილუსტრაციაა სამოციანელთა მოღვა-
წეობის ძირითადი მიმართულებები.

თბილისის სათავადაზნაურო საადგილმამულო ბანკმა, ისევე რო-
გორც ქუთაისის სათავადაზნაურო საადგილმამულო ბანკმა,
საქართველო, ქართული მიწა იხსნა პირდაპირი მნიშვნელობით. სას-
აქონლო-ფულადი ურთიერთობების დამკვიდრების პირობებში ქართ-
ველ თავადაზნაურობას ხელიდან ეცლებოდა მიწა — იგი თითქმის
მთლიანად უცხოტომელი, ძირითადად სომეხი, ბურჟუაზიის ხელში
გადადიოდა, რომელიც ფულის მთავარი გამსესხებელი იყო.

ბანკის დაარსების იდეა თავის დროზე დიმიტრი ყიფიანმა წა-
მოაყენა. ბატონყმობის გაუქმებისას მთავრობამ შემამულეებს მის-
ცა გარკვეული თანხა. დიმიტრი ყიფიანმა, რომელიც იმხანად თა-
ვადაზნაურობის მარშლად იყო, დაითანხმა თავადაზნაურობა, რა-
თა მიღებული თანხის ნაწილი არ დარიგებულიყო და გადადებუ-

ლიყო ბანკის დასაარსებლად. დადგენილება ბანკის დაარსების შესახებ გამოტანილი იყო ჯერ კიდევ 1867 წელს. გარკვევით და ხაზგასმით უნდა აღინიშნოს, რომ ბანკი არ უნდა ყოფილიყო თავადაზნაურთა წოდებრივი ორგანიზაცია. ილია ჭავჭავაძე წერდა: თბილისის საადგილმამულო სათავადაზნაურო ბანკის „ნიშანდობლივი და საყურადღებო თვისება, რომელიც სხვა საადგილმამულო ბანკების წესდებისაგან განარჩევს, ის არის, რომ ბანკის მოგება, გარდა, რაც სხვადასხვა თანხას უნდა მიემატოს, კხმარდება ამერეთის არა მართო მიწათმფლობელთა, ესეიგი თავადაზნაურთა, არამედ მიწათმოქმედთა საერთო საჭიროებას. (ხაზგასმა ჩენია — ა. ს. ვ. გ.; ხაზგასმამ უნდა შეგვახსენოს, რომ ჩვენ დღეს მხოლოდ მიწათმფობელებზე ზრუნვას ვაპირებთ და არ გვახსოვს მიწათმოქმედნი). ამ სახით, ტფილისის სათავად-აზნაურო საადგილმამულო ბანკი თითქმის ისეთი ერთადერთი დაწესებულებაა საადგილმამულო კრედიტისა რუსეთში, რომლის წესდებითაც სრულიად უარყოფილია კერძო ინტერესი მოგებით სარგებლობისა საზოგადო სიკეთისა და საჭიროებისათვის“. ცხადია, ასეთი ბანკის დაარსებას დიდი წინააღმდეგობები გამოუჩნდებოდა. საქმე გაჭიანურდა. ბანკის შექმნისათვის გადამჭრელი აქტიური მუშაობა 1872-1873 წლებიდან დაიწყო და ამ საქმეს ილია ჭავჭავაძე ჩაუდგა სათავეში, მან ბანკის ორგანიზაციის საქმე ბოლომდე მიიყვანა. 1875 წელს გახსნილი თბილისის საადგილმამულო სათავადაზნაურო ბანკის თავმჯდომარედაც ილია ჭავჭავაძე აირჩიეს — იგი ამ პოსტზე 30 წელს იმყოფებოდა. დასავლეთ საქართველოში მოქმედებდა ქუთაისის საადგილმამულო სათავადაზნაურო ბანკი, რომელიც ასევე სამოციანელთა თაობის ინიციატივითა და აქტიური მონაწილეობით დაარსდა.

თბილისის და ქუთაისის საადგილმამულო სათავადაზნაურო ბანკები იმ ძნელბედობის ჟამს ქართველი ერისათვის ეკონომიკის სამინისტროც იყო, ფინანსთა სამინისტროც და ეროვნული ბანკიც.

კიდევ უფრო განსაკვიფრებელია ის კამპრიაზობა და გეგმაზორიერება, რაც იდეოლოგიის ჩამოყალიბებისა და მისი რეალიზაციის საქმეში გამოძღვლავნდა. ეროვნული ცნობიერების გადარჩენისა და ერის გამთლიანების იდეაზე აგებულ ამ იდეოლოგიას მრავალგანშტოებიანი კონკრეტული მიმართულებები ახლდა თან (აქ კულტურის სამინისტროც შეიძლება დავინახოთ, განათლებისაც, ინფორმაციისაც, სოცუზრუნველყოფისაც, კომიტეტებიც, კომისიებიც და ა. შ.,

— მკითხველი მოგვიტყევებს ჩვენს სინამდვილეზე ორიენტირებულ ამ უხეშ, პროზაულ მეტაფორებს).

ქართული ენის დაცვას, მის გადარჩენას უპირველესი მნიშვნელობა ენიჭებოდა ეროვნული მოძრაობის გაშლის, ქვეყნის ქვეყნად არსებობის საქმეში. 1860 წელს ილია ჭავჭავაძე წერდა: „სხვისა არა ვიცი და ჩვენ-კი მშობელ მამასაც არ დაუთმობდით ჩვენ მშობლიურ ენის მიწასთან გასწორებას. ენა საღვთო რამ არის, საზოგადო საქუთრებაა, მაგას კაცი ცოდვილის ხელით არ უნდა შეეხო“.

ეს არ იყო ილიას კერძო აზრი — ეს იყო სამოციანელთა თაობის საპროგრამო მოთხოვნა.

იაკობ გოგებაშვილის „დედა-ენამ“ ქართული ეროვნული ცნობიერების გადარჩენის საქმეში განსაკუთრებული როლი ითამაშა. განათლების სისტემის რუსიფიკაციის პირობებში, როცა ქართული სკოლის ორგანიზებაზე ოცნებაც კი არ შეიძლებოდა, იაკობ გოგებაშვილი ქმნის სახელმძღვანელოებს — „ქართული ენის ანბანი და პირველი საკითხავი წიგნი მოსწავლეთათვის“ (1865) და „დედა ენა“ (1876). „დედა ენის“ შექმნა საქართველოს ახალი ისტორიის უმნიშვნელოვანეს მოვლენათა რიცხვს განეკუთვნება — „დედა ენა“ ქართული ეროვნული ცნობიერების გადარჩენის სახელმძღვანელოც იყო.

ქართველთა შორის წერა-კითხვის გამავრცელებელი საზოგადოების (დაარსდა 1879 წელს) მრავალმხრივ მოღვაწეობაში განსაკუთრებული ადგილი ეჭირა ქართული სკოლების ორგანიზების საქმეს. საზოგადოების დაარსების ინიციატორები იყვნენ დიმიტრი ყიფიანი, გრიგოლ ორბელიანი, ილია ჭავჭავაძე, იაკობ გოგებაშვილი და სხვები. 1885 წლიდან საზოგადოებას უცვლელად თავმჯდომარეობდა ილია ჭავჭავაძე. მთელი ეს საქმიანობა ქართული ენის ტოტალური დევნის პირობებში მიმდინარეობდა, ხოლო მასშტაბურობაზე ის მიუთითებს, რომ წერა-კითხვის გამავრცელებელი საზოგადოების სკოლები საქართველოს გარდა გაიხსნა რუსეთის იმპერიის იმ ადგილებში, სადაც ქართველი მოსახლეობა კომპაქტურად ცხოვრობდა (ვლადიკავკაზი, ალაგირი, მოზდოკი, ნალჩიკი, ბაქო); დიდი ყურადღება ექცეოდა ქართული სკოლების გახსნას მესხეთ-ჯავახეთში, აჭარაში, საინგილოში. იმხანად ქართული სკოლის ორგანიზება ძნელი იყო, სხვას ყველაფერს თავი დავანებოთ, ფინანსური თვალსაზრისითაც კარგად მხრივ „ქართველთა შორის წერა-კითხვის

გამავერცელებელ საზოგადოებას“ დიდი დახმარება აღმოუჩინეს თბილისისა და ქუთაისის საადგილმამულო სათავადაზნაურო ბანკებმა). წერა-კითხვის გამავერცელებელმა საზოგადოებამ შეარჩია პედაგოგთა ბრწყინვალე კადრები, რომელთაც „დედა ენით“ მშობლიურ ენაზე წერა-კითხვა შეასწავლეს და, ამდენად, ქართულ სინამდვილეს, ქართულ სამყაროს სამუდამოდ დაუკავშირეს ქართველი ბავშვი. დიდი მნიშვნელობა ენიჭებოდა იმასაც, რომ ქართულ ენასთან ერთად ყველა სხვა სასწავლო დისციპლინა ქართულ ენაზე ისწავლებოდა—სამყაროს შეცნობას, აზროვნებას ბავშვი ქართულ ენაზე იწყებდა. ყოველივე ამას, რა თქმა უნდა, გადამწყვეტი მნიშვნელობა ჰქონდა ეროვნული ცნობიერების გაღვიძების საქმეში. ქართული სკოლის ორგანიზებით „ქართველთა შორის წერა-კითხვის გამავერცელებელმა საზოგადოებამ“ საქართველოსა და ქართველობის გადარჩენისათვის ბრძოლაში სრულიად განსხვავებული — გამორჩეული — როლი შეასრულა.

ქართულმა პრესამ, ქართულმა პერიოდულმა გამოცემებმა დიდად შეუწყვეს ხელი ეროვნული მოძრაობის წარმატებას. პირველი ქართული გაზეთი „საქართველოს გაზეთი“ (შემდეგში: „ქართული გაზეთი“) 1819-1821 წლებში გამოდიოდა, მაგრამ არც ამ გაზეთს და არც მეორე ქართულ გაზეთს — „ტფილისის უწყებანი“ (1828-1832) არ შეიძლებოდა ეროვნული ცნობიერების გაღვიძების საქმეში რაიმე როლი ეთამაშა. ეროვნული ცნობიერების გაღვიძებას ისახავდა მიზნად სოლომონ დოდაშვილის ხელმძღვანელობით 1832 წელს „ტფილისის უწყებანის“ დამატების სახით გამოცემული „სალიტერატურნო ნაწილნი ტფილისის უწყებათანი“ (ამ ჟურნალის სულ ხუთი ნომერი გამოვიდა). მართალია, მწვავე ეროვნულ პრობლემებზე მასალების ბეჭდვის უფლებას არ იძლეოდნენ, მაგრამ გიორგი ერისთავის ხელმძღვანელობით გამოშავალი ჟურნალი „ცისკარი“ მაინც დიდ მოვლენად უნდა ჩაითვალოს. იგივე ითქმის 1857 წელს ივანე კერესელიძის მიერ განახლებულ ჟურნალ „ცისკარზე“.

ქართული პრესა და, საერთოდ, ქართული პერიოდული გამოცემები საქართველოსა და ქართველობის გადარჩენისათვის დაწყებულ მოძრაობაში გადაჭრით ჩაებნენ 60-იანი წლებიდან. 1863 წელს ილია ჭავჭავაძე აარსებს ჟურნალ „საქართველოს მოამბეს“, რომელმაც სულ ერთი წელი იარსება. ეროვნულ მოძრაობას დიდი დეაწლი დასდო გაზეთმა „დროებამ“ (1866-1885), რომლის პირველი

რედაქტორი გიორგი წერეთელი იყო (1869-1883 წლებში გაზეთს სერგეი მესხი რედაქტორობდა, შემდეგ, დახურვამდე — ივანე მანაბელი). ქართული პერიოდული გამოცემების ფლაგმანის როლი ილია ჭავჭავაძის „ივერიას“ (1877-1906) ხელა წილად (1877-1878 წლებში „ივერია“ გამოდიოდა კვირული გაზეთის სახით, 1879-1886 წლებში — თვიური ჟურნალის სახით, 1886 წლიდან კი ყოველდღიურ გაზეთად გადაკეთდა).

ილია ჭავჭავაძის „ივერია“ ქართველი ერისთვის გაცილებით იმაზე მეტს წარმოადგენდა, ვიდრე ჟურნალი ან გაზეთი. „ივერიის“ ფურცლებზე აღიძრებოდა და გადაიჭრებოდა ხოლმე ქართველი ერის წინაშე მდგარი დიდი თუ მცირე პრობლემა. „ივერიის“ მიერ განსაზღვრული მიმართულება, ქართული სინამდვილის რომელ მხარესაც არ უნდა შეხებოდა იგი, საყოველთაო და გაბატონებული ხდებოდა. ყოველივე ამაში უდიდესი წვლილი მიუძღოდა „ივერიის“ რედაქტორს და მის უახლოეს თანამშრომლებს — გრიგოლ ყიფშიძეს, ალექსანდრე ყიფშიძეს, სტეფანე ჭრულაშვილს, სოფრომ მგალობლიშვილს, ილია ბახტაძეს, გიორგი ლასხიშვილს, კიტა აბაშიძეს, პეტრე უმიკაშვილს და სხვებს. „ივერიაში“ იბეჭდებოდნენ: ილია ჭავჭავაძე, აკაკი წერეთელი, რაფიელ ერისთავი, ვაჟა-ფშაველა, იაკობ გოგებაშვილი.

სრულიადაც არ არის გადაჭარბებული „ივერიაზე“ თქმული: „ივერია“ საქართველოს მთავრობა იყო.

„ივერიის“ გვერდით საქართველოსა და ქართველობის გადარჩენისათვის ბრძოლაში დიდი წვლილი შეიტანეს გაზეთმა „კვალ-მა“ (1893-1904), ჟურნალმა „მოამბემ“ (დაარსდა 1894 წ.), გაზეთმა „ცნობის ფურცელმა“ (1896-1906).

ქართულ პრესასთან, ქართულ პერიოდულ გამოცემებთან ბრძოლაში რუსეთის იმპერიის კოლონიური პოლიტიკის მესვეურებმა სასტიკი მარცხი იწვნიეს — ქართულმა პრესამ გააღვიძა და ერთი მიზნისათვის დარაზმა ერი.

ქართული წიგნის გამოცემა არ შეიძლებოდა მოგვარებულიყო სახელმწიფო ხელისუფლების დონეზე, პირიქით — კოლონიური ხელისუფლება, რუსეთის ცენტრალური მთავრობა, ყოველმხრივ აფერხებდა ქართული წიგნის ბეჭდვისა და გავრცელების საქმეს. სამოციანელთა თაობამ კარგად დაინახა, რომ ქართული პერიოდული გამოცემების გვერდით აუცილებლად უნდა აღორძინებულიყო ქართუ-

ლი წიგნის გამოცემის საქმე. ეროვნული ცნობიერების აღორძინებისა და განმტკიცებისათვის აუცილებელი იყო ძველი, კლასიკური, და ახალი ქართული ლიტერატურის ძეგლთა პოპულარიზება. აღზრდისა და განათლების საქმის ორგანიზება გადაუდებლად ითხოვდა პუბლიცისტური და საბუნებისმეტყველო ხასიათის ნაშრომთა, ასევე სახელმძღვანელოთა გამოქვეყნებას. 1851-1867 წლებში დაიბეჭდა იმაზე მეტი წიგნი, ვიდრე წინა 50 წლის განმავლობაში; 60-იან წლებში ყოველწლიურად 5-12 წიგნი იბეჭდებოდა. 1868 წელს დაიბეჭდა 11 სახელწოდების ქართული წიგნი, 1878 წელს — 45, 1893 წელს — 93, 1899 წელს — 112. 1868-1892 წლებში 100 სახელწოდების ქართული სახელმძღვანელო გამოიცა. ეს იყო ჭეშმარიტად დიდი გამარჯვებუ.

ქართულ თეატრს თავისი განსხვავებული მისია ეკისრებოდა საქართველოსა და ქართველობის გადარჩენისათვის ბრძოლაში. 1850 წელს დაარსებული პირველი ქართული თეატრი გიორგი ერისთავისა დაიხურა 1856 წელს. მუდმივი ქართული თეატრი ქართველ მოღვაწეთა ჯგუფმა ილია ჭავჭავაძისა და აკაკი წერეთლის ხელმძღვანელობით მხოლოდ 1879 წელს აღადგინა. 1880 წელს დრამატული თეატრი დაარსდა ქუთაისშიც. მ. კატკოვს, რომლის ცხოვრების მიზანი რუსეთის იმპერიის ძლიერების შენარჩუნება იყო, არაფერი გაუზვიადებია — მან ზუსტად შეაფასა ის დიდი საფრთხე, რასაც პატრიოტული თემისადმი მიძღვნილი ქართული პიესები ქმნიდნენ.

თუ დაეუმატებთ ყველაფერს ამას თანმიმდევრულ ზრუნვას ქართულ ისტორიოგრაფიაზე, დაუცხრომელ ბრძოლას ერის ისტორიის გაყალბებისაკენ მიმართული იმპერიული და ადგილობრივი მტკვლელობების წინააღმდეგ, — ჩვენს წინაშეა მართლაც უნიკალური პროგრამა ქართველობის გადარჩენისა, რომელიც არ ღარჩა მხოლოდ პროგრამად და წარმატებით ხორციელდებოდა...

და ამ პირობებშიც იყო ერთი ფუნდამენტური პრობლემა, რომლის გადაჭრის გარეშეც წარმატებაზე ფიქრი არ შეიძლებოდა: გარდა კუთხურისა, არსებობდა სხვა დიფერენცირებაც — მთელი ქართველი ერის, ყველა წოდებისა და კლასის გაერთიანების გარეშე საქართველოსა და ქართველობის გადარჩენისათვის ბრძოლა წარმოუდგენელი იყო. წოდებრივი, კლასობრივი დაპირისპირებანი უბედურების მომტანია ყველა ერისათვის, მით უფროა დამღუ-

პველი იგი იმ ერისთვის, რომელსაც სახელმწიფოებრივი დამოუკიდებლობა დაკარგული აქვს, რომლის უპირველესი მიზანია სახელმწიფოებრიობის აღდგენა. შეძახვევითი არ არის, რომ მეტროპოლია ყოველთვის კოლონიაში არსებულ სოციალურ წინააღმდეგობებზე აგებს იმპერიულ პოლიტიკას. 1888 წელს ილია ჭავჭავაძე უკვე მერამდენედ იმეორებდა მრავალგზის ნათქვამს: „ჩვენი გულითადი რწმენა ყოველთვის ისა ყოფილა და არის, რომ ერის წარმატება, ქონებრივი თუ გონებრივი, შესაძლებელია მხოლოდ მაშინ, როცა ერი წოდებათა დაუყოფლად, დიდპატარაობის გაურჩევლად და გამოუკლებლად ერთიანის მეცადინეობითა და გარჯით ჰცდილობს ცხოვრების გზა გაიკვალოს და ბურთი ბედისა გაიტანოს წუთისოფლის მოედნიდამ ერთად და საყოველთაოდ“. მოგვიანებით ილიას აზრი განავითარა და „საერთო ნიადაგის“ თეორია ჩამოაყალიბა არჩილ ჯორჯაძემ. (დღეს, დღევანდელი მთხოვნა თა მიხედვით, ამას ეროვნული თანხმობა ან სამოქალაქო თანხმობა ეწოდება, და იგი დღესაც აქტუალურია და მისაღწევი. იხ. ა. სილაგაძე, საქართველო 92, თბ. 1993, გვ. 60-61.)

მთელმა ამ ტიტანურმა ბრძოლამ ნაყოფი გამოიღო: XIX საუკუნის მიწურულსა და XX საუკუნის დამდეგს ნათელი გახდა, რომ საქართველო და ქართველობა გადარჩა. ცხადად იგრძნობოდა ისიც, რომ იმპერიის კოლონიური პოლიტიკის მესვეურებმა ქართველი ერის ასიმილაციისა და გადაგვარებისათვის ბრძოლის ფორმები და მეთოდები ამოწურეს.

ამ ორ სასიკეთო მოვლენასთან ერთად აშკარა გახდა ერთიანი ეროვნული მოძრაობის კრიზისი — შესაძლოა, ეს განვითარების ზოგადი ლოგიკაა. ასეა თუ ისეა, ფაქტი იყო ერთიანი მოძრაობის დაშლა ცალკეულ პოლიტიკურ მიმდინარეობებზე და პარტიებად. მაგრამ ამ პირობებშიც კი აშკარად ჩანდა წარმატებული მომავლის რეალობა — იმდენად დიდი იყო უკვე გაკეთებულის ინერცია. შემთხვევითი არ არის, რომ სამოციანელთა დიდი თაობის მიერ მოპოვებული გამარჯვების შედეგებს ყველა აღიარებდა. 1894 წელს ნოე ჟორდნია წერდა: „დიდად ვაფასებთ იმ თაობას, რომელმაც დაუფასებელი ღვაწლი დასდვა მთელ საქართველოს. შეგვიქმნა მწერლობა, შეგვიმუშავა სალიტერატურო ენა, შეებრძოლა ძველ წესებს და ჩაგრულთა მომხრეთ გამოვიდა. ერთი სიტყვით ეს თაობა იბრძოდა წინსვლისათვის, პროგრესისათვის, და თვით ეს ბრძოლა

გულ-წრფელი, უანგარო იყო. ეს თაობა (უკეთ ვთქვათ, ძველი და-სი) დღევანდელ ცხოვრებას მესამოცე წლების სათვალეებით უცქე-რის, მაშინ, როდესაც თვით ცხოვრება საშინლად შეიცვალა, დაი-პადნენ ახალი პირობები, აღმოცენდნენ ახალი კითხვები. აი, აქ იწყება ამ დროის უკანდახევა, ჩამორჩენა და განზე გადახევა“ (ნ. ჟორდანიას, თხზულებანი, ტ. 1, ტფ., 1920, გვ. 251). 1901 წელს არჩილ ჯორჯაძე წერდა: „ჩვენ ხაზს ვუსვამთ იმ გარემოებას, რომ ძველ და ახალ თაობას, ილია ჭავჭავაძის მეობებით, გამორკვეული დარჩა საერთო მოქმედების ასპარეზი და ეს სწორედ ის ასპარე-ზია, — ნაყოფი პოლიტიკური ცხოვრებისა, — რომელზედაც თავისუ-ფლად მოთაესდებიან ძველის, ახლის და მომავალ თაობის წარმომადგენელნი. ჩვენ ვამბობთ, რომ ამ საერთო შრომის საჭიროებას ილია ჭავჭავაძემ ჩაუღო საძირკველი და თუ ამ ბოლო ხანებში ჩვენმა მწერალმა თითქოს აუხვია თავისივე ფეხით გათელილ ბილ-იკს, ეს ჩვენ არ უნდა გვაშინებდეს. ვიქონიოთ სრული პატივი იმისი, რაც პატივსადებაა, ზოლო ნუ შეედრკებით და თამამად გამოვეცა-ლოთ ჩვენს მწერალს იქ, საცა ჩვენი გზები ერთმანეთს შორდებიან“ (ა. ჯორჯაძე, თხზულებანი. წიგნი მეორე. ტფ., 1911, გვ. 131).

მაგრამ საქმეც ის არის, რომ ილიას გზის უარყოფა ქართულ სინამდვილეში შეუძლებელი აღმოჩნდა. ილია ჭავჭავაძის გავლენას განიცდიდა ყველა პოლიტიკური პარტია და მიმდინარეობა — მთე-ლი ქართული საზოგადოებრივ-პოლიტიკური მოძრაობა ილიას მკვლელობიდან 1918 წლის 26 მაისამდე. ეს ეხება ყველას: სოციალ-დემოკრატს, სოციალისტ-ფედერალისტს, სოციალისტ-რევოლუცი-ონერს, ანარქისტს, ეროვნულ-დემოკრატს, პარტიულსა და უპარ-ტიოს.

ილია ჭავჭავაძემ და სამოციანელთა დიდმა თაობამ მემკვიდრე-ობით მიიღეს შეღავთული ეროვნული ღირსება, მიმქრალი ეროვნუ-ლი ცნობიერება, დევნილი და შევიწროებული ქართული ენა, ორ გუბერნიად, ორ ოკრუგად და ერთ ოლქად გაყოფილი ისტორიული საქართველო, და ნაცვლად ამისა, როცა 1917 წლის თებერვალ-მარ-ტში რუსეთის იმპერია აღესრულა, ქართველთა გონებაში სრულიად უმტკივნეულოდ გაცნობიერდა ერთიანი საქართველოს, ერთიანი ქართველი ერის გამომხატველი ცნებები: „საქართველოს ეროვნული ინტერპარტიული საბჭო“, „საქართველოს პირველი ეროვნული

ყრილობა“, „საქართველოს ეროვნული საბჭო“, „საქართველოს დემოკრატიული რესპუბლიკა“.

1917 წლის აპრილის დამდეგს უკვე არა უანდარმერიისა და ოხრანკისაგან მალულად, არამედ საჯაროდ, საქართველოს ბედის გადაწყვეტის მიზნით პირველად დასხდნენ ერთად ქართველი პოლიტიკური მოღვაწეები ყველა პოლიტიკური მიმდინარეობიდან და პარტიიდან. შეიქმნა საქართველოს ეროვნული ინტერპარტიული საბჭო (თავმჯდომარე — აკაკი ჩხენკელი). ეს იყო სრულიად საქართველოს მასშტაბით მოქმედი პოლიტიკური ორგანო. საქართველოს გამთლიანების, ერთიანი ქართული სახელმწიფოსკენ ლტოლვის მაჩვენებელი იყო ინტერპარტიული საბჭოს ინიციატივით მოწვეული საქართველოს პირველი ეროვნული ყრილობა (1917 წლის 19-24, ნოემბერი), რომელმაც 22 ნოემბერს აირჩია ასევე სრულიად საქართველოს მასშტაბით მოქმედი პოლიტიკური ორგანო — საქართველოს ეროვნული საბჭო. საქართველოს ეროვნულმა ინტერპარტიულმა საბჭომ და საქართველოს ეროვნულმა საბჭომ ზმარებიდან ამოიღო ცნებები: თბილისის გუბერნია და ქუთაისის გუბერნია, ბათუმის ოლქის ნაცვლად დამკვიდრდა — „აჭარა“, ან კიდევ „სამაჰმადიანო საქართველო“, სოხუმის ოლქის ნაცვლად — „აფხაზეთი“, ზაქათალის ოკრუგის ნაცვლად — „საინგილო“, სამხრეთ-ოსეთის ნაცვლად — „გორის მაზრის ნაწილი“. შიდა ქართლში (სამაჩაბლოში) მცხოვრებ ოსებს უწოდეს „ქართლის ოსები“ (!). ინტერპარტიული საბჭო და ეროვნული საბჭო ხაზს უსვამდა იმას, რომ ქართველი და არაქართველი მაჰმადიანებით დასახლებული ტერიტორია (აჭარა, მესხეთ-ჯავახეთი, აფხაზეთი, საინგილო) საქართველოს განუყოფელი ნაწილი იყო. საქართველოს ეროვნულმა საბჭომ 1918 წელს სპეციალური კომისიაც კი შექმნა, რომელსაც საქართველოს საზღვრები უნდა დაედგინა. ამ კომისიაში პოლიტიკურ მოღვაწეებთან ერთად ქართველი მეცნიერებიც (პავლე ინგოროყვა და სხვები) მუშაობდნენ.

ყოველივე ეს მოხდა რუსეთის იმპერიის ნგრევიდან სულ რამდენიმე თვის მანძილზე! იმხანად, სხვადასხვა მიზეზის გამო, ამისათვის ხაზი არავის გაუსვამს, მაგრამ ისედაც ცხადი იყო: ამ დიდი გარდატეხისათვის ქართველი ერი მე-19 საუკუნემ — სამოციანელთა თაობამ მოამზადა. სამწუხაროდ, ამ თაობის ცნობილ მოღვაწეთაგან მხოლოდ ერთი — ნიკო ნიკოლაძე მოესწრო 1918 წლის 26 მაისს.

შემდეგ მოხდა ის, რასაც ჩვენ ყველანი კატასტროფას ვეძახით. მაგრამ, თუ, ერთი მხრივ, ჩვენ სამართლიანნი ვართ მაშინ, როდესაც 1921 წელს იძულებით უკან გადადგმულ ნაბიჯს უუწოდებთ, მეორე მხრივ, უსამართლობაა, როდესაც მთელ 70-წლიან ეპოქას ამოვავადებთ საქართველოსთვის ბრძოლის ისტორიიდან. პირიქით: გრძელდებოდა—და გრძელდებოდა ინტენსიურად—საქართველოს შეკრების, რუკაზე მისი დაკვიდრების, ერის შეკერის, ეროვნული სულიერი კულტურისა და ეროვნული მატერიალურ-ეკონომიკური პოტენციალის განვითარების საქმე. ჩვენ არ ვიქნებით უსამართლონი, თუ ვიტყვით, რომ გრძელდებოდა ფაქტიურად სამოციანელთა იდეის რეალიზაციის საქმე — იმდენად ძლიერი იყო ინერცია. და კიდევ: გრძელდებოდა არა სპონტანურად და არა ზოგიერთი, ცალკეული მამულიშვილის, ხშირად კონსპირაციული, ბრძოლით — როგორც ჩვენ გვიყვარს ზოლმე თქმა, — არამედ მთელი ქართველობის ერთიანი, შეგნებული თუ შეუგნებული, მეცადინეობით. და კიდევ: ამ დროს არავის მოსვლია თავში აზრად აღერიცხა კახეთის, თუ ქუთაისის, თუ სამეგრელოს და ა. შ. წვლილი. მაგრამ ეს სხვა, გრძელი, თემაა...

ზემოთწარმოდგენილი ისტორიული ანალიზი ჩვენ იმისთვისაც დაგვეჭირდა, რომ დაგვესვა რამდენიმე ფინალური კითხვა. დღეს ჩვენ, კანონიერი, დამოუკიდებელი სახელმწიფოსა და კანონიერი, დამოუკიდებელი ხელისუფლების პატრონები, ვაკეთებთ იმასვე და ვაკეთებთ იმდენსვე, რასაც და რამდენსაც აკეთებდნენ ისინი, საკუთარი სახელმწიფოსა და საკუთარი ხელისუფლების არმქონე ადამიანები? ისევე ვზრუნავთ ჩვენს სკოლაზე და ჩვენს წიგნზე, როგორც ისინი? რაც მთავარია, ხომ არ გადაუხვიეთ მათ გზას — ხომ არ ავალორძინეთ კუთხური და სოციალურა დიფერენცირება? ისინი ერის არა უბრალოდ შეკავშირებას, არამედ მთლიანობას ქმნიდნენ.

ვინმე შეიძლება ფიქრობდეს, რომ ეს კითხვები დღეს თავის თავს მხოლოდ იმან უნდა დაუსვას, ვისაც სურს ხელისუფლებაში მოსვლა, ხვალ — იმან, ვინც მოვა ხელისუფლებაში. ჩვენ მიგვაჩნია, რომ, თუ წარმატება გვინდა, ამ კითხვებმა ჩვენ ყველანი უნდა დაგვაფიქროს. ყველანი — ერთად და მთლიანად.

შ ი ნ ა ა რ ს ი

წინასიტყვაობა	3
იდეალიზმი და კრაგმატიზმი ქართულ კოლტიკაში	6
საქართველო და საბარემოკოლტიკური ორიენტაციის პრობლემა	24
ბანუოფელი საქართველოსათვის	54

შეკვეთა 516

ტირაჟი 1500

გამომცემლობა „სამშობლოს“ სტამბა. კოსტავას ქ. 14